

**Kiitapu nyoo ntōrōōrwēēch
keesyaaka lōkōōy choo
kāroomēēn kilēē wōloo kiisirta
:Luuka**



**Marakwet
siruut**

Kiitapu nyoo ntōrōōrwēēch keesyaaka

Marakwet

Kiitapu nyoo ntōrōōrwēēch keesyaka siruut kilēē wōloo kiisirta :Luuka

Piichu kiisirēy taay ku: Barbara Graham nkōō Samuel Oluka ©

Piichu kiiwal ku: Evans Kiptoo, Edwin suter, Michael Yano nkōō Paul Kanda.

Piichu kiikōōnu piicheenik ku:...

Chamtaaraat /keereer /keewal kiitapuuni nkōō kuutway choo mēnkēēchēēn wōloo nyuun
māyoolchinii /kee-alta .

Marakwet

Choo /kuutyāmtooy

Pērēētuu nyi /kiikisātēy 2017

/Kiitapuunak ku: 150

BTL

Bible Translation and Literacy (E.A)

P.O.BOX 44456

Nairobi, Kenya.

Preface

This book is designed to serve as a Bible Study guide for the gospel of Luke. The book highlights the life and ministry of Jesus on earth. It contains some selected portions that will help Christians grow spiritually and live as disciples of Jesus Christ demonstrating a Christ like character in their daily living.

Taayuu

/Kiikichēp kiitapuuni kilē sikuuntōrōōrchi piich paani syookēy siruut chēpō kiitapuu Luuka. Ng'ālōolēy nkōō nwookin akipō sāpoo Yēēsu nkōō pāyiisēēnyiin kimii ng'wēny. Kāmoosiik chu /kiikilēwēn kuutoorētēy chiich nyoo lēē kiineetan nyēpō Yēēsu kinar nkōō sāpeenyiin kilēē kiristooniin akutuup ātēp nyēpō Kiristō nkōō kir aka tōkōl nyoo i-irēy nkōō pērēētuu aka tōkōl nyēpō sāpēēnyiin

.

LUK - - Marakwet Bible S. Study Material

1

TAAY NYĒPŌ KIITAPUU LUUKA

Luuka 1:1-4

Taayuu: Kiisirchi :Luuka Tēyōpiilō akipō sāpoo Yēesu nkōō pāyiisyeenyiin. Kii-ir kilēē nyoonēē āmu kiichikil kukaraam kuti kunyōōru kupunuunō kooyooytooy nkōō piich choo /kiiro nkōō koonyiikwaak tukun choo kii-ir Yēesu.

Saa: Soomō :Iriin kuutoorētīn sōwuu akiiran ng'ālyoon nyoo kiikōōnēēch :inyeentee kupunuunō siruut.

Soomana āsip ārēēny: Luuka 1:1-4

Tēēpuutyēē nyoo ōōw: Kii āmu nee /sikēēsir kiitapuu Luuka? (kii-iitō 4)

1. Kii ng'oo :nyi kiisirēy kiitapuu Luuka? (kii-iitō 3)
2. Kiinyōōrchi ānō :Luuka ng'aleechu kiisir? (kii-iitō 2)
3. Kiinyōōru nkōō or nee :Luuka ng'aleechu kiisir? (kii-iitō 3)
4. Kiisirchinii ng'oo :Luuka ngaleechu? (kii-iitō 3)
5. Kii āmu nee sikusir :Luuka kiitapuunyēēny? (kii-iitō 4)

Ng'ālyoon nyēpō lēt: Karaam /kēēsir ng'al chēpō koomānuut amu wō kusoomānēy chiitō aka paani maakēēmii /sikēēmwoochii akwaaneek keemii tōkōl. Kunyōōruuy paanyēēny ng'ālyoontoo Iriin āmu /kiikisir.

Saayat: Kōōnkēy :Iriin āmu kiikēēnyōōru :achaan ng'ālyoontēēng'uung' nyoo /kiikeesir.

/KĒĒMWOORUUY KILĒ /KINĀMĒY CHOWAANA KOOPŌTHISĀNIIN

Luuka 1: 5-25

Taayuu: Kiichoonchi :malayiikayaantaa Iriin Sakaryaa nkōō kōpō Iriin

akumwoochi kilē, iwētiy ināmēy wēērii nyoo wēētiy kuuchēpchinii aree Meesiiya. Kiimaaran :Sakaryaa amu kiikiikuyoosiit inyeentee akiisoon cheepyoosēēnyiin. Wōloo nyuun, nēē mii lētuun kumanak chēēpyooseenyiin akinam laakwa nyoo lēē wēērii.

Saa: Soomo :Iriin kuutoorētīn isyaak siruutēchiich akiiran inyeentee.

Soomana : Luuka 1:1-25

Tēēpuutyēē nyoo ōōw: Kiimāng'tooy ānō Sakaryaa nkōō Ēlisāpēēt? (kii-iitō 6)

1. Kiichōōnēē kō nee Sakaryaa nkōō Ēlisāpēēt? (kii-iitō 5)
2. Kii āmu nee si maanam akwaaneek laakooy taay? (kii-iitō 7)
3. Kii nee pāyiisyoo Sakaryaa? (kii-iitō 10)
4. Ng'oo :nyi kiichōōnchi Sakaryaa? (kii-iitō 11)
5. Kiimwoochi nee :malayiika Kaapuryeel Sakaryaa? (kii-iitō 13)
6. Kir nee nyoo kiichō ku-irēy :Choowaana? (kii-iitō 15-17)
7. Kir nee nyoo kiikārtoorēē keey :Sakaryaa kilē kiimaakuumuukēy kunyōōruuy laakwa? (kii-iitō 18)
8. Kiimwoochi :Kaapuryeel Sakaryaa kilē irēē nee āmu maaran Iriin? (kii-iitō 20)
9. Nee kir nyoo kiisōwu :piich akipō Sakaryaa? (kii-iitō 21, 22)
10. Kiimwa nee :Ēlisāpēēt paani kiisōwu kilē kiimanakaat? (kii-iitō 25)

Ng'ālyoon nyēpō lēt: Irēy Iriin ng'ālyoontēēnyiin kuusilta nkōō wōloo mii :piichiich aku moomii kir nyoo mēēmuukooy nkōō taayuunyyiin. Muukēē kilē imii ipuntēērēēy tukun choo nyikiisēēn akiirōotēy kilē mārōokēy. Karaam itiiree keey Iriin āmu moomii kir nyoo mēēmuukēē nkōō taayuunyyiin.

Saayat: Iriin, tāswoon kaarana saamuuk ātirēēniin keey nkōō moonyuun tōkōl

UNG'ŌŌRĒY :MALAYIIKA AKIPŌ WŌLOO /KINĀMTOOY YĒĒSU

Luuka 1:26-38

Taayuu: Kiimārēy :Iriin kung'ālōolchi piich. Kiiyooytō malayiika kuwō

kunyōōru chēētō aka nyoo kiichō kulēku eyaa Yēesu. Kiimwoochi :malayiikayaantaanoonē chēēpoonē kaayoomiisuut chaa chaang' choo kiipkoonē akipō laakwee.

Saa: Soomō Iriin kuutōrētīn sōwuu ng'ālyoontēēnyīn pō kwōng'uut nyoo kiimwoochi Maaryaa.

Soomana āsip ārēēny: Luuka 1:26-38.

Tēēpuutyēē nyoo ōōw: Nee ng'ālyoon nyoo ōōw nyoo kii-āpchi :malayiika Kaapuryeel Maaryaa kichōōnē Iriin ? (kii-iitō 31).

1. Ng'oo :nyi kiiyooytō malayiika Kaapuryeel kuwō Naasereet? (kii-iitō 26)

2. Kii-āpchi ng'oo malayiika ng'ālyoontee? (kii-iitō 27)

3. Kii ng'oo nyi kiimārēy si ku-āp ng'oo Maaryaa? (kii-iitō 27)

4. Kiiteerta āno :Maaryaa paani kiiteer nyēpō taay tookweesuut chēpō malayiika? (kii-iitō 29)

5. Kaarin nee nyi kiimwooch :malayiika Maaryaa kuutē wēēriinyiīn? (kii-iitō 31)

6. Ng'oo :nyi lēkuuy apoopō Yēesu? (kii-iitō 32)

7. Chō kulēkuuy nee pāyuunātoo Yēesu? (kii-iitō 33)

8. Kiimānāktooy ānō :Maarya nēē kiipeerkeeyaan? (kii-iitō 35)

9. Ng'oo :aka nyoo kiiwō kināmēy laakwa? (kii-iitō 36)

10. Kiimwa nee Maaryaa paani kiisōwur ng'ālyoontooni kichōōnō wōli mii Iriin (kii-tō. 38)

Ng'ālyoon nyēpō lēt: Mārēy :Iriin kusōwu piich tōkōl nkōō ng'wēny kilē ng'oo inyeetee. Mārēy :Iriin kēēsōwu achaan kilē nyooweech kaat ng'al chaa raacheen. Kiilēwēn :Iriin chēēpyooso nyoo mēēnkētoot nyoo kiicham akuukoonyit inyeentee kulēku eeya nyēpō wēēriinyiīn. Kiiyoomiis Iriin kutēpō nkōō inyeentee. Kuumuukēy mpō /kēēsōwu choomnyoot nkōō kaamuukaa Iriin nkōō sāpoonwēchooch nēē kuuran kilē kiyoo mwoorēy kipō man. Nēētēēch :Iriin kupunuunō ng'ālyoontēēnyīn.

Saayat: Iriin kōōnkēy āmu kiiyooku wēēriing'uung'. Tōōrētoon aran kilē kir nyoo imwoorwoon kilē ālēkuuy nta ā-irēy kuumuukooy. Ārānēy kilē imii inyēēn nkōō aneen. Lēē nyoonēē.

KIILLOOSU :CHĒĒPYOOSOORY ĀRĒĒNY CHOO PĒĒRUUROOTĒĒN IRIIN

Luuka 1: 39-56

Taayuu: Kiinyōōru :chēēpyoosooy ārēēny, Ēlisāpēēt nkōō Maaryaa chamat nkōō taayuu Iriin. Kiiting’ēy kir akoong’o nyaa karkeey—kiimwooru malayiika kilē mănākēēy aka tōkōl nkōō akwaaneek, laakoochu pēētii ku nāmēy akwaaneek ku wēēchin choo yookuuy Iriin si kumwaarta akipō pāyuunāteenyiin. Kiimanak tōkōl nkōō or nyēpō kwōng’uut. Kiikaakisiir Eliisapeet kēnyiis choo nāmēy laakooy aku kiimanak Maaryaa kimaaru nkōō murēn.

Saayat: Soomō :Iriin kukōōnin kaarana siirana ng’ālyoontēēnyiin paani isyookēy.

Soomana āsip ārēēny: Luuka 1: 39-56

Tēēpuutyēē nyoo ōōw: Chiich :nyoo lēē nēē nyoo pēēruurēy Iriin? (kii-iitō 45)

1. Kiikwarkwaar :Maaryaa kuwō ānō? (kii-iitō 39)
2. Kii-ira nee paani kiitaakwees Maaryaa Eliisapēēt? (kii-iitō 41)
3. Nee kir nyoo irēēnkōō chiich nyoo rānēy kilē siltooy kir aka tōkōl nyoo kaakumwoochi Iriin akwaaneek? (kii-iitō 45)
4. Āmu nee sikuutōrōōr :Maaryaa Iriin? (kii-iitō 49)
5. Ng’oo nyoo itinii riireenaa Iriin? (kii-iitō 50)
6. Kir nee nyoo kaaku-irchi :Iriin piichiich? (kii-iitō 51-55)
7. Kiitēpō : Maaryaa nkōō Ēlisāpēēt nyaa tyaan? (kii-iitō 56)

Ng’ālyoon nyēpō lēt: Kii chēēpyoosooy Ēlisāpēēt nkōō Maaryaa choo kiimātookuunootēēn akiirānēy Iriin nyēpō kaamuuka. Kiiran kir nyoo kiimwoochi Iriin kilē wō kuusiltooy kupunuunō akwaaneek. Mii :kooyoomiisuut chaa chaang’ choo kiiyoomiisin :Iriin kupunuunō ng’ālyoontēēnyiin. Kooyoomiisuut choo lēē mpō choo mwoorēy kilē, “Nēē choonchoon ākōōniin kiimuny”. Kir nyoo imārēy i-ir ku iran inyeentee kukaraam. Irēy :Iriin kuusilta kooyoomiisuutēchiich nkōō sāpēēng’uung’.

Saayat: Iriin āsoomiin itāswoon kaarana si nēē ng’at aran kaayoomiisuutēkuuk akipō sāpeenyuun. Kōōnoon tuum nyoo āloosuunēēniin. Lēē nyooneē

**/KĒĒNĀMĒY CHOOWAANA NKŌŌ NG'ĀLYOONTŌO
ŌŌRKŌOYĀNĀT KUPUNUUNŌ SAKARYAA**

Luuka 1: 57-80

Taayuu: Kiinam :Ēlisāpēēt nkōō Sakaryaa Choowaana paani kiikuyōōsiituuy akwaaneek. Paani /kiikuutō Choowaana kaarin kuyaata kuut apoonyiin aku kiinam toomirmir nyoo Tiliil kumwa ng'al chēpō ōōrkooyānāt akipō wēēriinyiin.

Saa: Soomō Iriin kung'oong'uun maakeenyiin paani imii isyookēy kiitapuuni.

Soomana āsip ārēēny: Luuka 1: 57-80

Tēēpuutyēē nyoo ōōw: Kii nēē pāyiisyoo Choowaana? (kii-iitō 76)

1. Ng'oo :chēēpyoosō nyoo kiinam laakwa nyoo lēē wēērii? (kii-iitō 57)
2. Kiipka ku-irchi nēē :sikiik nkōō pērēētuu nyēpō sisiit? (kii-iitō 59)
3. Kaarin nee nyoo /kiikuutō laakwee? (kii-iitō 60)
4. Kii-ira nee nkōō wōloo mii :apoonyiin paani kiikaakisir “Kilē kaarineenyiin ku Choowaana”? (kii-iitō 64)
5. Kiiting'ēy kaamuuka nyēpō ng'oo :Choowaana? (kii-iitō 66)
6. /Kiikukuurēē ng'oo apoonyiin? (kii-iitō 67)
7. Āmu nee sikuuloosu :Sakaryaa Iriin? (kii-iitō 68-75)
8. Kiipka /kēēkuurēē ng'oo laakwee? (kii-iitō 76)
9. Kii nee pāyiisyoo laakwee? (kii-iitō 76-79)
10. Kii nēē ōōwiit :laakwaani kuwō kumang' ānō? (kii-iitō 80)

Ngālyoon nyēpō lēt: Kiikoonyit :Sakaryaa nkōō Eliisapēēt Iriin āmu kiitē laakweeng'waang' kaarin kilē /kukuurēē Choowaana kaarin nyoo kiitē malayiika mpō nta kiimārēy piich choo lēkitēēn kēēkuurtooro paapeenyyiin. Mpō ntā nāmin ng'ala nkōō kaatyēmuut chēpō āpēntōng'uung' aniinee, ku imuukēy ilēwēn ikoonyit Iriin akiikany kulēku ng'ālyoonteenyyiin “Tayiit nkōō lēpooyin nyēpō kēēlyēēkuuk.”

Saayat: Paapa nyoo mii kipsēnkwēt, toorētoon aran akookoonyit ng'ālyoontēēng'uung' nyoo mootānkāsēēy kiyoo mwoorēy : piich nta kuupkootēy akipō aneen. Lēē nyoonēē

2

/KĒĒTUUMĒY YĒĒSU!

Luuka 2:1-20

Taayuu: /Kiikinam Yēesu nkōō Chēērusaleem aku chaang' tukun chēpō kwōng'uut choo kii-iriisyō nkōō pērēētuunoonēē.

Saa: Soomō :Iriin kung'uutuun tukun choo ung'ootēēn paani inēētēy keey aniinee.

Soomana āsip ārēēny: Luuka 2:1-20

Tēēpuutyēē nyoo ōōw: Kir nēē nyoo kiichō ku-irēē paani /kaakeenam Yēesu wēēroo Iriin? (kii-iitō 10, 14)

1. Āmu nee sikupa :piich tōkōl nkanasaani /kiikināmchi akwaaneek? (kii-iitō 2)

2. Nee kir nyoo kii-ira paani kiimii :Maaryaa nkōō Chōōsēp Pēētlēēm? (kii-iitō 7)

3. Āmu nee si /kēēnāmchi Yēesu kaang'ērēēp? (kii-iitō 7)

4. Kiichōōnchi :ng'oo mōsōwō choo kiiriipsyēyii? (kii-iitō 9)

5. Kiiteerta ānō :mōsōwēēchoochēē paani kiirō akuteer malayiika? (kii-iitō 9)

6. Kiimwa :malayiika kilē ng'oo Yēesu? (kii-iitō 11)

7. Koopooruunō nee nyoo kiitē :malayiika mōsōwō? (kii-iitō 13)

8. Nee kir nyoo kii-ir :mōsōwō paani kiirō Yēesu nkōō kaang'ērēēp? (kii-iitō 17)

9. Kiiteerta ānō :piich akipō kiyoo kiimwoochi :malayiika akwaaneek? (kii-iitō 18)

10. Kiiteerta ānō Maaryaa akipō kir aka tōkōl nyoo kii-ira? (kii-iitō 19)

Ng'alyoon nyēpō lēt: Kiikinam Yēesu nkōō pērēētuu nyoo nkētoot. /Kuunkēt kaarin nyēpō eeyeenyiin nkōō paapeenyiin nyi /kiiriipēy inyeentee. Kiimwooru :Iriin nkōō kipsēnkwēt akipō /kēēnāmēy inyeentee nkōō kir aka tōkōl nyoo kiimwooru malayiika ku kiichō kuusiltaara. Kiiwāliisyō piich chaa chaang' nkōō wōli kiikināmchi Yēesu. Kiimālēē :Yēesu laakwa aka tōkōl.

Saayat: Kiptaayaat Iriin, ānkēt aneen kilē kir aka tōkōl akipō inyeen kipō iman kilē paani kiipō iman ng’aleechu kiipāroostooy pō malayiika akipō inyeen. Toorētoon āmwoochi piikō walak akipō inyeen kilē paani kiimwoortooy Malayiika. Lēe nyoonēē.

/KĒĒTĒTOOY YĒĒSU NKŌŌ KŌPŌ IRIIN

Luuka 2:21-40

Taayuu: Kiituupēy :Chōōsēp nkōō Maaryaa ātēpoosyēpō piipō Yaawuutik. /Kiikumur Yēēsu akēētō Kaarin. Kiinyōōru :piich chaa chaang’ Maaryaa, Chōōsēp nkōō Yēēsu nkōō kōpō Iriin. Kiimāng’ēy kaa Chōōsēp Naasereet.

Saayat: Soomō Iriin kuutoorētīn sōwuu kiyoo isoomānēy.

Soomana āsip ārēēny: Luuka 2:21-39

Tēēpuutyēē nyoo ōōw: Āmu nee sikuumut :Chōōsēp nkōō Maaryaa Yēēsu kōpō Iriin? (kii-iitō 22-24)

1. Kōrōs nee choo kiitētō :Chōōsēp nkōō Maaryaa akipō Yēēsu? (kii-iitō 24)

Kir nee nyoo kiing’uuti :Toomirmiir nyoo Tiliil Siimnyōn? (kii-iitō 26)

2. Ng’oo :nyoo kiintōrōōrchi Siimnyōn kuti iit saang’nyēpō kōpō Iriin nkōō sayiitii akoong’o kilē Yēēsu? (kii-iitō 27)

3. Nee kir nyēpō taay nyoo kii-ir :Siimnyōn paani kiirō Yēēsu? (kii-iitō 28)

4. Kir nee nyoo kiirō Siimnyōn akuuran akipō Yēēsu? (kii-iitō 30, 31)

5. Kir nee nyoo ōōw nyoo kiing’uuti Yēēsu piich? (kii-iitō 35)

6. Nee kir nyaa ra nyoo nyōōruuy :Maaryaa? (kii-iitō 35)

7. Kii-irēy nee :Aanah pērēētū aka tōkōl? (kii-iitō 37)

8. Kii-ir nee :Aanah paani kiirō Chōōsēp nkōō Yēēsu? (kii-iitō 38)

9. Kiilēē nee :Yēēsu paani kiinar aku ōōwiit nkōō Naasareet?

Ng’ālyoon nyēpō lēt: Kiichāmēy :Chōōsēp nkōō Maaryaa Iriin akiimārēy kuukonyit ng’ātuutēchiich tōkōl. Kiinkēt kilē riipēy wēēriinyiin aku-irchi kir aka tōkōl nyoo kiinyoolchinii /kēē-irchi. Mpō paani kiitākumanang’ ku kiisōwu :piich walak Yēēsu kilē kii wēēroo Iriin akukutunchi inyeentee. Kiisip kusōwu :Maaryaa nkōō Chōōsēp kilē kii ng’oo Yēēsu, akusōwu kilē, kiichō kimāng’iisyey

māng'ōōt nyaa kolkol.

Saayat: Kiptaayaan Yēesu āmāraa mpō āloosuu :inyeen. Toorētoon āsōwuun kitya ākookoonyitiin kilē Maaryaa nkōō Chōōsēp choo kiikoonyit ng'ātuutēpō Iriin paani kiipa kanam :inyēēn. Lēē nyoonēē.

KIIWŌ :YĒĒSU KŌPŌ IRIIN

Luuka 2:41-52

Taayuu: Kiinara :Yēesu kōōroo Naasareet kimii nkōō sikiichiich chu kiināmēy inyeentee, wōloo nyuun kiinkēt kilē kii ng'oo inyeentee. Man kiisōwu :Maaryaa nkōō Chōōsēp kilē kii ng'oo Yēesu? .Kii-ir :Yēesu piich ku kwōng'nyō. Mpō ntā maasōwu :Maaryaa nkōō Chōōsēp kukararaam Yēesu, ku kiitas taay :Yēesu kucham akuukoonyit akwaaneek.

Saayat: Soomō Iriin kuutoorētīn sōwu wōloo kiitēptooy :Yēesu paani kiinaran.

Soomana āsip ārēēny: Luuka 2:41-52

Tēēpuutyēē nyoo ōōw: Kiing'uutu :Yēesu nkōō oor nyoo lēē nee kilē kiinkēt kilē kii ng'oo inyeentee? (kii-iitō 49)

1. Kiiwētīi :Maaryaa nkōō Chōōsēp Chēērusaleem kēny aka tōkōl siku-ir nee? (kii-iitō 41)

2. Kii-ir nee :Yēesu paani kiirook tuum? (kii-iitō 43)

3. Kiipkaat :Maaryaa nkōō Chōōsēp kilē kiimii ānō Yēesu? (kii-iitō 44)

4. Kii-āp :Maaryaa nkōō Chōōsēp pērēētuus ata si kunyōōru Yēesu? (kii-iitō 46)

5. Kii-irēy nee :Yēesu nkōō saang' nyēpō kōpō Iriin? (kii-iitō 46)

6. Kii-āptō ānō :piich lōkōōyipō Yēesu? (kii-iitō 47)

7. Kiimwoochi nee :Maaryaa Yēesu? (kii-iitō 48)

8. Kiiwālchi :Yēesu kilē nee eeyeenyiin? (kii-iitō 49)

9. Kii ng'oo nyi lēē apoopō Yēesu nyēpō iman? (kii-iitō 49)

10. Kiitas taay kitēptō ānō :Yēesu nkōō taayuu sikiik chu kiiriipēy? (kii-iitō 51)

Ng'alyoon nyēpō lēt: Kii kōrōōm nkōō: Maaryaa nkōō Chōōsēp kusōwu kilē

Yēesu ku kii wēeroo Iriin. Kiing'uutu keey Yēesu kilē kii ng'oo inyeentee paani kiitākumanang'. Kii-ir piich kukwōng'nyō nkōō wōltō aka tōkōl wōloo kiiwō āmu kiinkēt ng'al chaa chaang' choo kōrōōmēēn. Kiinar :Yēesu kuting'ēy choomnyoot nkōō koonyit nkōō taayuu piich. Kiitas taay kupāyiisyēēchi Iriin aku kiicham chiich aka tōkōl nyoo kiinkēt inyeentee.

Saayat: Iriin, toorētoon ānyōōru ātēp nyoo lēē nyēpō Yēesu, ātingēy choomnyoot nkōō koonyit, akoopāyiisyēēchi Iriin. Lēē nyoonēē

3

CHOOWAANA KOOPOOTIISĀNIIN NKŌŌ YĒĒSU

Luuka 3:1-22

Taayuu: Kii-amta :Choowaana koopootiisāniin kilē kumētō piich oortin chaan raacheen. Kiintōrōōru kichō kichēpchi Yēesu aree. Kiipaatiisan Choowaana Yēesu aku kiimwa kilē Yēesu ku wēeriinyuun.

Saayat: Soomō Iriin kuutoorētīn sōwuu koomānuut nyēpō siruutēchu pō aniinēē.

Soomana āsip ārēēny: Luuka 3:1-22

Tēēpuutyēē nyoo ōōw: Nee ng'ālyoontēē nyoo ōōw nkōō lōkōōyipō Choowaana? (kii-iitō 16)

1. Kii ng'oo tisiik choo eecheen paani kii-āmtooy :Choowaana lōkōōy choo kārōōmēēn? (kii-iitō 2)

2. Kii ng'oo apootaa Choowaana? (kii-iitō 2)

3. Kiitapuu nee nyēpō ārāruut nyēpō kēny nyi kiing'oloolēē Choowaana? (kii-iitō 4)

4. Irēē nee nkōō piich choo māyēēy lōkōr choo kārōōmēēn nkōō sāpoonwēkwaak? (kii-iitō 9)

5. Lōkōryoon nyoo lēē nee nyoo nyoolchinii /kēērō nkōō sāpoonwēēchooch? (kii-iitō 11, 13, 14)

6. Kiikukwōng'nyō :piich āmu nee? (kii-iitō 15)

7. Ng'oo nyi kiikar :Choowaana koong' nkōō amtaartanyiin? (kii-iitō 19)
8. Ng'oo nyoo /kiikuupaatiisan kupootō piich choo kiing'aang' ng'ōōkiikwaak? (kii-iitō 21)
9. Ng'oo nyi kiirēku akuchōōnchi Yēēsu kilēē chēēptuukō paani /kiikuupootiisānēy? (kii-iitō 22)
10. Kiimwa nee Apoo Iriin akipō wēēriinyiin Yēēsu? (kii-iitō 21)

Ng'ālyoon nyēpō lēt: Kiichō :Choowaana aku-āmchi piich lōkōōy kimētō ortineekwaak chaa raacheen, kiichēpēy piich akipō choonattoo Yēēsu. Mārēy :Iriin kuurō ātēpuut pāyiisyoony, kaapkootuut nkōō ng'alaala choo kāroomēēn nkōō sāpoonwēēchooch. Kiimaawārēy :Choowaana koopootiisāniin kukar koong' piich choo irēy tukun chaa raacheen. Kiinkēt :Choowaana kilē Yēēsu ku wēēroo Iriin nyoo maating'ēy ng'ōōki aku kiimaanyoolchinii /keepaatiisan. Kiing'uutu keey Iriin ku sōmōk aku akoong'o paani /kiikuupootiisānēy Yēēsu. Kiisip kipāypāychi paapa nyēpō kipsēnkwēt wēēriinyiin kutoomō kutoowu pāyiisyeenyiin nkōō ng'wēny aku ma sikunyōōru piich sāruunō choo tiiree keey inyeentee.

Saayat: Kiptaayaan Yēēsu koonkēy akipō kir aka tōkōl nyoo kii-irwaan. /Kiikuupaatiisanin :inyēēn aku kiimēēting'ēy ng'ōōki choo yāmēy keey /kēēnyoowuun kaat. Apaypay aneen kitya kilē nkēti :inyēēn apoong'uung' nkōō Toomirmiir nyoo Tilii aku chēēriin kutoomō iwō suur kween. Lēē nyoonēē.

Siintaaryaa kōpō mpō Yēēsu

Luuka 3:23-38

Taayuu: Araa Yēēsu nyi mwooruy Luuka, ku tuupēy kipaata siintaar nyēpō murēn amā ng'ālolooy sintaar nyēpō chēpyoosooy aku toowuunēē pāytooyiin Tawuuti, Apraam, Aatam ākōy ku-iti Iriin.

Saayat: Soomō Iriin kuutoorētīn sōwuu koomānuut nyēpō siintaar. **Soomana āsip ārēēny:** Luuka 3:23-38

Tēēpuutyēē nyoo ōōw: Ng'oo paapaa kimukuulmēt tōkōl? (kii-iitō 37)

1. Ng'oo nyi /kuupkootēy kilē paapaa Yēēsu? (kii-iitō 23)
2. Kii ng'oo apootaa Tawuuti? (kii-iitō 32)
3. Ng'oo wēēroo Teera nyoo kiitookuunoot? (kii-iitō 33)

4. Chiich nyēpō taay kumang’ ng’wēny ku kii ng’oo? (kii-iitō 37)
5. Āmu nēē sikipō koomānuut kusōwu chiich siintaaryeeyiin nyi kiichoonēē?

Ng’ālyoon nyēpō lēt: Kilēē chiich aka tōkōl, /kēēpkootēy kilē, kiichōōnēē Yēēsu araa Chōōsēp. Toorētēēch nyēēnyī kēēsōwuu akipō sāpēēnyīin kilēē kimukuulmēt. Toorētēēch mpō /kēēsōwu kaamuukeenyīin, amu kilēē Meesiiya, ku kiinyoolchinii areenyīin nyoo kiichōōnēē ku kōpō pāytooyīin Taawuuti. Mwoorwēēch araanyēēnyī kilē kii ng’oo Yēēsu. Ng’ālōolēē Luuka nkōō kurkat nyēpō 23, Yēēsu ‘kilēē wēērii /akēēpkootēy kilē wēēroo Chōōsēp’. Kiipkōōtēy :piich kilēē nyoonēē, wōloo nyuun maalēē. Kiisik :Maaryaa wōloo nyuun kimaalaakwaa Chōōsēp nyēpō kērētiichiich. Kiikinam Yēēsu nkōō or nyēpō kwōng’uut nkōō kaamuuka nyēpō Toomirmiir nyoo Tiliil. Yēēsu ku wēēroo Iriin (kii-iitō 22). Ng’uutuuy siintaaryaani kiichōōnēē Yēēsu kilē kiikumukuulmēt inyeentee, wōloo nyuun kiimākumukuulmēt kipaati. Ng’uutuuy Ārāruut nyēpō Rēēl kilē kii Iriin inyeentee. Muukēē kimānyumnyum soomana nyēpō aniinēē, wōloo nyuun kiilēy kaarana. Ng’uutuuy kilē kii kumukuulmēt :Yēēsu! Nkēt kir nyoo imārēy, tukun choo ipuntoorēē nkōō kaa-iimuut akuumuukēy kuutoorētīn aniinee āmu nee lēē inyeentee ku Iriin.

Saayat: Koonkēy :Iriin āmu kiiyōōkweech Yēēsu kilēē kimukuulmēt, akiiyookwēēch mpō kilēē wēēroo Iriin kuchō ng’wēny sikuutoorēteech .Lēē nyoonēē.

4

/KĒĒTYĀMĒY YĒĒSU

Luuka 4:1-13

Taayuu: Kiityam :Syeetaani Yēēsu paani kiimii suur kwēēn. Kiing’uutwēēch :Yēēsu wōloo nyoolchinii kēēkiring’tēē kāātyāmuut nkōō koopooruunēēnyīin.

Saayat: Soomō Iriin kuutoorētīn sōwuu kiyi imii isoomānēy si nee ityō ineet keey tukun chaa chaang’ akipō Yēēsu.

Soomana āsip ārēeny: Luuka 4:1-13

Tēepuutyē nyoo ōōw: Kiipāyiisyēērō nee :Yēesu sikuutarteer kāātyāmuut chēpō Syeetaani? (kii-iitō 4, 8, 12)

1. Kii nee warakeera :Yēesu Choortan ku kiinyiri ng'oo? (kii-iitō 1)
2. Kiitēpō :Yēesu pērēētūus ata kimaam kir? (kii-iitō 2)
3. Kir nee nyēpō taay nyoo kiityama: Syeetaani Yēesu? (kii-iitō 3)
4. Kiiwālchi nee :Yēesu Syeetaani? (kii-iitō 4)
5. Kiing'uuti nee :Syeetaani Yēesu paani kiityāmēy? (kii-iitō 5)
6. Kilēēchi :Syeetaani Yēesu ākōōniin nee? (kii-iitō 6)
7. Kinyoolchinii :Yēesu ku-ir nee sikunyōōru paytaar aka tōkōl nyēpō ng'wēny? (kii-iitō 7)
8. Kiimwa :Yēesu kilē āloosuu ākoopāyiisyēēchi ng'oo? (kii-iitō 8)
9. Kiimut ānō: Syeetaani Yēesu sikuutyam nyēpō lēt? (kii-iitō 9)
10. Kiiwalta ānō :Yēesu kāātyāmuutyoonoonēē pō lēt? (kii-iitō 12)

Ng'ālyoon nyēpō lēt: Kiichōōnchi :Syeetani Yēesu paani kiimaakiting'ēy kiimnān āmu kiikirukuut keey. Kiitāketing'ēy :Yēesu kiimnān kikirinta Syeetaani āmu kiinyiri inyeentee :Toomirmiir nyoo Tiliil akiinkēt ng'ālyoontoo Iriin. Kilēē nyoonēē mpō nkōō achaan, kuumuukēy keekirinta kāātyāmuut nee nyireech pērēētūu aka tōkōl Toomirmiir nyēpō Iriin akēēnkēt ng'ālyoonteenyiin.

Saayat: Iriin, kuunkēt :achaan kootyāmuut choo irēēch kēēkutunchii akēēpāyiisyēēchii kaanaamōōn. Kusoomiin naas ikōōnēēch kiimnān keekirintee Syeetaani akeepāyiisyēēwuun inyeen ākityōōn. Lēē nyoonēē.

Kiitay Yēesu :piichiich pō kōōkwō

Luuka 4:14-30

Taayuu: Kii nēē kaakupunteerō :Yēesu kāātyāmuut choo ng'woonēēn nkōō suur kwēēn, kuwō Kaliilaaya akuwō kitēpō nyaa manang' nkanaasa nyēpō Naasareet wōli kiimii katang'waang'. Nkōō yēēnyi /kēērōōtēy wōloo kiipkaatita piich chēpō pērēētūnoonēē akipō Yēesu nkōō koonēētiisyēēnyiin.

Saa: Soomō Iriin kuutoorētīn iran ng'ālyoontēēnyiin.

Soomana : Luuka 4: 14-30

Tēepuutyē nyoo ōōw: Kii āmu nee /sikeetay Yēēsu nkōō Naasareet? (kii-iitō 24)

1. Kiimii ng'oo kuukiilēy Yēēsu? (kii-iitō 14)
2. Kii nee kir nyoo kiicham ki-irēy Yēēsu? (kii-iitō 16)
3. Kiiyaat :Yēēsu kiitapu nee paani kiisoomānēy siruut ? (kii-iitō 17)
4. Kii ngālōolēy akipō nee :Yēēsu paani kiimwōōrēy kilē, “ Kaakuusilta aniinēē siruutyooni āteerēy akwaan?” (kii-iitō 18-21)
5. Nee kiyoo /kiikiteep akipō Yēēsu? (kii-iitō 22)
6. Kiimwa :Yēēsu kilē koolēwēnō nee nyoo mwoochinii :piich inyeentee? (kii-iitō 23)
7. Kiimwa :Yēēsu kilē nee kir nyēpō man akipō ōōrkooy? (kii-iitō 24)
8. Kiikōōnu :Yēēsu koopooruunō kupunuunō Ārāruut nyēpō Kēny kēnyiis 2000 kitoomō kinyōōru kaarana piipō Yaawuut walak. Paani kiimii kēmēy nkōō piri kōōroo Israayeel, ku /kiikuuyooytō Eliicha kuwō ānō? (kii-iitō 25, 26). Mpō ntā kiimii piipō Yaawut chaa chaang' choo kiimnysōōt nkōō pērēētuu Eliisya, ku ng'oo nyoo kiisooop ōōrkooyoontoo Iriin?
9. Kiimārēy ku-irchi nee :pichoochēē kiinyāliisyo Yēēsu? (kii-iitō 28, 29)
10. Nēē mii lētuun ku-ir nee Yēēsu? (kii-iitō 30)

Ng'ālyoon nyēpō lēt: Āmu kiimaata kuuran :piich chaa chaang nkōō Naasareet ng'aleepō Yēēsu, kumar kupar inyeentee. Kiiweechi keey :Yēēsu āmu kiisas pichoochēē. Iting'ēē inyeen pārooyiin aniinee iran Yēēsu nkōō ng'ālyoontēēnyiin. Ku nēē mēēran kuwēēchinii keey mpō nkōō wōli imii.

Saayat: Kiptaayaan Iriin, naayteereenaan mukulēr nyaa wurur akiikōōnoon makat nyoo ārānēy ng'ālyoontēēng'uung' akaawala kilēē wōli imārtooy :inyeen, nkōō kaarinaa wēēriing'uung'. Lēē nyoonēē.

KUTOOWUUY :YĒĒSU PĀYIISYĒĒNYIIN

Luuka 4:31-44

Taayuu: Kiitoowu :Yēēsu kuunēētiisyo akuusooop piich choo kii kiipkoonchi inyeentee. Mpō ntā kiisooop kōrōōytiin chaa chaang' ku kiimā pāyisyeēnyiin nyoo

ōōw kuusoop piich kipaap.

Saa: Soomō Iriin kuutoorētīn sōwuu kiyoo isōōmānēy.

Soomana āsip ārēēny: Luuka 4:31-43

Tēēpuutyēē nyoo ōōw: Āmu nee sikuchō nēē Yēēsu ng'wēny? (kii-iitō 43)

1. Kir nee nyoo ng'ulaat nkōō kōōnēētiisyyoo Yēēsu? (kii-iitō 32)
2. Kiiwārēy nee :toomirmiirēyiichoochēē raacheen kiimii or nyēpō chiichoonēē? (kii-iitō 34)
3. Nee ng'ātuut ārēēny choo kiimwoochi :Yēēsu toomirmiirichoochēē? (kii-iitō 35)
4. Kir nee nyoo kii-ira nkōō chiichoonēē kiinam toomirmiir nyaa ra? (kii-iitō 35)
5. Kiichō nee paani kii-ira kwōng'uutyoonoonēē? (kii-iitō 37)
6. Ng'oo nyi kiimnyaat nkōō kaa Siimnyōn? (kii-iitō 38)
7. Kiisooptō ānō :Yēēsu pookēr pō Siimnyōn? (kii-iitō 39)
8. Kii-ir nee :chēēpyoosoonoonēē paani kiisāp? (kii-iitō 39)
9. Kii-ira nee kimichintooy asiis? (kii-iitō 40)
10. Kiiwō ānō :Yēēsu paani kayyeech kōōrēē? (kii-iitō 42)

Ng'ālyoon nyēpō lēt: Kiichāmēy :Yēēsu kuusoopēy piich choo kiimnyoonsoot. Kiikoonyitēy mpō :toomirmiirēy chaa raacheen ng'ātuutēpō Yēēsu akiinkēt mpō kilē Yēēsu ku wēēroo Iriin nyoo tiliil. Kiinkēt :Yēēsu kilē amtaar nyēpō lōkōōy choo kāroomēēn akipō pāyuunātoō Iriin ku pāyiisyeenyiin nyēpō taay. Kiikoonyitēy :Yēēsu kir aka tōkōl nyoo kiimārēy :paapeenyiin inyeentee ku-ir.

Saayat: Kiptaayaat Yēēsu, koonkēy āmu ichāmēy isoopoon paani āchō mnyaanaat. Toorētoon a-amta lōkōōyiikuuk choo kāroomēēn nkōō wōltō tōkōl wōloo āwēētiy. Lēē nyoonēē

5

/KĒĒKUURĒY KIINĒĒTAN CHĒPŌ TAAY

Luuka 5:1-11

Taayuu: Mārweech :achaan Yēēsu keetuupa akēēpāyiisyeechi inyeentee. Kuurēy :inyeentee piich pērēētuus walak kumētō pāyiisyoonyikwaak aku kany ku-ir pāyiisyo nyoo mārēy inyeentee. Wālēy tukun chēpō kwōnguut sāpēēnyoon.

Saa: Saaya :Iriin kuutoorētīn siisōwuu akiineet keey kiyi isyookēy.

Soomana āsip ārēēny: Luuka 5:1-11

Tēēpuutyēē nyoo ōōw: Kir nee nyoo kii-ir Siimnyōn kuurō keey kilēē yoo kipng’ōōkiyoon? (kii-iitō 8, 9)

1. Kii-irēy nee :piichu kiimii nkōō Yēēsu? (kii-iitō 1)
2. Kiilaang’ :Yēēsu mēēlii ng’oo? (kii-iitō 3)
3. Kii-ir nee :Yēēsu paani kiimii mēēli ? (kii-iitō 3)
4. Kiimwoochi nee :Yēēsu Siimnyōn ku-ir paani kaakuuwaang’ kuunētēy piich? (kii-iitō 4)
5. Kiiteer iit :Siimnyōn Yēēsu mpō ntā kiipkootēy kilē kir nyoo maakunyoolchinii ku-ir? (kii-iitō 5)
6. Paani kiiteer iit : Siimnyōn Yēēsu ku-ira nee? (kii-iitō 6)
7. Kiimwa nee :Siimnyōn paani kiirō kwōng’uutyoonoonēē? (kii-iitō 8)
8. Kiiteerta ānō :chiich aka tōkōl paani kiirō kwōng’uutyoonoonēē? (kii-iitō 9)
9. Kiiyoomiis nee :Yēēsu Siimnyōn nēe cham kutuup inyeentee? (kii-iitō 10)
10. Kiireer ku-ir nee :murēchoochēē kiināmēy pō kaaraak? (kii-iitō 11)

Ng’ālyoon nyēpō lēt: Kiirō :Siimnyōn nkōō choorwayiichiich chu kināmēy kaaraak kwōng’uut nyoo ōōw. Kiisōwu Siimnyōn kilē weel kilē kiimaakumukuulmēt Yēēsu kipaata wōloo nyuun kii Iriin. Sāsēy :Iriin ng’ōōki kunyuun nyoolchinii /kēēnyoochi chiich kaat akipō ng’ōōkiichiich. Kiinkēt Yēēsu kaapkootuut chēpō chiich aka tōkōl aku kiiyoomiis sāpoon nyoo rēēl pichu kiināmēy kaaraak nēē tuup inyeentee. Kiimētō :pichoochēē kiināmēy kaaraak pāyiisyeeng’waang’ akutuup Yēēsu.

Saayat: Yēēsu ānkēt aneen kilē i-irēē :inyeen tukun chēpō kwōng’uut akoonkēt :aneen kile āchō kipng’ōōkiyoon kilēē Siimnyōn. Lēyyē nyoo woon kaat.

Kimēēmētoon. Pāyiisyēērēēnoon. Lēē nyoonēē.

KUUSOOPĒY :YĒĒSU PIICH AKUUNĒĒTĒY AKIPŌ NYOOYEETAAP KAAT

Luuka 5:12-26

Taayuu: Mēēsoopiisyēy: Yēēsu kipaap, wōloo nyuun kōōnuuy keey kunyooweech kaat rāyityēēnyoon. Nkētēēch :Yēēsu akuunkēt mpō āmu nee sikēē-irēy tukun chaa raacheen.

Saa: Soomō :Iriin kuutoorētīn sōwuu kiyi inēētēy keey.

Soomana āsip ārēēny: Luuka 5: 12-26

Tēēpuutyēē nyoo ōōw: Nee kir nyoo ōōw nkōō: Yēēsu paani kātuuyō nkōō chiich nyaa mnyaanaat? (kii-iitō 20)

1. Kiikuurō ng'oo :chiichi kyaam kōōnchōryooontō Yēēsu.? (kii-iitō 12)
2. Kii-ira nee nkōō chiichoonēē paani kiing'at :Yēēsu kilē , "Sopo"? (kii-iitō 13)
3. Kii-ira nee paani kiiteer :piich chaa chaang' akipō kwōng'uutyoonoonēē? (kii-iitō 15)
4. Ng'oo nyi kiiteertooy nkōō kamas nyēpō pichoochēē chaang' paani kiinēētiisyēy Yēēsu? (kii-iitō 17)
5. Kisoopiisyō :Yēēsu nkōō kaamuuka nyēpō ng'oo? (kii-iitō 17)
6. Nee nyoo kiicham :Yēēsu kitya akipō murēchoochēē kiimuti inyeentee choorweeng'waang'? (kii-iitō 20)
7. Kiimwoochi nee :Yēēsu chiichoonēē kiimeertaaraat pōōr ? (kii-iitō 20)
8. Kiipkootēy :Pariisaay nkōō koonēēt kilē ng'oo nyi muukēy kunyoochinii piich kaat? (kii-iitō 21)
9. Kiing'uuti nee: Yēēsu pichoochēē sukuōwu kilē kiiting'ēy :inyeentee kaamuuka nkōō ng'wēny kunyōōchi piich kaat? (kii-iitō 24)
10. Kii-ir nee :piich paani kiirō kwōng'uutyooni? (kii-iitō 26).

Ng'ālyoon nyēpō lēt: Pō kwōng'uut /kēēsōwu kilē nkēt Yēēsu kir aka tōkōl nyoo kuupkootēy :achaan nkōō nyoo ki-irēy. Mārēy inyeentee kuutoorētēēch akuusoopēēch. Mārēy mpō kunyōōwēēch kaat ng'ōōkiichooch akulēku

choorweenyoon. Nēē nyoochinii piich kaat inyeentee, kung'uutuuy kilē Iriin inyeentee āmu Iriin ākityōōn nyoo nyoochinii piich kaat.

Saayat: Apoo Iriin, āmwooruunyeen koonkēy akipō kir aka tōkōl nyoo i-irwoon. Kinyoowoon kaat ng'ōōkiichuuch akii-iraan ātililiit. Āloosuunyeen aniinee āmu ichō Iriin nyēpō kaamuuka akiiting'ēy choomnyoot, inyeen mpō choorweenyuun. Lēē nyoonēē

/KĒĒKUURĒY LAAWI NYOO KIIKWĀRIINTOO KŌŌTI

Luuka 5:27-32

Taayuu: Kiiwāliisyō piich choo kiinyōōru Yēēsu kilēē Laawi nyoo kaarinee aka ku Maataayo. Kiikinyōōchi inyeentee kaat. Nyoolchineech kēēnyōōruu Yēēsu sikuwāliisyō ātēpoosyēchooch. Nyōōlchinēēch kēēmwoochii piich walak walat nyoo kaakēēnyōōru.

Saa: Mwōōchii Iriin kuuneetin kupuunuunō koonēētiisyooni pō aniinee.

Soomana āsip ārēēny: Luuka 5:27-32

Tēēpuutyēē nyoo ōōw: Kii āmu nee sukuchō :Yēēsung'ng'wēny? (kii-iitō 32)

1. Ng'oo nyi kiirō :Yēēsu nkōō yi kikwārēē kōōti? (kii-iitō 27)
2. Kiimwoochi nee :Yēēsu Laawi? (kii-iitō 27)
3. Kii-ir nee :Laawi paani kiimwoochi Yēēsu kilē Tuupan? (kii-iitō 28)
4. Kii-irchi nee :Laawi Yēēsu sikung'uuti choomnyeenyi? (kii-iitō 29)
5. Kii ng'oo mpō piikō walak? (kii-iitō 29)
6. Ng'oo nyi kiikwiintonēy akipō Yēēsu? (kii-iitō 30)
7. Kiikwiintoochinii nee :pichoochēē akipō Yēēsu? (kii-iitō 30)
8. Kiimwoochi ng'oo kwiintanikwaak? (kii-iitō 30)
9. Ng'oo nyoo wāsēy cheepsaakityaan? (kii-iitō 31)
10. Kiichō :Yēēsu kukuur ng'oo kumētō ātēpoosyēkwaak chaa raacheen akusoom /kēēnyoochi kaat? (kii-iitō 32).

Ng'ālyoon nyēpō lēt: Kiipaypayiit :Yēēsu paani kiirō piich ku-istooy ng'ōōkiikwaak aku wāliisyō akumwoochi piich walak akipō sāruunō nyi kiinyōōrchi Yēēsu. Kiimārēy :Yēēsu chiich aka tōkōl kēēnyōōchi kaat.

Kiimwoochi :Laawi piichu kii-irēy pāyiit tōkōl akipō Yēēsu sikusōwu akuuran. Kuumuukēy :achaan mpō kēēmwoochi piich walak akipō kir nyoo kiikinyōōru nkōō wōli mii Yēēsu. Piich choo lēē kipsāchi keey kimēēmuukēy kusōwu akipō kiyi ku-irchinii :achaan Yēēsu. Kiing’uutwēēch Iriin choomnyeenyiin paani kiikipētyootēēn nkōō ng’ōōki aku mār wēēch /kēēmētēē oortin chaa raacheen akeetuup inyeentee.

Saayat: Iriin āmwooruun :inyēēn koonkēy āmu kiinyoowoon kaat ng’ōōkiichuuch tōkōl. Toorētoon simaakwiintaan akipō piich walak choo pāyiisyeewuun, nyoo kātōo kwiintonēy ikanyaan āsoochi. Lēē nyoonēē

6

PĀYUUY :YĒĒSU PĒRĒĒTUU SAPAATO

Luuka 6:1-16

Taayuu: Pāyuuy :Yēēsu pērēētūu Sapaato (nkōō kir aka tōkōl nyoo kii-ir), akuunkēt kaapkootuutēchooch tōkōl kilēē paani kiinkēt kaapkootuut chēpō Pariisaay nkōō kōōnēēt chēpō ng’ātuut. Nka nyoonēē muukēy kulēwēnchi keey inyeentee piich choo chāmēy inyeentee.

Saa: Soomō Iriin kuutoorētīn sōwuu ng’ālyoontooni kiimwoochinii Pariisaay nkōō kōōnēēt chēpō ng’ātuut.

Soomana āsip ārēēny: Luuka 6:1-16

Tēēpuutyēē nyoo ōōw: Kiimwoochi nee :Yēēsu Pariisaay nkōō kōōnēēt chēpō ng’ātuut? (kii-iitō 5)

1. Pērēētūunoo nyi kiipuntēērēē :Yēēsu nkōō kiinēētanichiich paraa nkaanu? (kii-iitō 1)

2. Pērēētūu Sapaatō ku pērēētūu nyēpō kiimuny. Kiikiitāsi :koontōy chēpō tiini ng’ātuut walak parak nyēpō ng’ātuut chēpō pērēētūu Sapaatō. Kii-ir nee kiineetanik nkōō paraa nkaanu? (kii-iitō 1)

3. Nee kir nyoo kiimachamaat nkōō ng’ātuut /kee-ir nkōō pērētūu Sapaatō

kutuup keey nkōō Pariisaay? (kii-iitō 2)

4. Kiimwa :Yēesu kilē kii-ir nee Taawuuti nkōō choorwayiichiich paani kiipa kōpō Iriin? (kii-iitō 3-4)

5. Kiimwa :Yēesu kilē pāyuuy :ng'oo pērēētuu Sapaatō? (kii-iitō 5)

6. Kiinēētiisyēērō ānō :Yēesu pērēētuu aka nyēpō Sapaatō aku kiimii ng'oo yoonēē? (kii-iitō 6)

7. Kii āmu nee sikuurootēy: Pariisaay nkōō kōōnēēt chēpō ng'ātuut kiyi kii-irēy :Yēesu nkōō pērēētuu Sapaatō? (kii-iitō 7)

8. Kii-irchi nee :Yēesu chiichi kiiwiita ēēruu nyēpō taay nyoo kii-ir piich kunyāliisyō? (kii-iitō 8-11). Ipkoōtēy :inyēēn kilē āmu sikunyāliisyō :piichoochēē akipō kiyoōnēē karaam?

9. Kii-ir nee :Yēesu tulwō lang'a kuyyeech? Kii nēē yyeech kukuur kiineetanichiich kupka wōli mii inyeentee aku-ir nee? (kii-iitō 12-13)

10. /Kiikukuurēē mpō ng'oo :kooyooytooyik taman nkōō ārēēny? Aku ng'oo nkōō akwaaneek nyoo kiilēku āltooriin? (kii-iitō 14-16)

Ng'ālyoon nyēpō lēt: Yēesu ku wēēroo Iriin aku pāyuuy pērēētuu Sapaatō. Kiichō ku-ir pāyiisyoo paapeenyiin: kuutyaak piich choo kiirātootēēn, kuyaat koonyin piich choo kii-ir ng'ātuut nkōō ātēpoos chēpō kimukuulmēt kukōryō. Pkoōtēy :pichoochēē kilē, nēē riip ng'ātuut ku-irēy akwaaneek kicham Iriin. Kiilēwēn :Yēesu ku-ir pāyiisyeenyiin nkōō wōli mii Pariisaay nkōō kōōnēēt chēpō ng'ātuut. Mpō paanyēēnyi kunyoolchinii /kēēriipēē keey koonēētut choo nēētēy kilē, kisāruuy chiich paani ka-ir pāyiisyoōn choo kārōōmēēn.

Saayat: Kiptaayaan Iriin, ānkēt :aneen kilē inkēt inyēēn kaapkoōtuutēchuuch, toorētoon aran ākoonyit ng'ālyoontēēng'uung'. Lēē nyoonēē.

KOONĒĒTUUT CHĒPŌ KOOMĀNUUT CHĒPŌ YĒĒSU

Luuka 6:17-36

Taayuu: Nēētēy :Yēesu wōloo nyoolchinēēch /kēētēptō nkōō puunichooch nkōō ku chiich aka tōkōl. Pēēruurēy :Yēesu piich choo chāmēy akupāyiisyēēchinii inyeentee. Nkēt wōloo wō kitāchinii akwaaneek choo rēēng'ēy nta kusāsēy inyeentee.

Saa: Soomō Iriin sikuutoorētīn pāyiisyēērēē kōōnēētūutēchu nkōō sāpēēng’uung’.

Soomana āsip ārēēny: Luuka 6:17-36

Tēēpuutyēē nyoo ōōw: Ātēp nyoo lēē nyoo kiimārēy :Yēēsu kiting’ēy? (kii-iitō 31)

1. Āmu nēē sikupka :piich kiteer Yēēsu? (kii-iitō 18)
2. Kii āmu nee Simārēy :piich kitiing’ Yēēsu? (kii-iitō 19)
3. Ng’oo choo pēēruurēy :Yēēsu? (kii-iitō 20-21)
4. Pēēruur nee nyoo nyōōruuy :piich choo lēē mēēy? (kii-iitō 20)
5. Pēēruur nee nyoo nyōōruuy :piich choo āmēy piri? (kii-iitō 21)
6. Pēēruur nee nyoo nyōōruuy :piich choo riiryēyīi? (kii-iitō 21)
7. Pēēruur nee nyoo nyōōruuy :piich choo /kisāsēy akipō kaaraneeng’waang’? (kii-iitō 23)
8. Kir nee nyoo irēē akipō :piich choo lēē mōkōrō? (kii-iitō 24)
9. Nyoolchinii kiineetanipō Yēēsu kitēptō ānō nkōō wōloo mii puuniikwaak? (kii-iitō 27)
10. Nee kir nyoo irēē paani /kēēkoonyit piipō Iriin ng’ātuutyoonnyēēnyi kōrōōm? (kii-iitō 35)

Ng’ālyoon nyēpō lēt: Kiineet :Yēēsu kiineetanichiich wōloo nyoolchinii kitēptō nkōō piich tōkōl kupootō mpō puunikwaak. Rōōnchinii akwaaneek pēēruur kitya mpō nkōō pēēētūus choo kōrōōmēēn. Pō koomānuut /kēēsōwu kilē rwookweech Iriin. Tingēy riireena :inyeentee aku mārweech keeriiree piich walak.

Saayat: Paapa āmāraa ālēku kiineetan nyēpō Yēēsu, ānkēt aneen kilē mā kir nyaa nyumnyum wōloo nyuun toorētoon ariira piich walak kilēē paani kiiriireenaan. Lēē nyoonēē.

KOONEETUUT AKIPŌ ĀTĒP NYAA KARAAM

Luuka 6: 37-46

Taayuu: Kiitas taay :Yēēsu kuuneet piich chaa chaang’ akipō māng’ōōt nyoo nyooluunoot. Nēētēy akwaaneek akipō wōloo tēptooy piich choo tiiree keey Iriin nkōō choo mātiirēē keey’.

Saa: Saaya Iriin kuutoorētīn i-ir kilēē wōloo mwooruun ng'ālyoontēēnyiin.

Soomana āsip ārēēny: Luuka 6: 37-49

Tēēpuutyēē nyoo ōōw: Āmu nee sookuuroon kilē 'Kiptaayaan, Kiptaayaan, aku moo-irēy kiyi āmwoorwook? (kii-iitō 46)

1. Nee tukun ārēēny choo mānyoolchiniin i-ir? (kii-iitō 37)
2. Tukun nee choo lēē ārēēny choo nyoolchiniin i-ir? (kii-iitō 37-38)
3. Kārkēyin nee nyoo kiimwoochi Yēēsu piich? (kii-iitō 39)
4. Ng'uutuuy nee? Lēkuu nee kiineetana nee /kaakeeneet kukaraam? (kii-iitō 40)
5. Kir nee nyoo nyoolchiniin i-ir kupok kutoomō itoorēt wēēring'woong'? (kii-iitō 41-42)
6. Neeteech nee ng'ālyoontoonyēēnyi? Sowuuntooy ānō :chiich keet choo ng'uloong'ulēy? (kii-iitō 43-44)
7. Pkoonēē ānō tukun chaa raacheen nkōō choo kāroomēēn? (kii-iitō 45)
8. Imuukēy isōwuuntō ānō kilē ra chiich nta ku karaam? (kii-iitō 45)
9. Karkeey nkōō nee chiich nyoo tēērēy akutuup ng'ālyoontoo Iriin? (kii-iitō 46-48)
10. Karkeey nkōō nee chiich nyoo tēērēy amātuupēy ng'ālyoontoo Iriin ? (kii-iitō 49)

Ng'ālyoon nyēpō lēt: Māng'ōōt nyaa karaam /kēēnyooruuy paani /kakiteer /akeetuup ng'ālyoontoo Iriin.

Saayat: Kiptaayaan Iriin, koonkēy akipō wēēriing'uung' nyoo kiiyooku kichō kuuneet :aneen oortinēkuuk. Āsoomiin nyuun iriireenaan saatuup ng'ālyoontēēnyiin. Lēē nyoonēē

7

KAARANA NKŌŌ KWŌNG'UUT

Luuka 7:1-17

Taayuu: Riirēēnēēch :Yēēsu akipō nyāriluut nkōō kōrōōytiin choo pkoonchinēēch. Nkēt akipō ng'woonin aka tōkōl nyoo kipuntēērēē. Kiipāyiisyēērō :Yēēsu kaamuukaa Iriin kimii ng'wēny.

Saa: Saaya Iriin kuutoorētīn siisōwuu ng'aleechiich paani isyookēy.

Soomana āsip ārēēny: Luuka 7: 1-10

Tēēpuutyēē nyoo ōōw: Kir nee nyoo mārēy :Yēēsu kung'uutu piich kutoomō kuusoop? (kii-iitō 9)

1. Kiimāng'ēy ānō :koontōōyiin nyēpō lukoo pooryoot? (kii-iitō 1)
2. Ng'oo nyi :kiimnyaanaat? (kii-iitō 2)
3. Kii-ir nee :koontōōyiin nyēpō lukoo pooryoot paani kiiteer akipō Yēēsu? (kii-iitō 4)
4. Kii āmu nee sikuupkootēy :pooyi kilē toorētēy :Yēēsu kipāyiityoontoo koontōōyiin nyēpō pooryoot? (kii-iitō 5)
5. Kaarin nee nyēpō koonyit nyoo kiitē koontōōyiintoonoonēē Yēēsu? (kii-iitō 6)
6. Kiirōotita keey ānō koontōōyiintoonoonēē pō pooryoot? (kii-iitō 6/7)
7. Kiiteertooy ānō :piich choo lēē riip nkōō kipāyiitiin paani kiing'at :koontōōyiin nyēpō pooryoot akwaaneek? (kii-iitō 8)
8. Kiisōwu nee :koontōōyiintoo pooryoot akipō Yēēsu? (kii-iitō 7)
9. Nee kir nyoo kii-ir :Yēēsu kukwōng' akipō koontōōyiintoo pooryoot? (kii-iitō 9)
10. Kii-ira nee akipō kaarana nyoo kiiting'ēy :koontōōyiin nyēpō pooryoot akipō Yēēsu? (kii-iitō 10)

Soomana āsip ārēēny: Luuka 7:11-17

Tēēpuutyēē nyoo ōōw: Ng'oo nyoo ting'ēy kaamuuka kupayta meerat? (kii-iitō 14, 15)

1. Kii nēē wēērō :Yēēsu Kaaparnaam kuwō ānō? (kii-iitō 11)
2. Kiīwō :Yēēsu nkōō ng'oo? (kii-iitō 11)
3. Kii nēē paanta ku-it Yēēsu koopooruu nkanasa, kuurō ng'oo? (kii-iitō 12)
4. Kii nee tilyaantii :murēnooni kiima nkōō chēēpyoosooni lēē mōsōk kiiriirēy? (kii-iitō 12)

5. Kiiteerta ānō :Yēesu akipō chēēpyoosoonoonēē lēē mōsōk kiiriirēy?
(kii-iitō 13)
6. Kii-irta nee :Yēesu kiptaraanchaanoonēē kiimii muusyoontee? (kii-iitō 14)
7. Kiilēēchi nee :Yēesu chiichoonēē kiima? (kii-iitō 14)
8. Kii nee ng'at :Yēesu muusyoontēē ku-ira nee? (kii-iitō 15)
9. Kiipkaat nee :pichoochēē paani kiirō kaamuuka nyēpō Yēesu? (kii-iitō 16)
10. Kir nee nyoo kii-ira paani kaakuusoop :Yēesu chiichoonēē ? (kii-iitō 17)

Ng'alyoon nyēpō lēt: Āmu chāmēēch :Yēesu ku kōōnēēch tukun choo kisoomēy. Koonyitēy kaaraneenyoon akuriirēēnēēch akipō ng'woonin nkōō kaamuut choo kipuntoorēē. Kiisōwu :koontōōyiintoo lukoo pootyoot kilē ting'ēy :Yēesu kaamuuka kuusooپییسyō āmu kiiran inyeentee kilē Iriin. Irānēy :inyēēn kilē Yēesu ku Iriin akuting'ēy kaamuuka nkōō sāpoontāng'uung'? Muukēy :Yēesu ku irin kwōng'uut aniinee nēē rānēy inyeentee. Loosuu inyeentee!

Saayat: Koonkēy Yēesu akipō riipētēēng'uung' nyoo Iriipoon nkōō pērēētus choo kōrōōmēēn. Āmāriin :inyēēn ipayta sāpoontanyuun. Neetaan ānyōōru kaarana nyoo oōw. Lēē nyoonēē.

YĒĒSU NKŌŌ CHOOWAANA

Luke 7:18-35

Taayuu: /Kiikisip /kēēyooytō Choowana kuwō kuchēpchi Yēesu aree. Nkōō :piich tōkōl choo kiinam chēēpyōōsōōy ku moomii nyoo oōw kisiir Choowaana, aku :inyeentee mining'iitēy keey nkōō pāyuunātoo Iriin ku oōw kusiir Choowaana.

Saa: Saa Iriin kuutoorētīn sōwuu ng'ālyoontooni isoomānēy.

Soomana āsip ārēēny: Luuka 7:18-35

Tēēpuutyēē nyoo oōw: Kii :chiich nyoo oōw Choowaana. Ng'oo nyoo oōw kusiir Choowaana? (kii-iitō 28)

1. Kiiyooytō :Choowaana kiineetanichiich ārēēny kipa ānō aku kiimwoochi

nee akwaaneek ku-ir? (kii-iitō 18-20)

2. Nee kir nyoo kii-ir :Yēesu paanoonēē? (kii-iitō 21)

3. Kiiwālchi nee :Yēesu kiineetanichoochēē pō Choowaana? (kii-iitō 22)

4. Kir nee nyoo irēy :chiich /kēēpēēruur? (kii-iitō 23)

5. Kii nēē pēēchi keey :kiineetanipō Choowaana, kumwoochi nee :Yēesu piikō? (kii-iitō 24-28)

6. Kiimwa :Yēesu kilē kiimā chiich nyoo lēē nee Choowaana? (kii-iitō 24-25)

7. Kiimwa :Yēesu kii ng'oo Choowaana? (kii-iitō 26)

8. Kii nee pāyiisyoo :Choowaana? (kii-iitō 27)

9. Kii ōōw :ng'oo kisiir Choowaana? (kii-iitō 28)

10. Ng'oo :nyi kiiran kilē, pō man ortinēēpō Iriin ? Aku ng'oo :chu kiitay chēpuut chēpō Iriin akipō sāpoowweekwaak? (kii-iitō 29-30)

11. Ng'oo :nyi /kiikimwa kilē choorwoo kwāriipō kōōti nkōō kipng'ōōkiis? (kii-iitō 34)

Ng'ālyoon nyēpō lēt: Kiing'uuti :Yēesu Choowaana kilē kiinyoolchinii kuchēpchi inyeentee aree. Chaang' :piich choo kiicham ng'ālyoontoo Iriin, wōloo nyuun kiitay :Pariisaay nkōō koonēēt chēpō ng'ātuut mākuutyoo Iriin paani maacham kuupaatiisan akwaaneek :Choowaana. Kiikuurō mpō wēēroo chiich kipng'ookiyoon.

Saayat: Kiptaayaan Iriin, toorētoon amarak piich kilē wōli lēē kisiir āmarar kilēē wōli looktooy keey. Lēē nyoonēē.

NYOOCHINII KAAT :YĒĒSU PIICH

Luuka 7:36-50

Taayuu: Kiitaak akoong'o nyēpō Pariisaay Yēesu kuwō ku-āmiisyō nkōō katanyiin, paani kātēpō ng'wēny akutiirō keey ēēeruunyiin(kilē āti kiilēē ātēp nyēpō perēētusyēchoochēē), kuchō chēēpyooso nyoo kiiriironuuy, aku kany kutāchi lōōkichiiich kēēlyēēpō Yēesu, akumiisa puutēchiich. Kii-ila mpō mwaar akuchuuchun .Kii-ir nyoonēē kikwōng :chiich aka tōkōl nyoo kiimii kōyoonēē kupootō Pariisaay akutoowu kitepa keey nēē ōōrkooyoon :Yēesu amu kiicham chēēpyooso nyoo lēē kipng'ookiyoon kitiing' inyeentee. Nēē mii lētuun kinyoochi kaat Yēesu chēēpyoosoonoonēē!

Saa: Paani isoomānēy kiitapuun, isaa Yēesu kunyoowuun kaat ng'ōōkiikuuk akiiran kukaraam inyeentee.

Soomana āsip ārēeny: Luuka 7:36-50

Tēepuutyēē nyoo ōōw: Ng'oo nyoo muukēy kunyoochi piich kaat ng'ōōki? (kii-iitō 49)

1. Kiitaak :ng'oo Yēesu kuwō katanyiin ku-āmiisyō? (kii-iitō 36)
2. Kiiteer :ng'oo kilē kiiwō Yēesu kaa Pariisaayoon? (kii-iitō 37)
3. Kii-āp nee? (kii-iitō 37)
4. Kii-ir nee? (kii-iitō 38)
5. Kiipkaat nee nkōō wung'oot :pāriisooyintooni kiitaak Yēesu? (kii-iitō 39)
6. Kiikukuurēē ng'oo :Pariisaayaantaanoonēē kiitaak Yēesu? (kii-iitō 40)
7. Kii nee kaakiteer :Siimnyōn ng'aleepō Yēesu, ku kiimwa kilē chiich ng'oo nyoo kuung'uutu choomnyoot nyoo ōōw? Āmu nee? (kii-iitō 41-43)
8. Kii-ir nee :chēēpyoosoonoonēē nyoo kiimaa-ir Siimnyōn akiinyoolchinii /kee-ir saayitiinoonēē kutuup ātēpēēng'waang'? (kii-iitō 44-46)
9. Nee tukun ārēeny choo kiimwoochi :Yēesu chēēpyoosoonoonēē? (kii-iitō 48, 50)
10. Kiimwoochi keey nee :tooyeek walak? (kii-iitō 49)

Ng'ālyoon nyēpō lēt: Kiimārēy :Yēesu kung'uuti Pariisaay nkōō chiich aka tōkōl nyoo kiimii kaayoonēē wōloo lēē choomnyoot nyoo chōōnēē mukulēr nyoo tiliil, kiimārēy mpō kung'uuti kilē kiimaakumukuulmēt inyeentee, wōloo nyuun kiiting'ēy kaamuuka kunyoochi piich kaat ng'ōōki. Paani kiinyōōchinii piich kaat ng'ōōki ku kiimārēy kusōwu piich kilē Iriin inyeentee āmu Iriin ākityōōn nyoo muukēy kunyōōchi piich kaat. Kuumuukēy :achaan kēēnyōōwēēch kaat ng'ōōkiichoch nee kiriichi inyeentee kupunuunō saayat nkōō kēēmētō ng'ōōki.

Saayat: Koonkēy Iriin āmu kiiyōōku Yēesu sikunyōōwēēch kaat ng'ōōkiichooch. Āsoomiin inyoowoon kaat ng'ōōkiichuuch chook aa-ir ānkēt nta kimoonkēt. Lēē nyoonēē.

KĀRKĒĒYIN NYĒPŌ PĀLIIN NKŌŌ KIYI NG'UUTUUY

Luuka 8:1-15

Taayuu: Kiichāmchi :Yēesu piich kipāyiisyēēchi inyeentee. Kiing'āloolchini saayiitiis walak tuupiichiich choo kiichāmēy. Kiimārēy :Yēesu kung'uuti pichoochēē kiituupēy wōloo kiinyoolchiintooy kitaakta ng'aleechiich. Mā chiich tōkōl nyoo lēēlii ārānēy :Yēesu ku yēēy lōkōr.

Saa: Soomō Iriin kuutoorētīn inēēt keey ng'ālyoontooni imii isoomānēy aniinee.

Soomana āsip ārēeny: Luuka 8:1-15

Tēēpuutyēē nyoo ōōw: Karkeey nkōō nee kāsuryoontee nkōō ātiintyoontooni akiipkootēē kilē ng'oo pāliintee? (kii-iitō 11)

1. /Kiikuusoop Maaryaa Maktaleena nkōō kōrōōy nee? (kii-iitō 2)
2. Kii-irchinii nee :chēēpyoosoochoochēē Yēesu? (kii-iitō 3)
3. Kii-am nee kāsuryoontēē nyi kiichinchi aree nkōō kārkeeyin nyēpō pāliin? (kii-iitō 5)
4. Kii-am nee :kāsareek chu kiichinchi wōloo mii korin? (kii-iitō 6)
5. Kii-am nee :kāsareek chu kiichinchi wōloo mii katōōyi? (kii-iitō 7)
6. Kii-am nee :kāsareek chu kiichinchi nyung'wēny choo kāroomēēn? (kii-iitō 8)
7. Ng'uutuuy nee :kāsuryoon nkōō kārkeēyini ? (kii-iitō 11)
8. Ng'oo choo chuchuukiisyēy paani kanyōōru ng'al choo kōrōōmēēn? (kii-iitō 13)
9. Kir nee nyoo irēē nkōō piich choo irēy tukun choo pāypooyēy akwaaneek, ting'ēy rōōpiyō chaa chaang' nta kuuwāriisyēy kitya? (kii-iitō 14)
10. Kir nee nyoo yēēy lōkōr choo kāroomēēn chēpō pāyuunātoo Iriin? (kii-iitō 15)

Ng'ālyoon nyēpō lēt: Kiipāyiisyēērō :Yēesu pārooyin nyoo ōōw kuuneet kiineetanichiich nkōō tuupiichiich akipō pāyuunātoo Iriin. Kii nee teer :piich ng'aleepō Yēesu, ku kiitaak nkōō oortin choo ng'uloong'ulēy. Kiinkēt :Yēesu kilē mā chiich aka tōkōl nyoo rānēy akutas taay kutuup inyeentee. Kiinkēt mpō kilē

akwaaneek choo kiiran akumurta kunyōōruuy pēēruur nyoo ōōw nkōō pāyuunātoō Iriin. Nyoolchinēēch keenama kukaraam ng'ālyoontoo Iriin mpō nēē kupuntēērō tukun choo kōrōōmēēn, aku nyoolchineech mākitiirēē keey rōōpiyō nta ku tukun chēpō lala. Nyoolchinēēch kēēryoonchēē kukaraam akeekirinta Syeetani nēē mārēy kuuchuunyēēch nkōō wōli mii Iriin.

Saayat: Iriin toorētoon atas taay āmoong'uun mpō paani kōrōōmō ng'ala. Āmārēy āyi lōkōr chaa chaang', toorētoon Iriin aneet keey āsōwu ng'ālyoontēeng'uung'. Lēē nyoonēē.

CHOO TUUPCHŌ NKŌŌ YĒĒSU

Luuka 8:16-21

Taayuu: Kii-it keey Yēēsu kilē akoong'o nyēpō piich choo āmchinii piri ng'ālyoontoo Iriin aku-irēy kir aka tōkōl nyoo nēētēēy keey.

Saa: Saaya kuyaat Iriin kaapkootuutēkuuk siisōwuu ng'ālyoonteenyiin

Soomana āsip ārēēny: Luuka 8:16-21

Tēēpuutyēē nyoo ōōw: Āmu nee /sikēēmārweech /keeyāpchii iit kukaraam ngal choo kitēērēy? (kii-iitō 18)

1. Āmu nee sikuutēnii: piich taayiit yoo toroor paani kaakuunaam? (kii-iitō 16)
2. Mii kir nyoo kuumuukēy keewung'amātooku? (kii-iitō 17)
3. Āmu nee sikunyoolchinii :inyeen iteerta kukaraam? (kii-iitō 18)
4. Ng'oo nyoo kiichō kuurō Yēēsu? (kii-iitō 19-20)
5. Kiimwaarta ānō :Yēēsu paani kiimwoochi chiich kilē kiiwāsēy :inyeentee eeyeenyiin nkōō wēēchiikwaak? (kii-iitō 20-21)
6. Kiimwa :Yēēsu kilē ng'oo eeyeenyiin nkōō wēēchiikwaak? (kii-iitō 21)

Ng'ālyoon nyēpō lēt: Kiimwooru :Yēēsu kilē tuupcheenichiich ku akwaaneek choo tēērēy ng'ālyoontoo Iriin aku-ir. Kuuree :Yēēsu akwaaneek eeyenyiin nkōō wēēchiikwaak. Imuukēy mpō ilēku akoong'o nyēpō tuupcheenichiich aniinee paani kēētē sāpoontāng'uung' kulēku Kiptaayaanteeng'uung' nkōō Sāruuniintēeng'uung'.

Saayat: Kiptaayaan Yēesu toorētoon acham ng'ālyoonteeng'uung' akaateer saayiit aka tōkōl paani /ku-āmtooy si nēē ng'at āmāng'iisyō kilēē makēēng'uung'. Lēē nyoonēē.

YOOMĒT NYOO ŌŌW NKŌŌ PĒR!

Luuka 8:22-25

Taayuu: Kiisooop :Yēesu piich chaa chaang' nkōō oor' nyēpō kwōng'uut. Kii nēē-ir kilēē nyoonēē kuuran :piich chaa chaang'inyeentee. Tookēy piich ng'ālyoontoo Yēesu nkōō oortin choo ng'uloong'ulēy. Kimwoochinii piich walak akipō kir aka tōkōl nyoo kiiki-irweech :Yēesu.

Saa: Saaya Iriin kuutoorētīn sōwuu kiyi keeneet keey.

Soomana āsip ārēēny: Luuka 8:22-25

Tēēpuutyēē nyoo ōōw: Muukēē kiikiichaas :Yēesu nkōō paantanyiin, wōloo nyuun nee kir aka nyoo ipkootēē kilē kii-ir inyeentee kuru kimii yoomēt nyoo nyikiis?

1. Kiilaang' Yēesu mēēlii nkōō ng'oo? (kii-iitō 22)
2. Kiimwa :Yēesu kilē loong'ēy mēēlii akupa ānō? (kii-iitō 22)
3. Kii-ir nee :Yēesu paani kiimii kitiltooy araaray? (kii-iitō 23)
4. Nee kir nyoo kii-ira paani kiimii :Yēesu rwoon? (kii-iitō 23)
5. Kiiteerta ānō: kiineetanik paani kiirō kilē kiimii sāpoonweekwaak yaa ra? (kii-iitō 24)
6. Kii-ir nee :Yēesu paani kiikuung'eet? (kii-iitō 24)
7. Ng'oo nyoo kiikar :Yēesu koong' kupootō yoomēt? ((kii-iitō 25)
8. Kii āmu nee sikukar :Yēesu koong' kiineetanichiich? (kii-iitō 25)
9. Kiiteerta ānō :kiineetanik akipō kwōng'uut nyi kiirō? (kii-iitō 25)
10. Kii āmu nee sikumwa kilē "Ng'oo nyi?" (kii-iitō 25)

Ng'ālyoon nyēpō lēt: Kiikaalyanaat Yēesu mpō ntā kiimii yoomēt nyoo ōōw. Kiikaakumwoochi :inyeentee kiineetanichiich kilē ki-itēy kamasta nyiinō aka wōloo nyuun, kiitē kimanang' kitya kaaraneeng'waang' nyoo maamuukēy kukiringta tukun choo kōrōōmēēn. Iriin ākityōōn nyoo pāyuuy yoomēt, kiimii

kiineetanik kuutyāmēy kuuran kilē Yēēsu ku Iriin. Mārweech :achaan tōkōl kēēsōwu kilē mii kaalya mpō nkōō kwēēn nyēpō māng’oot nyoo kōrōōm. Irānēy :inyeen itiirēē keey inyeentee?

Saayat: Kiptaayaan Yēēsu, toorētoon ātiirēēniin keey mpō nee mii tukun choo iron āwāriisyō aku kōōnān ng’woonin. Āmārēy kaalyeeng’uung’. Lēē nyoonēē.

KUUSOOPĒY :YĒĒSU CHIICH NYOO KIITING’ĒY TOOMIRMIIRĒY CHAA RAACHEEN

Luuka 8:26-39

Taayuu: Ting’ēy :Yēēsu kaamuuka ku-on toomirmiirēy chaa raacheen nkōō sāpēēnyoon nta ku choo lēkitēēnēēch. Maapāypāychi :piich tōkōl kwōng’uut choo kii-ir Yēēsu, kiisas walak akuuwar. Nyoolchinii /kēēkiil keey nēē /kimārēy /kēētuup Yēēsu.

Saa: Saaya Iriin kuriipin nkōō kaamuukeenyiin paani isyookēy siruutēchu akuuneetin kir nyoo wō kuutoorētiin nkōō pērēētus choo pkoonēy.

Soomana āsip ārēēny: Luuka 8:26-39

Tēēpuutyēē nyoo ōōw: Ting’ēy ng’oo kaamuuka kusiir toomirmiir chaa raacheen? (kii-iitō 32, 33)

1. Kiituuyo nkōō ng’oo :Yēēsu paani kiirēkuunō mēēlii? (kii-iitō 27)
2. Kiimwa :toomirmiir chaa raacheen nkōō oor’ nyēpō chiichoonēē kilē ng’oo Yēēsu? (kii-iitō 28)
3. Kii-irta nee :Yēēsu toomirmiireechoochēē raacheen? (kii-iitō 29)
4. Kiimwoochi nee :Yēēsu chiichoonēē kiikiinam toomirmiir chaa raacheen? (kii-iitō 30)
5. Kiisoom nee :toomirmiirēchoochēē raacheen Yēēsu kilē sima-ir? (kii-iitō 31)
6. Kiiyooytō :Yēēsu toomirmiirēchoochēē kupa ānō? (kii-iitō 32)
7. Kii-ir nee :pichoochēē kiiriipēy nkurwētiin? ((kii-iitō 34)
8. Kir nee nyoo kii-ir :piipō Karesene lētuun akipō chiichoonēē kiikiinam toomirmiir chaa raacheen? ((kii-iitō 37)
9. Kiimwoochi :Yēēsu chiichoonēē ku-ir nee? ((kii-iitō 39)

10. Kiing'uuti :muroonoonēē choomnyeenyiin Yēēsu nkōō oor nyoo lēē nee? ((kii-iitō 39)

Ng'alyoon nyēpō lēt: Muukēy ku-oon :Yēēsu toomirmiirēy chaa raachaan nkōō sāpoon nyēpō piich choo pkoonchinii inyeentee sikuutoorēt. Ting'ēy kiimnān nkōō kaamuuka nyoo wālēy sāpoonwēchook nee kitiirēē keey :inyeentee. Mārēy kēēpāyiisyēēchi :achaan akeekoonyit. Mā :chiich aka tōkōl nyoo chāmēy Yēēsu nta kusōwu akipō inyeentee. Nyoolchinii kuwō kumwoochi :chiich akwaaneek choo mēēnkēt inyeentee. Kiiwaraka chiichoonēē /kiikuusoop akuwō kumwaarta mpō ntā kiimārēy kutēpō kipootō Yēēsu nkōō kiineetanichiich.

Saayat: Toorētoon Yēēsu ālēku nyoo ākoonyitēy ng'ātuutēkuuk mpō ntā moomārēy a-ir kiyi imwoorwoon. Lēē nyoonēē.

KIIWAL :YĒĒSU SĀPOON NYĒPŌ PIICH ĀRĒĒNY CHOO KII-IIMĒY KEYY

Luuka 8:40-56

Taayuu: Nyoolchinēēch :achaan kēēting'ēy kaarana nee kimārēy kēēnyōōru pēēruur kuchoonō wōli mii Iriin. Wāleech Iriin, akuutyaakeech nkōō kāāwāriisyō nkōō kōrōōytiin.

Saa: Soomō: Yēēsu kuutoorētīn siitiirēē keey inyeentee kitya kupunuunō kiyi inēētēy keey.

Soomana āsip ārēēny: Luuka 8:40-52

Tēēpuutyēē nyoo ōōw: Mwooruu kee, kii-irchi nee Yēēsu pichweechu akoong'o akoong'o ? ((kii-iitō 47, 56)

1. Kiisoom nee: Chāyrō Yēēsu? ((kii-iitō 42)
2. Ng'oo nyoo kiichoonō patar nyēpō Yēēsu nkōō yi kiimii piich chaa chaang'? ((kii-iitō 44)
3. Kiichō ku-ir nee: chēēpyoosooni kiimnyaanaat patar nyēpō Yēēsu? ((kii-iitō 44)
4. Kii-ira nee nkōō Yēēsu paani kiisoop chēēpyoosoonoonēē? ((kii-iitō 46)
5. Kii-ir nee chēēpyoosoonoonēē paani kiiteep Yēēsu kilē ng'oo nyi kanam

inyeentee? ((kii-iitō 47)

6. Kiimwoochi nee Yēēsu inyeentee suku-ir? ((kii-iitō 48)

7. Paani kii-iriisyoot chweechu tōkōl, ku lōkōōy nee chaa raacheen choo kiinyōōru Chāyrō kupkaana katanyiin? ((kii-iitō 49)

8. Kiimwoochi nee :Yēēsu piich chu kiiriiryēyii nkōō saang'? ((kii-iitō 52)

9. Kii-ira nee paani kiinam :Yēēsu ēēruu chēēpoonēē akumwoochi kilē ng'eeta? (kii-iitō 55)

10. Nee tukun ārēēny choo kimwoochi Yēēsu sikiipō chēēpoonēē ku-ir? ((kii-iitō 55/56)

Ng'ālyoon nyēpō lēt: Kiitaak :piich ng'aleepō Yēēsu nkōō oortin. Rānēy walak kilēē Chāyrō, kuuran walak kilēē chēēpyooso nyoo kiimnyaanaat nyoo kiirō tukun chēpō kwōng'uut. Kung'eet walak kurōōrēchi Yēēsu nkōō kiineetanichiich. Kuung'ēt :achaan man kilē nkēt Yēēsu kir nyoo mii mootinēchooch akuunkēt mpō nēē kiirānēy :achaan inyeentee. Nyoolchinēēch pērēētuu aka tōkōl kēēkoonyit kir aka tōkōl nyoo mwoorweech kee-ira. Kōōnēēch mpō kaalya paani kanameech koowāriisyō. Mwoochi inyeentee kōōnkēy!

Saayat: Yēēsu toorētoon āsōwu kaalyeeng'uung' paani āmii nyaril nta amnyaanaat. Koonkēy āmu ichāmoon akiikoonoon tukun choo āmārchinii keey. Toorētoon ātiirēēniin keey mpō paani kanaman kōrōōy nyoo kōrōōm. Lēē nyoonēē.

9

KIIYOOYTŌ :YĒĒSU KIINEETANICHIICH TAMAN NKŌŌ ĀRĒĒNY KUTING'ĒY KIIMNĀN NKŌŌ KAAMUUKA

Luke 9:1-9

Taayuu: Kiikuur: Yēēsu kiineetanichiich taman nkōō ārēēny akuuyooytō kupa kunyōōru piich walak aku-āmchi lōkōōy choo kāroomēēn akipō pāyuunātoo kaa Iriin, akuusoop choo mnyoonchēyii akuutyaak choo kiinam toomirmiir chaa raacheen.

Saayat: Saaya :Iriin kuutoorētīn siisōwuu ng'alēēpō Yēēsu chu kiimwoochi

kiineetanichiich taman nkōō ārēēny.

Soomana āsip ārēēny: Luuka 9:1-9

Tēēpuutyēē nyoo ōōw: Kiiyooytō :Yēēsu kiineetanichiich taman nkōō ārēēny kupa ku-ir nee? ((kii-iitō 2)

1. Kiitē nee :Yēēsu kiineetanichiich taman nkōō ārēēny? ((kii-iitō 1)
2. Kiiyooytō :Yēēsu kiineetanichiich taman nkōō ārēēny kupa ku-ir nee? ((kii-iitō1-2)
3. Kiimwoochi :Yēēsu kiineetanichiich kuuchēp keey nkōō oor nyoo lēē nee? ((kii-iitō 3)
4. Kiimwoochi :Yēēsu kiineetanichiich kitēptō ānō paani mii ku-āmtootēy lōkōōy choo kāroomēēn? ((kii-iitō4-5)
5. Kii āmu nee sikumwoochi :Yēēsu kiineetanichiich kupeera wōli katay : piich kutaak akwaaneek? ((kii-iitō5)
6. Kii-irēy nee :kiineetanichoochēē paani kiipēērēē kēēstoon ākōy kēēstoon? ((kii-iitō6) Kii āmu nee sikukwōng' :Ērōōtē akipō kiyi kii-ira? ((kii-iitō7)
7. Seemseem nee choo /kiikimwoorootēy akipō kilē ng'oo Yēēsu? ((kii-iitō 7-8)
8. Kii āmu nee sikukōrōmiit nkōō :Ērōōtē kuuran kilē Yēēsu ku Choowaana koopootiisāniin nyoo kiing'eeta meerat ? ((kii-iitō9)
9. Ipkōōtēē kilē āmu nee sikiityāmēy Ērōōtē kilē kuurō Yēēsu? ((kii-iitō 9)

Ng'ālyoon nyēpō lēt: Mārēy :Yēēsu chiich aka tōkōl kuteer akipō Pāyuunātoo kaa Iriin /akeetyaak nkōō toomirmiir chaa raacheen, kōrōōtyiin nkōō mnyoonwēy. Kiiyooytō tuupiichiich kupa kamasta aka tōkōl, kēēstoon ākōy kēēstoon ku-amta lōkōōy choo kāroomēēn akuusoop akwaaneek choo mnyoonsoot. Mpō :inyeen ran Yēēsu wēēroo ku imuukēy ilēku kooyooytooyiin nyoo imwoochiini piich walak akipō Pāyuunātoo Iriin.

Saayat: Koonkēy :Iriin āmu kiiyooytoon āwō amwaarta akipō Pāyuunātoo Iriin. Kōōnoon nyikanat nkōō kaamuuka amwaarten. Lēē nyoonēē.

KIPĀYĒY :YĒĒSU PIICH ĒLUP MUUT

Luuka 9:10-17

Taayuu: Kōōnēech :Yēesu tukun choo kimārchinii keey pērēētuu aka tōkōl. Riireeneech inyeentee paani āmēech piri nta nee kiikichoosyō. Muukēy ku-ir kir nyēpō koomānuut kupunuunō tukun choo ng'ērīn choo kuutēnii :achaan.

Saa: Mwoochii :Iriin kuutoorētīn siisōwuu kiyi inēētēy keey aniinee.

Soomana āsip ārēēny: Luuka 9:10-17

Tēēpuutyēē nyoo ōōw: Kiing'aang' :Yēesu kilē ting'ēy ng'oo kaamuuka nkōō kooniyit nkōō taayuu piich? ((kii-iitō 16)

1. Kii-ir nee :pichoochēē chaang' paani kiiteer kilē kiimii Yēesu Peetsaayta? ((kii-iitō 11)

2. Kii-ir kilē nee :Yēesu nkōō kwēēnuu pichoochēē chaang'? ((kii-iitō 11)

3. Kiipa kunyōōru :kiineetanik Yēesu āyu? ((kii-iitō 12)

4. Kir nee nyoo kiimārēy: kiineetanik Yēesu ku-irchi piikō? ((kii-iitō 12)

5. Kiiwālchi :Yēesu kiineetanik kilē nee? ((kii-iitō 13)

6. Tyaan āmiisyō nyoo kii-āpchi :kiineetanik Yēesu? ((kii-iitō 13)

7. Kii ata murēn choo kiimārēy āmiisyō? ((kii-iitō 14)

8. Kii-irta nee :Yēesu āmiisyye paani kiikaakitēpiisyō: piikō ng'wēny? ((kii-iitō 16)

9. Kii-ira nee paani kiikoonyit :kiineetanik Yēesu akuutē piich āmiisyō ? ((kii-iitō 17)

10. Kiiteerta ānō :piich? ((kii-iitō 17)

Ng'alyoon nyēpō lēt: Muukēy :Yēesu ku-ir kwōng'uut choo ng'uloong'ulēy. Muukēē /kēēpāyiisyēērēē āmiisyō nyoo lēē kiitēēn nkōō pērēētuus chaa chaang' nēē pāyweech :Yēesu kipāyuuy. Kōōnēech :Yēesu tukun tōkōl choo kimārchinii keey. Nēē kuutō :achaan sāpoonwēchooch, kupāyiisyēērēē akipō tōrōōrnātēēnyīn.

Saayat: Koonkēy :Yēesu āmu kēēkoonoon kir aka tōkōl nyoo āmārēy, pāyiisyēērēēnoon. Lēē nyoonēē.

KIWĀLĒĒ :PŌŌRPŌ YĒĒSU

Luuka 9: 28-36

Taayuu: /Kiiking'uutu :Yēesu kilē wēeroo Iriin paani kiimii tulwō. Kiinkēt :Yēesu kilē wō kumēērēy akung'eet kutoomō ku-ira. Kiimii :Muusa nkōō Eliicha kipootō Yēesu.

Saa: Mwoochii :Iriin kuutoorētīn paani inēētēy keey tukun chēpō man aniinee.

Soomana āsip ārēēny: Luuka 9:28-36

Tēēpuutyēē nyoo ōōw: Ipkooteē kilē āmu nee simaang'alaal chiich aka tōkōl akipō kiyi kiirō pērēētūnoonēē? ((kii-iitō 36)

1. Kiimut mpō ng'oo :Yēesu tulwō kipa kusa? ((kii-iitō 28)
2. Kii-am nee Yēesu paani kiisooyēy? ((kii-iitō 29)
3. Ng'oo :chu kiipka aking'āloolchi Yēesu paani kiisooyēy? ((kii-iitō 30)
4. Kiimwoochi nee :Muusa nkōō Eliicha Yēesu? ((kii-iitō 31)
5. Kiirō nee :Pēētērō nkōō choorwayiichiich paani kiing'ēētyō? ((kii-iitō 32)
6. Kiimārēy ku-ir nee :Pēētērō paani kiimii kupēētii murēchoochēē ārēēny? ((kii-iitō 33)
7. Kiira nee paani kiing'āloolēy :Pēētērō? ((kii-iitō 34)
8. Kiingalaal: ng'oo kupunuunō pooltō? ((kii-iitō 35)
9. Ng'oo nyi nyoolchinii kuteer :kiineetanik? ((kii-iitō 35)
10. Kii nēē kaakuchō :kuutiinoonēē ku-ira nee?

Ng'ālyoon nyēpō lēt: Kiirō :kiineetanik sōmōk Yēesu nkōō tōrōōrināteenyiin pō ākōy. Kiiryoonchinii :Muusa nkōō Eliicha ng'ātuut nkōō ōrkooy chēpō piipō Yaawuut. Kiimārēy :Iriin piich kuteer weeriinyiin Yēesu. Kiinkēt :Muusa nkōō Eliicha akipō meeraa Yēesu aku kiing'alaala nkōō Yēesu akipō mēērēēnyiin akuumuukēē nyuun kilē kiicheer inyeentee akipō mēērēēnyiin nyi kiimii kuwō kuchoonēy. Nyoolchinēēch :achaan keecheera keey akipō pērēētūus choo pkoonēy,akēēlēku piich choo kōōnuuy keey kuutoorēt piich walak.

Saa: Iriin toorētoon pērēētūu aka tōkōl ateer iit akookoonyit Yēesu. Kimeekany kuupooton koonēētūut walak, wōloo nyuun, kanyaan ātiirēē keey ng'ālyoontēng'uung' ākityōōn. Lēē nyoonēē.

KIISOOP :YĒĒSU LAAKWA NYOO LĒĒ WĒĒRII NYOO KIINAM TOOMIRMIIR NYAA RA

Luuka 9:37-45

Taayuu: Kiing'uutu :Yēesu kilē ting'ēy kaamuuka kuupēl toomirmiir chaa raacheen paani kiisopiisyō. Rōōtēy :Yēesu kaaraana nyēpō kiineetanichiich, aku nyuun mapaypay nēē māting'ēy inyeentee tuupiichiich kaarana.

Saa: Mwoochii :Iriin kuriipin paani inēētēy keey akipō kaamuuka nyēpō toomirmiirēy chaa raacheen.

Soomana āsip ārēēny: Luuka 9:37-45

Tēepuutyēē nyoo ōōw: Kaamuuka nyoo lēē nee nyoo kiing'uuti :Yēesu piich?
((kii-iitō 42)

1. Ng'oo :nyoo kiinyōōru Yēesu? ((kii-iitō 37)
2. Ng'oo : nyi kiikuur Yēesu nkōō kwēēn nyēpō piich chaa chaang'? ((kii-iitō 38)
3. Kir nee nyoo kii-iimēy muroonoonēē? ((kii-iitō 38/39)
4. Kiinamta ānō :toomirmiir nyaa ra kaarachiintoo muroonoonēē? (kii-iitō 39)
5. Kir nee nyoo kii-ir :Yēesu kunareek akipō chiich aka tōkōl? (kii-iitō 41)
6. Kii-iira nee paani /kiikumutini Yēesu wēēroonēē? (kii-iitō 42)
7. Kii nee rook nyoonēē ku-ir nee :Yēesu? (kii-iitō 42)
8. Kii-āptō ānō :piich kwōng'uutyoonoonēē? (kii-iitō 43)
9. Koonēētiisyō nyoo lēē nee nyēpō koomānuut nyoo kiineet :Yēesu kiineetanichiich? (kii-iitō 44)
10. Kii āmu nēē simaasōwu :akwaaneek kiyi kiimwoochinii Yēesu? (kii-iitō 45).

Ng'ālyoon nyēpō lēt: Ting'ēy :Yēesu kaamuuka kuupēl toomirmiirēy chaa raachen aku kiimaating'ēy pērēētuus walak :kiineetanichiich kamuuka nyoo muukēy kuutoorēt piich walak. Mārēy :Yēesu kunyōōru piich kaarana nkōō wōli mii inyeentee kilee wēēroo Iriin wōloo nyuun, maapāypāychi kiineetanichiich āmu kiimaating'ēy kaarana nkōō wōli mii inyeentee. Kiitoowu kuuneet akwaaneek ākipō meereenyiin nyi kiimii kuchoonēy wōloo nyuun maasōwu kiineetanichiich. Muukēē kilē kii-am ng'ēēlō pērēētuusyēchweechu. Kunyuun nkēt :inyeentee paani

āmēēch ng'ēēlō.

Saayat: Yēēsu, toorētoon aran kilē man inyeen. Āmārēy kaamuukeeng'uung', nyooyeetaap kaat nkōō kiimnān soopēl toomirmiir chaa raacheen nkōō sāpoontanyuu. Āmārēy ākoonyitin, lēyyē toorētoon. Lēē nyoonēē.

NG'OO NYI ŌŌW?

Luuka 9:46-48

Taayuu: Nkēt :Yēēsu kaapkootuut chēpō piich aku riipēy chiich aka tōkōl. Sāsēy :piich choo mēēnāy aku māmārēy tuupiichiich kumārchi keey ōōwin nkōō pāyuunāt.

Saa: Soomō Iriin kuusyaak mukulērtāng'uung'aniinee akuutoorētīn paani isyookēy ng'aleechu.

Soomana āsip ārēēny: Luuka 9: 46-48

Tēēpuutyēē nyoo ōōw: Kiichō :Yēēsu ng'wēny kuuryoontō ng'oo ? (kii-iitō 48)

1. Kir nee nyoo kiimooyēchinii kiineetanik? (kii-iitō 46)
2. Kii-āmu nee sikuutō :Yēēsu laakwa nyaa manang'kutēpō nkōō inyeentee? (kii-iitō 47)
3. Ipkooteē kilē āmu nee sikuchāmēy :Yēēsu laakooy?
4. Nēē kitaak :achaan laakwa nkōō kaarinaa Yēēsu ku kaakitaak ng'oo nkōō sāpoonwēchooch? (kii-iitō 48)
5. Paani kaakitaak :achaan Yēēsu nkōō sāpoonwēchooch ku kaakitaak? (kii-iitō 48)
6. Man ng'oo nyoo ōōw? (kii-iitō 48)
7. Kir nee nyoo nēētēēch ng'ālyoontooni akipō mēēnāt nkōō makat nyoo mārēy :chiich kilē ntā ōōw kusiir piich walak?

Ng'ālyoon nyēpō lēt: Nkēt :Yēēsu kaapkootuutēchooch akuunkēt mpō kukaraam wōloo kilēē :achaan. Ōōw :Yēēsu nyoo nyoolchinēēch kēētiirēē keey akēēloosuu inyeentee nyoo mā kaamuukēēnyoon nta ku chiich. Nēētēēch inyeentee wōloo kuumining'iititooy keey, akēēriip laakōōy nkōō oor nyaa karaam āmu pō kāmōonāuut :laakōōy nkōō taayuunyiin.

Saa: Iriin, toorētoon āmāng'iisyō nkōō kaamining'iitō nyēpō keey aku moo-āp keey kilē āchō kaykay kusiir piich walak. Toorētoon ākoonyit piich tōkōl kutiing' mpō laakooy. Lēē nyoonēē.

10

KUUYOOYTOOY :YĒĒSU KIINEETANICHIICH TĀMĀNWOOK TISAP NKŌŌ ĀRĒĒNY

Luuka 10:1-12

Taayuu: Riirēēy :Yēēsu piich tōkōl mpō choo toomō kuuran inyeentee. Mārēy piich tōkōl kusōwu inyeentee. Pāyiisyēērēē :Yēēsu piich choo mātēēruunoot kaariikwaak nkōō kōōrēē sikumwaarta lōkōōyichiich.

Saa: Mwoochii Iriin kuutoorētīn sōwuu kiyi inēētēy keey.

Soomana āsip ārēēny: Luuka 10:1-12

Tēēpuutyēē nyoo ōōw: Paani /kiikuuyooytō :kiineetanik tāmānwook tisap nkōō ārēēny ku kiipa akipō ng'oo? (kii-iitō 1)

1. Kiiyooytō :Yēēsu kiineetan choo lēē ata kupa ku-amta lōkōōy choo kārōōmēēn akuusoop choo mnyoonchēyīi? (kii-iitō 1)

2. Kiipeera ata :kiineetanik? (kii-iitō 2)

3. Kiikarkeey :kaswaanoonēē pō mukuulir nkōō nee? (kii-iitō 2)

4. Nyoochinii /kēēmwoochi ng'oo kuuyooytō kipāyiitiin chaa chaang'? (kii-iitō 2)

5. Nyoolchinii :kipāyiitiin chēpō Iriin kutēptō ānō? (kii-iitō 3)

6. Tukun nee choo kiimānyoolchinii :kipāyiitiin ku-āp? (kii-iitō 4)

7. Āmu nee sikunyoolchinii :kipāyiitiin chēpō Kristō kutaak kir aka tōkōl nyoo kēētō :piich choo kataak akwaaneek? (kii-iitō 7)

8. Pēēruurēy nee nyoo tēnii :kipāyiitiināk piich choo tookēy akwaaneek? (kii-iitō 8, 9)

9. Ng'ālyoon nee nyēpō koomānuut nyoo nyoochinii :kipāyiitiināk

kimootoochi piich choo tookēy akwaaneek? (kii-iitō 9)

10. Ng'ālyoon nee nyoo /kiikimētoochinii akwaaneek choo maataak kipāyiitin? (kii-iitō 11, 12)

Ng'ālyoon nyēpō lēt: Mārēy :Iriin kilē kunyōōru kipāyiitiinēchiich mālāk nyoo yāmēy keey. Mārēy :akwaaneek choo /kipāyiisyēēchinii kuutō kipāyiitiinēkwaak mālāk nyoo yāmēy keey. Mārēy :Iriin piichiich kuteer akutaak ng'ālyoonteenyiin pō koomoong'uunō, kiisoopō nkōō sāruunō, āmu tiliil :Iriin ku mā murtoochinii piichiich nēē tay inyeentee aku mā murtoochinii mpō kipāyiitiinēchiich nēē tay inyeentee.

Saayat: Iriin, toorētoon āpāyiisyēēwuun, akoomwoochi piich walak akipō inyēēn. Toorētoon āmāng'iisyō māng'oot nyoo tiliil nkōō wōloo mii piich, akiikanyaan āpāyiisyō nkōō nyikanat nkōō kaamuuka. Lēē nyoonēē.

PĀYPOOYŌ NYOO KUNYŌŌRUUY NĒĒ /KIPĀYIISYĒĒCHI IRIIN

Luuka 10:16-20

Taayuu: Kunyōōruuy pāypooyō nēē kupāyiisyēēchi Iriin. Kuunkēt man kilē riipēēch Iriin nkōō wōloo mii Syeetaani, aku ting'ēy Iriin kaamuuka kusiir Syeetaani.

Saa: Soomō Iriin kuutoorētīn sōwuu kiya inēētēy keey aniinee akuriipin nkōō wōloo mii rāyiityō.

Soomana āsip ārēēny: Luuka 10:16-20

Tēēpuutyēē nyoo ōōw: Kir nee nyoo nyoolchinii kēēpāypāychi kitya? (kii-iitō 20)

1. Mii akipō :ng'oo kipāyiityoon nyoo rānēy Iriin? (kii-iitō 16)
2. Nēē tay :piich piich choo rānēy Iriin ku katay ng'oo? (kii-iitō 16)
3. Kiiteerta ānō :kipāyiitiinēchoochēē lēē tamanwook tisap paani kiiwārākiisyō wōli mii Yēēsu? (kii-iitō 17)
4. Kir nee nyi kii-ir :akwaaneek kipāypāyiituuy kitya saayiitiinoonēē? (kii-iitō 17)
5. Kii nēē oon :kipāyiitiinēk toomirmiir chaa raacheen ku ng'oo nyi

/kiikumining'it? (kii-iitō 18)

6. Kaamuuka nyēpō :ng'oo nyi kiitē :Yēesu kipāyiitiinēk? (kii-iitō 19)

7. /Kiikuutō kipāyiitiin kaamuuka ku-ir nee nkōō kaarinaa Yēesu? (kii-iitō 19)

8. Riipēt nyoo lēē nee nyoo kiiyoomiisi :Yēesu kipāyiitiinēchiich? (kii-iitō 19)

9. Kir nee nyoo āpēy Yēesu kilē pō koomānuut kusiir kaamuuka nyoo /kuupēlēy toomirmiir chaa raacheen? (kii-iitō 20)

10. Ara siraat kaarinēēng'uung' nkōō kiitapuu sāpoon āmu irānēy Yēesu?

Ng'ālyoon nyēpō lēt: Māchāmēy :Iriin piich choo tāyēy wēēriinyiin nta ku kipāyiitiinēchiich. Chāmēy kilē kuutyookiisyō piich nkōō wōloo mii rāyiityō akupaypay nēē kuupēl:achaan Syeetaani. Tēnii :Yēesu piichiich kaamuuka kuupēl ng'ōōki. Riipēy akwaaneek nkōō rāyiityō. Māmērēēch kēēpāypāyiituu akipō kir nyoo kii-irchinii inyeentee wōloo nyuun mārēēch kēēpāypāyiituu āmu kupka laakōōchiich.

Saayat:Koonkēy Iriin āmu kiisāruunēēnoo rāyiityō nkōō ng'ōōki. Toorētoon āpāyiisyēērō kaamuukeeng'uung' āpēl rāyiityō aku moowāriisyō. Pāyiisyēērēēnoon āmwoochi piich walak akipō sāruunēēng'uung', kaamuukēēng'uung' nkōō riireeneeng'uung'. Lēē nyoonēē.

KĀRKĒĒYIN NYĒPŌ CHIICH NYAA KARAAM NYĒPŌ SAMARIYA

Luuka 10:25-37

Taayuu: Mārēy :Yēesu kuwal wōloo kuupkootitooy :achaan akipō piich walak. Mārēēch kēēmāng'iisyēy nkōō oor nyoo ng'ulēy nkōō wōloo mii :piich choo mēērānēy inyeentee. Māmurtoochinii :Iriin piich choo irtooy keey.

Saa: Mwoochii Iriin kuwalin paani inēētēy keey aniinee.

Soomana āsip ārēēny: Luuka 10: 25-37

Tēēpuutyēē nyoo ōōw: Kiilēwēn ku-ir nee chiichōōnēē pō ng'ātuut akipō ng'aleechu kiimwoochi Yēesu? (kii-iitō 37)

1. Tēēpuut nyoo lēē nee nyoo kiiteep chiipō ng'ātuut Yēesu? (kii-iitō 25)

2. Kiimwaarta ānō nkōō nwookin :kōōnēētiintoonoonēē pō ng'ātuut ng'ātuutēk? (kii-iitō 27)
3. Kii āmu nee sikuwālu :Yēēsu tēēpuutyoonēēnyi karaam? (kii-iitō 28)
4. Tēēpuut nee nyoo kiiteep :inyeentee Yēēsu? (kii-iitō 29)
5. Kiiwālu kilē nee :Yēēsu tēēpuutyēē? (kii-iitō 30)
6. Kii-am nee chiichi pō Yāwuut kiimi aree kuwēēchinii keey? (kii-iitō 30)
7. Kir nee nyoo kii-ir :tisiin? (kii-iitō 31)
8. Ng'oo :aka nyoo maakusi koong' chiichoonēē kiikukōōtān? (kii-iitō 32)
9. Kii-irchi nee chiipō Samaariya chiichoonēē? (kii-iitō 34)
10. Mārēy :Yēēsu chiipō kookwō kutēptō ānō? (kii-iitō 37)

Ng'alyoon nyēpō lēt: Chāmēy :Yēēsu piich aku mārēēch :achaan kēē-irchi piich tōkōl tukun nkōō koonyit, choomnyoot nkōō riireena mpō ntā mākipka tilyay nkōō akwaaneek. Nkēt Yēēsu piich choo irtooy keey, nyoolchineech keechama piich walak mpō ntā māng'iisyēy nkōō or nyaa ng'ulaat nkōō āchoonēēch nta ku ng'ulaat kaaraneeng'waang'. Chāmēy :Yēēsu chiich aka tōkōl aku mārēēch achaan kēēng'uutuu.

Saayat: Yēēsu, toorētoon acham piich choo kolkolēēn. Āmārēy āmāng'iisyō kilēē inyēēn. Toorētoon simoomētō chiich nyoo mārēy kēētoorēt. Lēē nyoonēē

11

KUUNĒĒTĒY :YĒĒSU PIICH WŌLOO /KISOOYTOOY

Luuka 11:1-4

Taayuu: Mārēy :Iriin kunyōōru ramtaara nkōō āchoonēēch, wāluuy sōwuut aku mārēy kuupēēruur akwaaneek choo chāmēy inyeentee. Kārēy :ng'ōōki soowuutēchooch.

Saa: Soomō Iriin kuuneetin tukun chaa reelacheen akipō soowuut.

Soomana āsip ārēēny: Luuka 11:1-4

Tēepuutyē nyoo ōōw: Tilyaanti nyoo lee nee nyoo nyoolchinii kiting'ēy :achaan nkōō Iriin? (kii-iitō 2)

1. Ng'oo :nyi kiiwō kusoom Yēēsu kuuneet akipō saayat? (kii-iitō 1)
2. Ng'oo :aka nyoo kiineet kiineetanichiich akipō saayat? (kii-iitō 1)
3. Nyooluuy /keemwaarta ānō kaarinaa Iriin? (kii-iitō 2)
4. Nyoolchinii keesaa kilē nee akipō pāyuunātoo Iriin? (kii-iitō 2)
5. Nee tukun sōmōk chēpō koomānuut choo nyoolchinii kēēsoom Iriin paapa? (kii-iitō 3, 4)
6. Kir nee nyoo makaat /kee-ir /sikēēnyoowēēch kaat ng'ōōkiichooch? (kii-iitō 4)

Soomana āsip ārēēny: Luuka 11:5-13 (Kārēēyin nyēpō wōloo nyoolchinii /keesaayayta)

Tēepuutyē nyoo ōōw: Saayat nyoo lēē nee nyoo pāypāychinii :Iriin? (kii-iitō 8, 9,)

1. Kiiwō :chiich kaa choorwēēnyiin saayiit nyaa tyaan? (kii-iitō 5)
2. Kiimārēy nee :choorwee? (kii-iitō 5)
3. Kii āmu nee sikuwō :choorwoonoonēē ooro kwēēn? (kii-iitō 6)
4. Kiiteerta ānō chiichoonēē akipō kiing'eetaanoonēē pō ooro? (kii-iitō 7)
5. Āmu nee sikung'eet lētuun akuutoorēt choorwēēnyiin? (kii-iitō 8)
6. Nee tukun sōmōk choo nyoolchinii /kēē-irēy paani kusooyēy? (kii-iitō 9)
7. Kir nee nyoo irēē paani 'kākisoom', 'akeewas' nkōō saayat? (kii-iitō 10)
8. Muukēy kukoonēēch paapeenyoon nyēpō ng'wēny tukun choo kārōōmēēn paani /kākisoom? (kii-iitō 11, 12)
9. Kir nee nyoo kōōnēēch :paapēēnyoon nyoo mii parak nēē kisoom? (kii-iitō 13)

Ng'alyoon nyēpō lēt: Mārēy :Iriin kuupēēruurēēch, kunyiriitēēch toomirmiiryēēnyiin akunyoowēēch kaat ng'ōōkiichooch. Paani kakuukiilchi keey saayat, kuupēēruurēēch :inyeentee, kunyoowēēch kaat ng'ōōkiichooch akuriipēēch. Nyoolchinēēch kēēnyoochi kaat piich walak. /Kiikoonyitēy kaarinaa Iriin akutāsēy taay ku-ōōwiituuy pāyuunāteenyiin paani kakusaa.

Saayat: Apoo nyoo mii kipsēnkēt, koonkēy akipō kir aka tōkōl nyoo i-rwēēch kipunuunō soomuutēchooch. Riipēēch nkōō wōloo mii rāyiityō. Kanyeek kēēsōwuu kilē imii :inyēēn pērēētuu aka tōkōl kupootō :achaan. Iriin

pāyiisyēērēnēēch sikēmwoochii piich walak akipō kaamuukēēng'uung' pō kwōng'uut nkōō riirēēnēēng'uung'. Lēē nyoonēē.

YĒĒSU NKŌŌ TOOMIRMIIR CHAA RAACHEEN

Luke 11:14-26

Taayuu: Yooytooy :Syeeetani toomirmiir chaa raacheen kunam piich wōloo nyuun, ting'ēy :Yēēsu kaamuuka kuupēl Syeeetani nkōō toomirmiirēchiich. Nyoolchinii kinyiryeech :Toomirmiir nyoo Tiliil sikēmāng'iisyēē kilē Yēēsu.

Saa:Mwoochii :Iriin kuriipin paani inēētēy keey akipō Syeeetani.

Soomana āsip ārēēny: Luuka 11:14-26

Tēēpuutyēē nyoo ōōw: Oor nyoo lēē nee nyoo kiing'uutuunō keey :Yēēsu kilē Iriin nyoo mā tukun chēpō kwōng'uut nkōō koonēētiisyō? (kii-iitō 17)

1. Kiinyariilta ānō :toomirmiiryoonoonēē chiichoonēē kiinam? (kii-iitō 14)
2. Kiilēku nee :chiichoonēē paani kii-onō :Yēēsu toomirmiir chaa raacheen? (kii-iitō 14)
3. Kir nee nyoo irēē nkōō kaaw nta ku kōōr nyoo mii pooryoot? (kii-iitō 17)
4. Kir nee nyoo muukēē ku-ira nee paani kāpooryēērō keey Syeeetani? (kii-iitō 18)
5. Kii-on kilē nee :Yēēsu toomirmiir chaa raacheen? (kii-iitō 20)
6. Kii-ira nee paani kii-on :Yēēsu toomirmiir chaa raacheen? (kii-iitō 20)
7. Nee kir nyoo irēē paani kāriip :chiich nyoo lēē nyakan katanyiin? (kii-iitō 21)
8. Kir nee nyoo irēē paani kāchō :chiich nyoo lēē nyakan kitya akupooryēērēē kaa chiichoonēē? (kii-iitō 22)
9. Kir nee nyoo irēē paani kāwēērō :chiich toomirmiir nyaa ra? (kii-iitō 24)
10. Irēē nee paani kēērēēru :toomirmiir nyaa ra akuchuut chiich nyoo manyiri :Toomirmiir nyoo Tiliil? (kii-iitō 26)

Ng'alyoon nyēpō lēt: Muukēy kuuyooytō :Syeeetani toomirmiir chaa raacheen kuchuut piich wōloo nyuun, ting'ēy :Yēēsu kaamuuka kitya. Ting'ēy :Yēēsu kaamuuka kusiir Syeeetani akuutēnii :inyeentee kaamuuka tuupiichiich.

Kinyōōruuy :achaan kaatyaaka nkōō wōli mii :Syeeataani paani /kakuunyiriiteech Toomirmiir nyoo Tiliil. Ting'ēy :Yēesu kaamuuka kusiir chiich aka tōkōl. Yēesu ku kiptaayaan nyēpō chiich aka tōkōl.

Saayat: Kiptaayaan Yēesu, ānkēt :aneen kilē iting'ēē kaamuuka kusiir Syeeataani kupootō chēpuutēchiich chaa raacheen. Iting'ēē kaamuuka kusiir piich choo lēē kipng'ōōkiis choo pāyiisyēērēē :Syeeataani kuumpuurān nta ku-iran a-ir ng'ōōki. Nyiriitaan Toomirmiiryēēng'uung'kuureer si nēē ng'at amuuk akurinta lukoos chēpō Syeeataani. Lēē nyoonēē.

12

CHĒĒRUUT NKŌŌ KARWAA KOONG'

Luuka 12:4-12

Taayuu: Ting'ēy :Iriin kaamuuka, chāmēēch akuriipēēch. Āpēy kir aka tōkōl nyoo kii-ir kilē pō koomānuut aku mār wēēch: achaan keemwaartee kaaraneenyoos akipō inyeentee.

Saa: Soomō Iriin kuutoorētīn sōwuu kiyi inēētēy keey.

Soomana āsip ārēēny: Luuka 12:4-12

Tēēpuutyēē nyoo ōōw: Yooytooyēēch :Yēesu keepee ānō paani kakutay keeran Yēesu? (kii-iitō 5)

1. Ng'oo chu kiing'ālōolchinii :Yēesu? (kii-iitō 4)
2. Ng'oo nyi mānyoolchinii keewar :achaan? (kii-iitō 4)
3. Ng'oo nyi nyoolchinēēch keewara :achaan? (kii-iitō 5)
4. Nee nyoo mārūutyēērēē :Iriin? (kii-iitō 6)
5. Kir nee nyēpō koomānuut akipō puutēchooch pō mēt? (kii-iitō 7)
6. Ku achaan nyēpō koomānuut nyaa tyaan? (kii-iitō 7)
7. Irēē nee paani kaakung'aang' :achaan akipō Yēesu? (kii-iitō 8)
8. Kir nee nyoo irēē nēē kutay :achaan Yēesu? (kii-iitō 9)
9. Ng'ōōki nee nyoo māting' /kēēnyoochi chiich kaat? (kii-iitō 10)

10. Ng'oo koonēētiintēēnyoon nyoo ōōw? (kii-iitō 12)

Ng'alyoon nyēpō lēt: Ting'ēy :Iriin kaamuuka nkōō kiimnān kuwiirchēēch ma nyēpō ākōy. Chāmēy aku riipēy chiich aka tōkōl. Kānyēēch keemwaartee akipō wēēriinyiin Yēēsu. Nee kimwaarta Yēēsu kuriipēēch :Iriin. Ng'ēt kir aka tōkōl akipō āchoonēēch. Kipō koomānut nkōō taayuu Iriin, ku nyuun nyoolchinēēch kēēkoonyit Yēēsu, akēēkoonyit mpō Toomirmiir nyoo Tiliil nyoo koonēētiintēēnyoon. Mānyoolchinii keeng'alaalee Toomirmiir nyoo Tiliil nkōō or nyaa ra.

Saayat: Paapa Iriin nyoo mii kipsēnkēt, koonkēy āmu kiichāmoon akiisāruunēēnoon ma nyēpō ākōy. Koonkēy āmu kiinyoowoon kaat ng'ōōkiichuuch tōkōl. Toomirmiir nyo Tiliil, neetaan kir aka tōkōl nyoo nyoolchinii āsōwu akipō Yēēsu. Kōōnoon nyakanat āmwoochi piich walak kir nyoo ānkēt akipō Yēēsu. Lēē nyoonēē.

KĀRKĒĒYIN NYĒPŌ MŌKŌRYOON NYOO LĒĒ SĀLWŌ

Luuka 12:13-21

Taayuu: Māmārweech :Iriin kēēlēkuu kipsāpchi keey. Nyoolchinēēch keepkaata wōloo kitēptooy paanyeenyi nkōō wōloo lēkuuy sāpoonwēchooch nkōō pērēētus choo pkoonēy. Māmārēy :Iriin kēēmāng'iisyēē kilēē piich choo lēē kipsāpchi keey.

Saa: Soomō Iriin kuutoorētīn siisōwuu kiyi inēētēy keey.

Soomana āsip ārēēny: Luuka 12 :13-21

Tēēpuutyēē nyoo ōōw: Kilēkuuy :achaan piich choo lēē nee nēē kutay kēēkoonyit ng'ālyoontoo Iriin nyi mwoorwēēch? (kii-iitō 20)

1. Kiiteep tēēpuut nee :murooni kiimii kwēēnuu piich chaa chaang' Yēēsu? (kii-iitō 13)

2. Kiikar koong' :Yēēsu piich akipō nee? (kii-iitō 15)

3. Par chaa tyaan choo kiikas :mōkōryoon nkōō ātiintyoontooni? (kii-iitō 16)

4. Tēēpuut nee nyoo kiiteepa keey :chiichoonēē? (kii-iitō 17)

5. Kiipkaat ku-ir nee sikuusiintō pareechiich? (kii-iitō 18)

6. Kiipkaat :chiichoonēē kumāng'iisyō nkōō or nyoo lēē nee? (kii-iitō 19)
7. Kiikuurō nee :Iriin mōkōryoonoonēē? (kii-iitō 20)
8. Ng'oo nyi pāyuuy sāpoonwēēchooch? (kii-iitō 20)
9. Kii āmu nee si mächēpoot :chiichoonēē akipō sāpoon nyēpō ākōy? (kii-iitō 21)
10. Kiimaakusinii koong' ng'oo :mōkōryoon paani kiimii kimākōrnoonēy akuuntuulchinii keey tukun? (kii-iitō 21)

Ng'alyoon nyēpō lēt: Paani kakilēku kimootiin kēēpētyēyīi. Kuululuukēy ramtaareenyoon nkōō Iriin nēē kulēku piich choo lēē kipsāpchii keey. Mānyoolchinii kēēmārchi keey tukuuchooch kipaata, wōloo nyuun nyoolchinii kēēchēp keey akipō sāpoon nyoo mii parak wōli mii Iriin. Mākuunkēt paani kimēērsoot, wōloo nyuun :Iriin nyoo pāyuuy sāpoonwēēchooch. Kuumuukēy kēētiirēē keey Yēēsu sikunyoowēēch kaat ng'ōōkiichooch. Kuumukēy :achaan keecham akēēpāyiisyēēchi inyeentee. Kuting'ēy man kilē kusāruunoot āmu pāyiisyō nyēpō Toomirmiir nyoo Tiliil nkōō sāpoonwēēchooch.

Saayat: Kiptaayaan Yēēsu koonkēy āmu kiimeer akipō aneen akiisārwoon nkōō ng'ōōkiichuuch. Koonkēy āmu kiichōōn i-ir tilyaantiinyuun nkōō apoo Iriin kukaramiit. Toorētoon ātāchi kaapkootuutēchuuch pāyuunātēēng'uung' nyoo mā tukun choo mārēy pōōrtanyuun. Lēē nyoonēē.

KIMAA-IIM KEEY

Luuka 12:22-31

Taayuu: Mwoorwēēch :Yēēsu kilē makuu-iim keey akipō tukun choo mākuumuukēy keewal. Koonēēch :Iriin tukun choo kimārchinii keey. Nyoolchinii keewas pāyuunātoo Iriin kupōk.

Saa: Soomō Iriin kuutoorētīn i-ir ng'aleechu iwō inēētēy keey aniinee.

Soomana āsip ārēēny: Luuka 12:22-31

Tēēpuutyēē nyoo ōōw: Kir nee nyēpō taay nyoo nyoolchinii ku-ir :piich choo rānēy Iriin nkōō sāpoonwēkwāak? (kii-iitō 31)

1. Ng'oo chu kiimwoochi :Yēēsu kilē mee-iim keey? (kii-iitō 22)

2. Tukun nee choo mānyoolchinii kēē-iimchi keey? (kii-iitō 22)
3. Ipoonyēēn koomānuut nyaa tyaan nkōō wōli mii Iriin kusiir mpō tāriit choo pāyēy Iriin? (kii-iitō 24)
4. Kir nee nyaa karaam kitya nyoo kiimāting'ēy pāytooyiin Sōlōmōōn? (kii-iitō 27)
5. Āmu nee sikunyoolchinii kēēting'ēy kaarana kilē kōōnēēch :Iriin tukun choo kimārēy? (kii-iitō 28)
6. Kir nee nyoo kimārēy kitya saayiit aka tōkōl? (kii-iitō 28)
7. Tukun nee choo mānyoolchinii kēē-iimchi keey nkōō mukuuliiriichooch? (kii-iitō 29)
8. Ng'oo nyoo iimchinii keey kipaata tukun chēpō ng'wēny? (kii-iitō 30)
9. Ng'oo nyoo nkēt tukun tōkōl choo kimārchinii keey? (kii-iitō 30)
10. Kir nee nyoo irēē paani kakuuntorooruunō Iriin nkōō pāyuunāteenyiin nkōō sāpoonwēchooch? (kii-iitō 31)

Ng'alyoon nyēpō lēt: Māmārweech :Iriin kēē-iimchi keey tukun kipaata choo kupuntoorēē nkōō sāpoonwēchooch. Mārēy :Iriin kilēku inyeentee nyēpō taay nkōō sāpoonwēchooch. Mārweēch :inyeentee kēēpāyiisyēēchii akēētiiriirēē keey inyeentee sikukōōnēēch tukun tōkōl choo kimārchinii keey. Kipoochaan koomānuut kitya nkōō wōli mii Iriin. Māmārweēch Iriin kēēmētēē kimākuwāsi tukun choo kimārchinii keey, wōloo nyuun mārēy kilē kēētiirēē keey inyeentee sikukōōnēēch tukuuchoochēē.

Saayat: Kiptaayaan Yēēsu, āmwooruun inyēēn koonkēy amu kēēpkootwoon kilē āpō koomānuut kusiir tāriit nta ku taapuk. Koonkēy akipō choomnyēēng'uung' nkōō riipētēēng'uung'nyoo iriipoon. Toorētoon achamin akoopāyiisyēēwuun nkōō sāpeenyuun. Toorētoon simoo-iimchi keey tukun choo mā pō koomānuut. Lēē nyoonēē.

13

/KĒĒSOOPĒY CHEEPYOOSO NYOO LĒĒ CHĒĒMUKUUNG' NKŌŌ PERĒĒTUU SAPAATO

Luuka 13:10-17

Taayuu: Irēy :Syeetaani piich kumnyoonchō. Chāmēy :Yēesu piich kusiir ng'ātuut akuting'ēy kaamuuka kusiir Syeetaani. Chāmēy /kuupēēruur piich.

Saa: Soomō Iriin kuutoorētīn neeta keey akiikuuyō kiya isoomānēy aniinee.

Soomana āsip ārēēny: Luuka 13:10-17

Tēēpuutyēē nyoo ōōw: Ng'oo nyi kōōnuuy mnyoonwēy nkōō ng'ōōki? (kii-iitō 16)

1. Kii pērēētūu nee kuunēētiisyēy :Yēesu nkōō sinakōōki? (kii-iitō 10)
2. Nēē nyi kii-ir :cheepyoosoonoonēē kimnyaan? (kii-iitō 11)
3. Kii nee kaa-iim nyēpō :cheepyoosoonoonēē? (kii-iitō 11)
4. Kiimwoochi :Yēesu chēēpyoosoonoonēē ku-ir nee? (kii-iitō 12)
5. Kiimwoochi nee :Yēesu chēēpyoosoonoonēē? (kii-iitō 12)
6. Kii-ira nee paani kiikōnōōr :Yēesu ēēruunēchiich chēēpyoosoonoonēē? (kii-iitō 13)
7. Kii-ir nee :chēēpyoosoonoonēē paani kiisōwu kilē kaakusāp? (kii-iitō 13)
8. Kii-āmu nee sikunārēēchi pāytooyiintoo sinaakōōki Yēesu? (kii-iitō 14)
9. Ng'oo nyoo ting'ēy kaamuuka, Syeetaani nta Yēesu? (kii-iitō 16)
10. Kii-āptō ānō :pichu kiimāraruuy nkōō chu kiitēērēy ng'aleechoochēē? (kii-iitō 17)

Ng'ālyoon nyēpō lēt: Mārēēch: Iriin kēē-irchii chiich aka tōkōl nyaa karaam nēē kuumuukēy. Māmārēēch :inyeentee kēēlēkuu piich choo ku-irtooy keey kilē, ku-irēy tukun choo kāroomēēn akēēkoonyitēy Iriin kipaāt nkōō pērēētūus choo 'tāpoonootēēn'. Āpēēch :Yēesu kilē kipō koomānuut kusiir ng'ātuut choo kiichēp chiich. Mārēēch :Yēesu kēēloosuu Iriin akipō kiisopō nkōō riireeneenyiin, mārēēch :achaan kēēkoonyitō ng'ātuutēchiich. Kiptaayaat Yēesu kuting'ēy kaamuuka kusiir Syeetaani.

Saayat: Koonkēy Kiptaayaan Yēesu āmu kēēng'uutwoon kilē i-āpēy chiich aka tōkōl kilē pō koomānuut. Isoopoon akiikoonoon koomoong'uunō. Āloosuu :inyēēn akipō riipētēēng'uung' pō kwōng'uut nyoo iriipoon. Neetaan simoolēku ng'uuriin. Neetaan aterin iit nēē mwoorwoon a-ir kir. Lēē nyoonēē

14

KIMII YĒĒSU KAA CHIIPŌ PARIISAAYŌ

Luuka 14:1-6

Taayuu: Kiimā choorway Pariisaay nkōō Yēesu. Riirēnēēch :Yēesu nēē kimnyoonchootēēn akumulēy kilē nta kuriiree :achaan piich walak. Mānyōōruuy :Yēesu koowāriisyō akipō piich choo tāyēy inyeentee.

Saa: Soomō Iriin kuutoorētīn sōwuu kiyi inēētēy keey.

Soomana āsip ārēēny: Luuka 14:1-6

Tēēpuutyēē nyoo ōōw: Kiimwoochi kilē nee :Yēesu Pariisayichoochēē akipō wōloo kiipkootitooy akipō pērētū Sapaatō? (kii-iitō 4)

1. Āyu āti kiiwō :Yēesu kuruutoochi chiipō Pariisaayo? (kii-iitō 1)
2. Kii-ira nee paani kiimii :Yēesu ruutoor? (kii-iitō 1)
3. Kiikii-am nee :chiichoonēē kiimii taayuu Yēesu? (kii-iitō 2)
4. Kiiteep nee :Yēesu pichoochēē pō Pariisaay nkōō kōōnēēt chēpō ng'ātuut? (kii-iitō 3)
5. Kiiwalta kilē nee :piichoochēē tēēpuutyoo Yēesu? (kii-iitō 4)
6. Kii-irta nee :Yēesu chiichoonēē kiipkaanaat pōōr? (kii-iitō 4)
7. Kiiteep nee :Yēesu Pariisaay nkōō kōōnēēt chēpō ng'ātuut paani kaakuusoop chiichoonēē? (kii-iitō 5)
8. Kiiwālu nee :piichoochēē? (kii-iitō 6)

Ng'alyoon nyēpō lēt: Kii-ir :Yēesu kwōng'uutyooni sikung'uutu kaapkaateenyiin akipō piich choo lēē ng'uur. Kiimārēy :Yēesu kisōwu piich wōloo mārtooy Iriin akipō pērētū Sapaatō. Kiimaawar :Yēesu nareek nyēpō piipō Pariisaay. Mārēēch :inyeentee kee-ir tukun choo mārēy Iriin aku mā tukun choo ng'ātēy piich kuukeer ng'ātuut choo tiliilēēn chēpō Iriin.

Saayat: Apoo Iriin, toorētoon āsōwu akookoonyit ng'ātuutēkuuk. Toorētoon pērētū aka tōkōl āng'uuti piich choommnyēēng'uung' nkōō riireeneeng'uung choo mārēy /kēētoorēt. Riipoon simoolēku ng'uuriin nta a-ir tukun choo āmārchinii

keey. Lēē nyoonēē.

KIR NYOO PUNTOORĒĒ :CHIICH PAANI KĀLĒKU KIINEETAN NYĒPŌ YĒĒSU

Luuka 14:25-27

Taayuu: Mā kir nyaa nyumnyum /keetuup Yēēsu. Mārēy :Yēēsu keecham :achaan inyeentee kusiir chiich aka tōkōl nkōō sāpoonwēchooch. Nyoolchinēēch kēēsōwu kilē mii :tukun choo kupuntoorēē paani kakituup Yēēsu.

Saa: Soomō Iriin kuutoorētīn i-ir kiyi inēētēy keey.

Soomana āsip ārēēny: Luuka 14:25-27

Tēēpuutyēē nyoo ōōw: Kiipkaat :inyēēn akipō tukun choo /kipuntoorēē paani kālēku :chiich kiineetan nyēpō Yēēsu?

1. Ng'oo :chu kiipēētīi nkōō Yēēsu? (kii-iitō 25)
2. Ng'oo nta nee nyoo nyoolchinii keero kilēē yoo /kakisas paani /kakuutēēniityō nkōō paani /kakicham /akeetuup Yēēsu? (kii-iitō 26)
3. Kir nee nyoo irēē paani kakucham :achaan piich walak kusiir keecham Yēēsu? (kii-iitō 26)
4. Irēē nee nkōō piich choo mächēpootēēn kupuntoorō tukun kōrōōmēēn akipō Yēēsu? (kii-iitō 27)

Ng'alyoon nyēpō lēt: Ng'al chwēēchu choo kōrōōmēēn kitya choo kiimwa Yēēsu. Kiimārēy :inyeentee kisōwu piich kilē manyumnyum /keetuup inyeentee. Choomnyoot aka kitēpēēy kilēē sasat nēē kuutēēniityō nkōō /keecham /akēēpāyiisyēēchi Yēēsu. Kiimāmārēy :Yēēsu kilē kisas :kiineetanichiich piich walak, wōloo nyuun kicham inyeentee kitya kusiir kir aka tōkōl.

Saayat: Kiptaayaan, tukun chu kōrōōmēēn /kēēkuuyō /akēē-ir. Toorētoon achamin kilēē wōloo imārtooy :inyēēn akantoroortooreeniin kusiir kir aka tōkōl nkōō sāpeenyuun. Nyoolchinii kuwala ātēpeenyuun, Kiptaayaan toorētoon. Lēē nyoonēē

15

KĀRKĒĒYIN NYĒPŌ TUKUN SŌMŌK CHOO KIIPĒTYŌ /AKĒĒNYŌŌRU CHOO KIIMWŌŌRU :YĒĒSU.

Luuka 15:1-32

Taayuu: Kiimwōōru :Yēesu kārkeeyin tākuutōōrēt piich kusōwu koonēētiisyeenyiin. Kiimārēy piich choo ka-ir ng'al chaa raacheen kusōwu kilē chāmēy :Iriin akwaaneek. Tookēy :Iriin chiich aka tōkōl nyoo soomēy inyeentee nyooyeetaap kaat. Iriin ku lēē apoo nyoo chāmēy piichiich choo pkoonchini inyeentee.

Saa: Soomō :Iriin kuutōōrēt in isōwu akipō inyeentee paani imii inēētēy keey ng'ālyoonteenyiin.

Soomana āsip ārēny: Luuka 15:1-32

Tēēpuutyēē nyoo ōōw: Nēē nyoo irēy Iriin nkōō tōkōl choo mii parak kipsēkwēt /kipāypāyituuy? (kii-iitō 24)

1. Kii āmu nee sikuung'unyng'uny :Parisaayik nkōō koonēēt chēpō ng'ātuut? (kii-iitō2)
2. Kii āmu nee sikupaypayiit māsōwoontēētaa kēēchir? (kii-iitō 6)
3. Kiinyōōru kilē nee :cheepyoosoononēē rōōpiyoontēē nyi kiipēt? (kii-iitō8)
4. Kii-irta nee :wēērii nyi manang' tukuuchiich chu /kiikichārchī? (kii-iitō 13)
5. Kiipkaat nee :wēērii nyi manang' paani kiimaakuting'ēy kir (kii-iitō 17-19)
6. Kiimii ku-irēy nee :apootaa wēēroonēē kutoomō ku-itu wēēriinyiin? (kii-iitō 20)
7. Kir nee nyēpō taay nyoo kii-ir :apootaa wēēroonēē paani kiituuyō nkōō wēēriinyiin? (kii-iitō 22)
8. Oor nee nyoo kiing'uutuunō :apootaa wēēroonēē kilē chāmēy aku kaakuunyoochi kaat wēēriinyiin? (kii-iitō 22-24)
9. Ng'oo nyi kiinareek akutuuriit :moo? (kii-iitō 28)

10. Kii-āptō ānō: apootaa wēēchwēēchu paani kiinareek wēērii nyi ōōw?
(kii-iitō 31-32)

Ng'alyoon nyēpō lēt: Mārēy :Iriin kusōwu inyeentee piichiich akucham. Nyoochinii kaat chiich aka tōkōl nyoo wēētii taayuunyiiin akusoom nyooyeetaap kaat. Māting'ēy pāypooyō nkōō mukulērtanyiin :chiich nyoo tāyēy nta kuuswayta ng'alēēpō Iriin. Muukēēy pērēētūus tōkōl /kēē-ōōchi keey Iriin. Chāmeech ākōy Iriin akumārēēch /kēēriichi inyeentee.

Saayat: Apoo Iriin, koonkēy āmu ichāmoon pērēētūus tōkōl. Koonkēy āmu itookōōn nēē āchoolwookēn akoosoom nyooyeetaap kaat. Lēē nyoonēē.

16

MŌKŌRYOON NKŌŌ LASAARO

Luuka 16:19-33

Taayuu: Ng'aloolēē :Yēēsu akipō chiich nyoo lēē mōkōryoon nkōō chiich nyoo lēē mēēywoon. Kiimēērō piichu tōkōl. Ng'aloolēē :Yēēsu akipō kiyoo kii-ira paani kaakumēērō :piichoochēē. Ārāruut Nyēpō Kēny kuunēētēy akipō man nyēpō Iriin akuuntōrōrchinii piich kusoom nyooyeetaap kaat.

Saayat: Saa Iriin kuutoorētīn sōwuu kiy imii isoomānēy.

Soomana āsip ārēēny: Luuka 16:19-33.

Tēēpuutyēē nyoo ōōw: Āptooy ānō: piich choo māmārēy kuuran Iriin akipō ng'ēētyoot nyēpō meerat? (kiitē 31)

1. Kiimāng'tooy ānō :mōkōryoon? (kii-iitō19)
2. Kiimāng'tooy ānō :Lasaaro? (kii-iitō 21)
3. Kiiwō ānō :Lasaarō paani kiima? (kii-iitō 22)
4. Kiiwō ānō :mōkōryoon paani kiima? (kii-iitō 23)
5. Ng'oo nyi kiimii nkōō Lasaaro? (kii-iitō 24)
6. Nee nyoo kiimārēy :mōkōryoon ku-irchi :Lasaaro inyeentee? (kii-iitō

24)

7. Pō nee kēpēēnēē nyi kiimii kwēēnuu Lasaaro nkōō mōkōryoon? (kii-iitō

26)

8. Nēē nyi kiimārēy :mōkōryoon ku-irchi :Lasaaro? (kii-iitō 27, 28)

9. Ng'oo nyoo nyoolchinii kiteer: piich sikusōwu akipō Iriin? (kii-iitō 29)

10. Āmu nee simēērānēy mpō :piich walak akipō kwōng'uut nyēpō ng'ēētyoot nkōō meerat? (kii-iitō 31)

Ng'alyoon nyēpō lēt: Kiimwoochi :Yēēsu piich akipō piich ārēēny choo kiimēērō. Kiing'uutu kiyoo kiiwō ku-ira nkōō sāpoon nyēpō aka tōkōl nyēpō piichoochēē ārēēny paani kiikaakumēērō. Kiimaakuting'ēy :mōkōryoon pārooyiin aka tōkōl ku-it wōli mii Iriin. Kiimēēmuukēy kuutoorēt wēēchiikwaak machuutu kēpēnooni pō meerat. Kiimoomii wōloo toorētiitooy :Lasaaro wēēchiikwaak mōkōryoontoonoonēē. Māting'ēy koomoong'uunō paani kāmēērō. Kiikōōnu :Iriin ng'alyoon sikung'uuti piich aree. Wōloo nyuun muukēy kutay :piich kimeeran nee cham.

Saayat: Apoo :Iriin koonkēy āmu kēētoorētoon āsōwuun kitoomō ama. Toorētoon amuuk āmwoochi piich walak akipō inyēēn. Lēē nyoonēē.

17

KUUSOOPĒY :YEESU PIICH TAMAN CHOO KII-AM :KŌŌNCHĒRYOONTŌ.

Luuka 17:11-19

Taayuu: Soopēy :Yēēsu kōrōōytiin. Mārēy :Yēēsu kupkoonchi inyeentee piich sikuutoorēt. Mārēy kēēting'ēy :karaana nkōō sāpēēnyoon. Tēnii :Yēēsu pēēruur piich choo chāmēy akuukoonyitēy inyeentee.

Saayat: Saa :Iriin kuutōorētīn isōwu kiyi imii isoomānēy.

Soomana āsip ārēēny: Luuka 17:11-19

Tēepuutyē nyoo ōōw: Nyoolchinii kēē-āptō āno kiyoo ka-irweech :Yēesu nkōō sāpēenyoon? (kii-iitō 16)

1. Ata :piichu kiiting'ēy kōōnchōryoon kiituuyō nkōō Yēesu? (kiitē 12)
2. Kiiryoonchēērō ānō :piichoochēē? (kii-iitō 12)
3. Kii āmu nee sikuriirchi :piichoochēē Yēesu? (kii-iitō 13)
4. Kiimwoochi :Yēesu piichoochēē ku-ir nee? (kii-iitō 14)
5. Kii-ira nee paani kiikoonyit :piichoochēē Yēesu? (kii-iitō 14)
6. Ata :piich nkōō piichu /kiikuusoo choo kiiwāroochō? (kii-iitō 15)
7. Kii-ir nee :chiichoonēē? (kii-iitō 15, 16)
8. Kiichōōnēēy kōōr nee :chiichoonēē /kiikuusoo? (kii-iitō 16)
9. Kiimwoochi :Yēesu chiichoonēē pō Samariya ku-ir nee kuureer? (kii-iitō 19)
10. Nee nyoo kiiting'ēy :chiichoonēē nyoo kii-ir Yēesu kupaypayiit? (kii-iitō 17)

Ng'alyoon nyēpō lēt: Riirēy :Yēesu piich choo mnyoonchootēē nkōō choo mārēy toorētō. Koonyitēy :Yēesu kaaraana nyēpō piich wōloo nyuun mārēy piich kusōwu inyeentee. Mārēy :Yēesu mpō kēēkoonyit kiyoo mwoorwēēch kee-ira āmu kunyōōruuy pēēruur nēē kuukoonyit inyeentee. Kiikoonyit :chiichi pō Samariya Yēesu aku kiitaak :Yēesu inyeentee. Mārēy :Yēesu kēēting'ēy koonkēy nkōō moo nyoo koonyitēy inyeentee.

Saayat: Koonkēy Kiptaayaat Yēesu akipō tukun tōkōl choo kāroomēēn choo i-irwoon. Toorētoon ākoonyitin nkōō kir aka tōkōl nyoo ā-irēy. Ineetaan ākoonyitin nēē mwoorwoon a-iruun kir. Āloosuuy Iriin āmu kiiyookuun ichōōn ilēku Sāruuniinteenyuun. Lēē nyoonēē.

18

KĀRKĒĒYIIN NYĒPŌ CHEEPYOOSO NYOO MAAMA :MOO KUSOOYĒY

Luuka 18:1-8

Taayuu: Wālwēēch :Iriin nēē kisaa. Mārēy :Iriin keesaa nyoo māmārēēch

:moo akēēting'ēy kaaraana nyoo ōōw.

Saa: Soomō :Iriin kuuneetin kitya akipō saayeet nēē mii inēētēy keey ng'ālyoonteenyiin aniinee.

Soomana āsip ārēēny: Luuka 18:1-8

Tēēpuutyēē nyoo ōōw: Kuumuukēy kēētēptō ānō simāmēēryēēch :moontin nkōō pērēētus chēpō nyaril? (kii-iitō 1)

1. Kii āmu nee sikumwoochi :Yēēsu kiineetanichiich akipō kārēēyintoni? (kii-iitō 1)

2. Nee nyoo kiimakaraam akipō kaapkaataa kiirwookiintoonoonēē? (kii-iitō 2)

3. Ng'oo nyi kiitas taay kuwēētii wōli mii kiirwookiintoonoonēē? (kii-iitō 3)

4. Nee nyi kiimārēy :cheepyoosoonoonēē lēē mōsōk ku-irchi :kiirwookiin? (kii-iitō 3)

5. Kii āmu nee siku-irchi :kiirwookiintoonoonēē cheepyoosoonoonēē lēē mōsōk man lētuun? (kii-iitō 5)

6. Kiimwa nee :Yēēsu akipō kiirwookiintoonoonēē? (kii-iitō 6)

7. Ng'oo nyoo riirēēy kilē tānyōōru man piichiich? (kii-iitō 7)

8. Nyoolchiineech keesaa kilē nee, nēē kimii nyaril? (kii-iitō 7)

9. Riirēēnēēch :Iriin kitya nkōō oor nee kusiir kiirwookiintoonoonēē kiimā-irēy man? (kii-iitō 8)

10. Nee nyoo kiimārēy :Yēēsu piich kiting'ēy paani kiimii ng'wēny? (kii-iitō 8)

Ng'ālyoon nyēpō lēt: Mārēy :Yēēsu kuurō kilē kuurānēy inyeentee. Nēētēēch kēētiirēē keey :Iriin paani kākunyōōru nyāriluut. Mārēēch :Yēēsu keesaa nyoo māmēērēēch :moontin kuti wālu :Iriin saayēēnyoon. Mārēy :Iriin kuwālu saayēēnyoon āmu pō iman inyeentee. Tēērēy :Iriin nēē kusaa. Nēē kusaa kung'uutuuy nyoonēē kilē kuurānēy Iriin.

Saayat: Apoo Iriin, kōōnkēy āmu itēēroon pērēētus tōkōl nēē asaayiin. Kōōnkēy āmu imārēy itoorētoon. Kōōnoon kaarana nyoo ōōw ātiirēēniin keey ākooripchiin pērēētus tōkōl nēē āmii nyaril. Lēē nyoonēē.

KĀRKĒĒYIN NYĒPŌ PĀRISOOYIN NKŌŌ KWĀRIINTOO KŌŌTI

Luuka 18:9-14

Taayuu: Kiimāchāmēy :Yēēsu chiich nyoo āpēy keey im akuurōōtēy keey kilē pō iman nkōō kōōnyichiich inyeentee. Piich choo mining’iitēy keey akung’aang’ ng’ōōkiikwaak choo iitēy :Iriin kilē pō iman.

Saa: Soomō Iriin kuutōōrētīn isōwu kiyi inēētēy keey aniinee.

Soomana āsip ārēēny: Luuka 18:9-14

Tēēpuutyēē nyoo ōōw: Āptooy āno :Iriin kipng’ōōkiis choo kā-āp keey ng’wēny akung’aang’ kilē kaaku-ir ng’ōōki? (kii-iitoo 14)

1. Piich choo lēē nee chu kiimwoochinii :Yēēsu ātiintyoontooni? (kii-iitoo 9)
2. Ng’oo :piichu lēē ārēēny kiipā kōpō Iriin kusa? (kii-iitoo 10)
3. Kiirōōtēy keey :Pārisooyiin kilē chiich nyoo lēē nee? (kii-iitoo 11)
4. Nēē tukun choo kii-iir :Pārisooyiin? (kii-iitoo 12)
5. Kiimii ānō :kwāriintoo kōōti? (kii-iitoo13)
6. Kiirōōtiitooy keey ānō :kwāriintoo kōōti? (kii-iitoo 13)
7. Kiisoom nee Iriin? (kii-iitoo 13)
8. Chiich ng’oo nyi /kiikuu-iit kilē pō iman nkōō taayuu Iriin? (kii-iitoo 14) 9.
9. /Ki-irtooy nee chiich nyoo āpēy keey im? (kii-iitoo 14)
10. /Ki-irtooy nee chiich nyoo mining’iitēy keey nkōō taayuu Iriin? (kii-iitoo 14)

Ng’ālyoon nyēpō lēt: Sāsēy :Yēēsu piich choo lēē ng’uur nkōō choo āpēy keey im. Kiineet akipō piich choo rōōtēy keey kilē pō iman nkōō koonyiikwaak nkōō choo mining’iitēy keey. Kiiriira :Yēēsu piich choo kang’aang’ ng’ōōkiikwaak akumārēy /kēēnyoochi kaat. Kii nēē kaakusōwu :Laawi Yēēsu ku-āmchinootō lōkōōy choo kāroomēēn choorwayiichiich nkōō piich walak choo kii-irēy kipāyit nkōō inyeentee nkōō kaaptuum. Karaam mpō kēē-āmchii :achaan piich walak kir nyaa karaam nyoo kiikunyōōru paani kiikusōwu Yēēsu. Mārēy kusōwu :piich tōkōl

akipō Yēesu, mpō piich choo kiiku-ir ng'ōōki chaa chaang' /akēēsāsēy nkōō kōōrēē.

Saayat: Apoo, toorētoon ānyōōru nyakanat āmwoochi piich tōkōl choo ānkēt akipō choomnyēēng'uung'. Toorētoon āsōwu oortin choo āmuukēy ā-iiti piich choo manyumnyum /kēē-iiti nkōō ng'wēny. Muukēēy ku :aneen ākityoon nyoo āmuukēy āmwoochi akwaaneek akipō inyēēn. Lēē nyoonēē.

YĒĒSU NKŌŌ LAAKŌŌY

Luuka 18:15-17

Taayuu: Kiichāmēy: Yēesu laakōōy akiimārēy kuupēēruur akwaaneek. Mārēy :Yēesu piich tōkōl choo kiikipkoonchi pāyuunāteenyiin kuriira laakōōy. Mārēy mpō :Yēesu piich tōkōl kuting'ēy kaarana nyoo lēē nyēpō laakwa nkōō wōloo mii Iriin.

Saayat: Soomō :Iriin kuutoorētīn ineetee keey ng'ālyoontooni karaam.

Soomana āsip ārēēny: Luuka 18:15-17

Tēēpuutyēē nyoo ōōw: Nēē nyoo pāypāychinii :Yēesu akipō laakōōy? (kii-iitō 17)

1. Ngoo chu kiimutīnii :piich Yēesu? (kii-iitō 15)
2. Nee nyi kiimārēy :sikiik ku-irchi :Yēesu laakōōk? (kii-iitō 15)
3. Kiilēēchi nee :kiineetanik sikiik? (kii-iitō 15)
4. Kiilēēchi nee :Yēesu laakōōy? (kii-iitō 16)
5. Nyoolchinii kēētēptō ānō nkōō laakōōy? (kii-iitō 16)
6. Nyoolchinii kitēptō ānō :piich chēpō pāyuunātoo Kaa Iriin? (kii-iitō 16)
7. Nyoolchinii keetaakta ānō pāyuunātoo Iriin? (kii-iitō 17)

Ng'ālyoon nyēpō lēt: Mārēy :Yēesu laakōōy kusōwu akucham inyeentee. Kiimārēy kuupēēruur laakōōy. Kārēy koong' :Yēesu chiich aka tōkōl nyoo rōōtēy laakōōy kilēē yoo mā pō koomānuut. Pāyiisyēērēē :Yēesu laakwa kilēē koopooruunō kung'uutu kilē nyoolchinii :chiich nyēpō iman kitaak ng'ālyoontoo

Iriin kuting'ēy kaarana nyoo karkeey nkōō nyēpō laakwa. Manyumnyum kisak laakwa mēt nēē iman kiy /kakimwoochi. Nyoolchineech mpō kēēlēkuu piich choo māsākootēēn kaapkootuut nkōō kiyoo mwoorwēēch ng'ālyoontoo Iriin.

Saayat: Apoo kōōnkēy āmu ichāmēy laakōōy choo mēnkēēchēēn akiipāypāychinii kaayaneeng'waang' nyaa manang'. Toorētoon pērēētus tōkōl aran kiyoo imwoorwoon akiiteek sāpeenyuun nkōō ng'ālyoontēēng'uung' pō iman. Lēē nyoonēē.

KOONTŌŌYIIN NYOO LĒĒ MŌKŌRYOON

Luuka 18:18-30

Taayuu: Mii tukun choo mārēwēēch :Yēēsu keetuupa kilēē kiineetanichiich. Ng'ātuut chēpō Iriin kinyoolchinii /kēēkoonyit. Mānyoolchinii keeroo rōōpiyō kilēē tukun choo kimārēy kitya nkōō sāpēēnyoon. Keetuup Yēēsu kimā kir nyaa nyumnyum.

Saa: Saa Iriin kuutoorētīn nēē mii isoomānēy.

Soomana āsip ārēēny: Luuka 18:18-30

Tēēpuutyēē nyoo ōōw: Nee kir nyoo puntoorēē chiich nyoo katuup Yēēsu? (kii-iitō 29)

1. Kiimārēy koontōōyiintēē kusōwu nee? (kii-iitō 18)
2. Kiimwa :Yēēsu kilē karaam ng'oo? (kii-iitō 19)
3. Ng'ātuut nee chu kiiteep :Yēēsu koontōōyiintoonoonēē? (kii-iitō 20)
4. Nee kir kuureer nyoo kiinyoolchinii :koontōōyiintoonoonēē ku-ir? (kii-iitō 22)
5. Kiiteerta ānō :koontōōyiintoonoonēē paani /kiikimwoochi kumētō mōkōrnoontiinyiin akutuup Yēēsu? (kii-iitō 23)
6. Kōrōōm nyaa tyaan nkōō chiich nyoo lēē mōkōryoon kulēku mkiristoyoon? (kii-iitō 23)
7. Tēēpuut nee nyoo kiiteep :kiineetanik nkōō ātyoot? (kii-iitō 26)
8. Tyaan tukun choo kiimētō :kiineetanik akutuup Yēēsu? (kii-iitō 28)

9. Tēnii nee :Iriin nkōō sāpoonyēē chiich aka tōkōl nyoo kāmētō kir aka tōkōl akipō inyeentee? (kii-iitō 30)

10. Nee aka nyēpō ākōy nyoo tēnii :Iriin chiich nyoo kacham inyeentee akupāyiisyēēchi? (kii-iitō 30)

Ng'alyoon nyēpō lēt: Tukun choo mārēy :Iriin kipāyiitiinēchiich ku-ir ku kōrōōmō. Nyoolchinii kēētō Iriin kipāyu pērēētūus tōkōl nkōō kir aka tōkōl nyoo ku-irēy nkōō sāpēēnyoon. Pāypooyō kēēsōwuu kilē Iriin ku Iriin nyoo moomii kiyoo pēlēy. Kunyuun mānyoolchinii keewar kile lēkuuy nee taay nēē mii :Iriin. Kir aka tōkōl nyoo kaakumētō akeetuup Iriin kēēting'ēy iman kilē kuu-ōōkwēēch nkōō choong'in. Kōōnēēch :Iriin sāpoon nyēpō ākōy paani kaakutuup Yēēsu. Mārēwēēch :Iriin kēēkoonyitō ng'ātuutēchiich. Mārēy :Iriin mpō kuureer kilē tākeewas :achaan makeenyiin kupok kusiir chamatēēnyoon nyēpō rōōpiyō nkōō mōkōrnoonti.

Saayat: Apoo Iriin, toorētoon pērēētūus tōkōl āntorooruunēēniin nkōō kir aka tōkōl nyoo ā-irēy nkōō sāpeenyuun. Toorētoon acham a-ir makēēng'uung' kusiir kir aka tōkōl nkōō sāpeenyuun. Lēē nyoonēē.

KUUSOOPEY :YĒĒSU KIPKOROOT NYOO KIISOOMSYĒYII

Luuka 18:35-43

Taayuu: Riirēēyi :Yēēsu piich choo soomsyēyīi akumārēy kuusoop akuutoorēt. Nēē kimārēy kēēlēkuu tuupiipō Yēēsu kunyoolchinii keemurtee. Kuting'ēy pāyiisyō nee kituup Yēēsu.

Saa: Soomō :Iriin kuutoorētīn ineetee keey kiyoo isoomānēy aniinee.

Soomana āsip ārēēny: Luuka 18:35-43

Tēēpuutyēē nyoo ōōw: Irēēy nee nēē ku-amta akipō pāyiisyoo Yēēsu nkōō sāpēēnyoon? (kii-iitō 43)

1. Kii-irēy nee :chiichi lēē kipkoroot aree kamas? (kii-iitō 35)

2. Nee nyi kiimwoochi :piich chiichoonēē koroot? (kii-iitō 37)
3. Kiimwa nee :chiichoonēē koroot paani kiikuur Yēēsu nkōō kuut nyoo
ōōw paani kiiteer kilē mii kusiirtō Yēēsu? (kii-iitō 38)
4. Kiimwoochi nee :piich walak chiichoonēē? (kii-iitō 39)
5. Kii nee kukar koong' chiichoonēē koroot ku-ir nee? (kii-iitō 39)
6. Kiiteep nee :Yēēsu chiichoonēē? (kii-iitō 41)
7. Kiiwālchi nee :chiichoonēē Yēēsu? (kii-iitō 41)
8. Kiimwa :Yēēsu kilē /kēēsoop nee chiichoonēē? (kii-iitō 42)
9. Kii-ir nee :chiichoonēē paani kaakuusoop :Yēēsu? (kii-iitō 43)
10. Kii-ir nee :piich paani kiiru kilē /kaakēēsoop chiichoonēē? (kii-iitō 43)

Taayuu: Kiiloosu :piich Iriin paani kiiru kwōng'uutyoonōōnēē kii-ir :Yēēsu. Kiiloosu :chiichoonēē Iriin aku kii-ātyō :piich akipō kwōng'uutyoonōōnēē. Tākunyōōru :chiich kusop kimārēy kuting'ēy kaarana nkōō Yēēsu. Maateer iit :chiichoonēē piichu kiikar inyeentee koong'wōloo nyuun kiitas taay kukuursyō nkōō kuut nyoo ōōw kuti teer :Yēēsu inyeentee akuusoop. Mpō :achaan kēēnyōōruuy pēēruur chēpō Iriin nēē kumuuyta nkōō saayeet.

Saayat: Kiptaayaan, kōōnkēy āmu iwāluuy saayeenyuun paan koosoomiin toorētō. Kōōnkēy āmu chamatēēng'uung' nyoo kōōnoon koomoong'uunō. Āloosuun nkōō tukun tōkōl choo kāroomēēn choo i-irwoon. Lēē nyoonēē.

19

KUWĀLĒY :YĒĒSU SAKAAYO

Luuka 19:1-9

Taayuu: Riirēy :Yēēsu piich choo kisāsēy nkōō kōōrēē. Karaam kēēmāng'iisyēē kilēē piich chēpō iman, akēēlēku :piich choo reelacha :moontin nkōō tukun choo kuting'ēy. Karaam kēētēpii kilēē :piich choo mēēnkēt kir tākēēsōwuu Yēēsu kukaraam.

Saa: Soomō Iriin kung'uutuun ng'al chaa reelachen nēē imii isoomānēy

ng'ālyoonteenyiin aniinee.

Soomana āsip ārēny: Luuka 19:1-9

Tēēpuutyēē nyoo ōōw: Kiipētoot :Sakaayo nkōō oor nee kitoomō kituuyō nkōō Yēēsu? (kii-iitō 2, 10)

1. Pāyit nee nyi kii-irēy :Sakaayo? (kii-iitō 2)
2. Kii āmu nee simeemuuk :Sakaayo kuuro Yēēsu? (kii-iitō 3)
3. Kii-ir nee :Sakaayo sikuumuuk kuuro Yēēsu? (kii-iitō 4)
4. Kiimwa nee :Yēēsu kii nēē ro Sakaayo kimii keet parak? (kii-iitō 5)
5. Kiiteerta ānō :Sakaayo paani kiimwoochi :Yēēsu kilē āmārēy ālēku toontēng'uung'? (kii-iitō 6)
6. Kiing'uunyng'uuny :piich kilē nee akipō ng'ālyoontoon? (kii-iitō 7)
7. /Kaarana nee nyi kiing'uuti :Sakaayo Yēēsu? (kii-iitō 8)
8. Kii-iir nee :Sakaayo sikung'uutu kilē kaakuwala akaakucham Yēēsu? (kii-iitō 8)
9. Kiimwa :Yēēsu kilē kaakuchō nee kaa Sakaayo pērēetuunoonēē? (kii-iitō 9)
10. Kii āmu nee sikuchō :Yēēsu ng'wēny? (kii-iitō 10)

Ng'ālyoon nyēpō lēt: Karaam kuukiil keey :chiich nkōō oor aka tōkōl si nēē ng'at kusōwu Yēēsu. Chāmēy :Yēēsu ng'al choo irēy :piich kurooryō kilēē Sakaayo kimii keet parak! Kiisōwu :Sakaayo kilē kiiwala sāpeenyiin kung'eeta paani kiituuyō nkōō Yēēsu. Kiing'uutu nyuun :Sakaayo kilē kiiwala mukulērtanyiin nkōō kaapkaateenyiin akipō mōkōrnoonti nkōō piich choo kiisara :inyeentee tukuukwaak. Kiimwooru nyuun :Yēēsu kilē kiichō :inyeentee ng'wēny sikuwas akusāru choo kiikupētyō.

Saayat: Kiptaayaan Yēēsu, kōōnkēy āmu kiisārwoon paani choo pētoot nkōō ng'ōōki. Kōōnkēy āmu kiiwal sāpeenyuun. Itoorētoon nyuun Yēēsu āmāng'iisyō sāpoon nyēpō tiliilin. Lēē nyoonēē.

**/KĒĒTOOKĒY YĒĒSU NKŌŌ CHĒĒRUUSĀLĒĒM KILĒĒ
PĀYTOOYIIN.**

Luuka 19:28-44

Taayuu: Kiinyōōru :Yēesu koonyit nkōō wōloo mii kiineetanichiich nkōō piich paani kiimii kuwēētii Chēerusālēm. Mārēy :Yēesu kusōwu kilē āmu nee simāchāmēy piichiich. Kiitay koontōōy chēpō Yāwuutik kuuran kilē kii ng’oo Yēesu.

Saa: Soomō Iriin kuutoorētīn ineetee keey ng’ālyoontooni aniinee nēē imii isoomānēy.

Soomana āsip ārēēny: Luuka 19:28-44

Tēepuutyēē nyoo oōw: Kii nēē chō :Yēesu ng’wēny ku nee nyēpō ākōy nkōō ākōy nyoo /kiikinyōōru? (kii-iitō 38)

1. Kiiwēētii ānō :Yēesu? (kii-iitō 28)
2. Kii nee nyi kiinyoolchinii kuwas :kiineetanik paani kachuut kōōrēē? (kii-iitō 30)
3. Kii-ira nyoo ng’uutuuy kilē kiinkēt :Yēesu kir aka tōkōl nyoo kiiwō ku-irēēy? (kii-iitō 32)
4. Kii-ir nee :piich paani kiimii Yēesu kuwēērēē sikiryō? (kii-iitō 36)
5. Kiilē nee sikuuloosu :kiineetanik tōkōl Iriin? (kii-iitō 37)
6. Kiichō :Yēesu Pāytooyiin Chēerusālēm nkōō kaarinaa ng’oo? (kii-iitō 38)
7. Ng’oo :piichu kiinārēēkyō kii nēē ro kiyoo kii-ira nkōō wōloo mii Yēesu? (kii-iitō 39)
8. Kiimwoochi :Yēesu piichoochēē kilē loosuu nee inyeentee nēē mēēloosu :kiineetanik? (kii-iitō 40)
9. Kii āmu nee sikuriirchi :Yēesu piipō Chēerusālēm? (kii-iitō 42)
10. Nee tukun chaa raacheen choo pō ku-iriisyoot nkōō Chēerusālēm nkōō piichiich? (kii-iitō 43, 44)

Ng’ālyoon nyēpō lēt: Ng’ulēy wōloo kiirrootitō :piich Yēesu paani kiituuyō nkōō inyeentee, wōloo nyuun kiing’uuti choomnyeenyiin piich tōkōl. Kiiriir akipō akwaaneek choo kiitay inyeentee, wōloo nyuun kiipāpāychinii akwaaneek choo kiicham akuuloosu inyeentee. Kiinkēt :Yēesu kir aka tōkōl nyoo wōku-irēēy. Kilē nyoonēē nyuun nyoolchinii kēētiirō keey inyeentee ku-ir kiyoo nyoolchinii sāpēēnyoon āmu nkēt kir aka tōkōl akipō ahaan. Piich choo kiikuteer akipō Yēesu akutay kunyōōruuy kiirwook lētuun. Kunyuun nēē kuchāmēy Yēesu kunyoolchinii

kēēloosu inyeentee mpō ntā kuupkootēy piich walak kilē mānyoolchinii kee-ir kilēē nyoonēē.

Saayat: Kiptaayaat Yēēsu toorētoon āloosuun nyoo mootānkēēsēēy kilē mwoorēy nee :piich walak akipō aneen. Manyuumnyuum /kēēryoong’ /akeemwaarta akipō inyēēn nkōo taayuu piich. Kiptaayaat kōōnoon nyakanat. Toorētoon āmwoochi piich walak akipō sāruunātēēng’uung’. Lēē nyoonēē.

KUUTILILĒY :YĒĒSU KŌPŌ IRIIN

Luuka 19:45-48

Taayuu: Riirēēy :Iriin Yāwuutik. Kiinyala :Yēēsu kitya. Nyoolchinēēch pērēētus walak keetaya tukun chaa raacheen nkōo kōōrēēnyoon. Muukēy nēē ku-ir kilēē nyoonēē kinameech ng’ala choo kōrōōmēēn. Kiinkēt :Yēēsu kiyoo mii taay. Saayeet kipō koomānuut nkōo sāpoon nyēpō mkiriistō.

Saa: Soomō Iriin kuutōorētiin isōwu kiyoo inēētēy keey aniinee.

Soomana āsip ārēēny: Luuka 19:45-48

Tēēpuutyēē nyoo ōōw: Nee kir nyoo mārēy kuutō taay :piipō Iriin? (kii-iitō 46)

1. Nee nyoo kii-ira paani kiitoowu :Yēēsu kuchuut nkanasaa Chēēruusālēēm? (kii-iitō 45)

2. Nee nyoo irēy :piipō Chēēruusālēēm mānyōōru kaalya? (kii-iitō 44)

3. Nkōo :inyēēn kaapkaata nee nyoo kii-ir Yēēsu kuriirchi piipō Chēēruusālēēm?

4. Ānō yi kiisip kuwō :Yēēsu kupōk nkōo Chēēruusālēēm? (kii-iitō 46)

5. Kii-ir nee :Yēēsu paani kachuut kōpō Iriin? (kii-iitō 45)

6. Kiimwa :Yēēsu kilē pō nee kōōnyiin? (kii-iitō 46)

7. Kii-irta nee :piich kōpō Iriin? (kii-iitō 46)

8. Kii-irēy nee :Yēēsu kōpō Iriin pērēētuu aka tōkōl? (kii-iitō 47)

9. Ng’oo :chu kiityāmēy kuukeet Yēēsu saayitiinoonēē? (kii-iitō 47)

10. Kiichō nee simaamuuk :koontōōyiik kuukeet Yēēsu nkōo saayitiinoonēē? (kii-iitō 48)

Ng’ālyoon nyēpō lēt: Iimēēy keey :Iriin piipō Israayeel. Kii nēē riik :Yēēsu

Chēēruusālēēm kotoowu kuriira kōōroonoonēē. Kiikiikuuyoyōtō :Iriin ōōrkooy chaa chaang' kumwoochi Yāwuutik kuu-ōōchi keey inyeentee, wōloo nyuun kiitay :akwaaneek chaa chaang'. Kiiyoyōtō nyuun kuureer wēēriinyiin aku kiitay mpō :koontōy inyeentee. Kiinyoolchinii kulēku kōpō Iriin nyoo /kimwoortoorēē /akēēnēētēē ng'ālyoonteenyiin. Kiikiikuwal :piich kōpō Iriin kulēku wōloo kuwāsēēy rōōpiyō. Kii nēē ro :Yēēsu kilēē nyoonēē kung'uutu nārēēkyō nyēpō iman akipō ng'ōōki. Kiitoowu nyuun koontōy kuchēp wōloo kēētitooy inyeentee. Kiitay :Yēēsu rāyiityō aka tōkōl nyoo kiimii kōōrēē aku kii-ir nyoonēē nyuun inyeentee /keeket.

Saayat: Apoo, nyoo woon kaat akipō lasat nyoo iroon kima-ir tukun choo ānkēt kilē pō iman. Pērēētus walak Apoo, kimootēnii Yēēsu kilēku nyoo pāyuy sāpeenyuun. Saayeenyuun nyuun kulēku Yēēsu nyoo ōōw nkōō sāpeenyuun aniinee. Lēē nyoonēē.

20

KĀRKĒYIIN NYĒPŌ KIPĀYITIIN NKŌŌ PARAA SAPIIPUUN

Luke 20:9-19

Taayuu: Kiitay :siriik nkōō tisiik choo ēēchēēn Yēēsu king'eetee toowuunō. Kiitay kuuran :akwaaneek kilē kii wēēroo Iriin Yēēsu. Kiimaachāmēy kitēērēy kiyi kiimwoorēy. Kiimwoochi :Yēēsu kārēēyintoni sikung'uuti akwaaneek tukun choo iriisōōt paani katay inyeentee.

Saa: Soomō Iriin kuutoorētīn neeta keey kupunuunō ātiintyoontooni.

Soomana āsip ārēēny: Luuka 20:9-19

Tēēpuutyēē nyoo ōōw: Kir nee nyoo kiisōwu Siriik, Pariisaay nkōō tisiin nyi ōōw akipō Yēēsu nyoo kii-ir :akwaaneek kuuwar inyeentee? (kii-iitō 13)

1. Kii āmu nee sikimētō :chiitaa paree piich walak akuwēēchi keey wōloo lōōw pērēētus chaa chaang'? (kii-iitō 9)

2. Kii-ira nee paani kaakirook kaswa? (kii-iitō 10)
3. Kii āmu nee sikuuyooytō lētuun :wēeriinyiin nyoo chāmēy kupa kunyōōru :pichoochēē kiiriipēy paree? (kii-iitō 12, 13)
4. Kii āmu nee sikipar :pichoochēē kiiriipsyēyii wēeroonēē? (kii-iitō 14)
5. Kii-irta nee :chiitaa paree riipiichoochēē kiirumiisyō? (kii-iitō 16)
6. Kiiteerta ānō :pichoochēē ātiintyoontooni? (kii-iitō 16)
7. Lēkuuy nee :kōrtō nyi kiisas tēēki? (kii-iitō 17)
8. Kir nee nyoo irēē nkōō akwaaneek choo putinii koroonēē? (kii-iitō 18)
9. Kiimārēy :siriik nkōō tisiin nyoo oōw ku-irchi nee Yēēsu? (kii-iitō 19)
10. Kii āmu nee simarat Yēēsu paanoonēē? (kii-iitō 19)

Ng’alyoon nyēpō lēt: Kiimaawārēy :Yēēsu koontōōy chēpō tiini. Kiikaakuunkēt kilē, maachāmēy :pichoochēē Iriin akusāsēy inyeentee. Kiimārēy kukeet :akwaaneek inyeentee wōloo nyuun, maakeet āmu kiiwar kilē ng’ēētēy piich riiri. Kiiriipēy :Iriin inyeentee saayiit aka tōkōl akupāytooy sāpeenyiin. Kiinkēt :Yēēsu kilē piich choo sāsēy Iriin akutāyēy inyeentee /kēētēni siitēt.

Saayat: Āpoo Iriin, ārānēy kilē Yēēsu ku wēering’uung'. Ātiirēē keey inyeentee sikunyoowoon kaat aku kōōnān kaalya. Toorētoon āpāyiisyēēwuun kukaraam. Lēē nyoonēē.

21

KŌŌNUUNĒY CHOO KIITĒTŌ :MŌSŌK

Luuka 21:1-4

Taayuu: Mārēy :Iriin kēērukuut :achaan keey akēētō inyeentee tukun choo kiting’ēy. Nkēt Iriin kir nyoo mii mukuuliiriichooch, akuunkēt paani kiting’ēy choo ng’ērin kitya akeechāmēy inyeente kitya.

Saa: Soomō Iriin kuutoorētīn siisōwuu kiyi inēētēy keey aniinee.

Soomana āsip ārēēny: Luuke 21:1-4

Tēēpuutyēē nyoo oōw: Kir nee nyoo mārēy Iriin kitya? Kiyi kakuutētō nta kiyi

kāng'ētu paani kaakēētētō?

1. Kiirō :Yēesu piich ku-irēy nee paani kiimii kōpō Iriin? (kii-iitō 1)
2. Kiitē nee :cheepyoosoonoonēē kii mōsōk aku mēēywoon saapaanoonēē pō rōōpiyō? (kii-iitō 2)
3. Kiimwa nee :Yēesu akipō koonuunēy chu kiikōōnu chēēpyoosoonoonēē?
4. Kiitēnii :mōkōrō Iriin tukuukwaak chaa tyaan nkōō chu kiiting'ēy? (kii-iitō 4)
5. Kiitē :Iriin chēēpyoosoonoonēē lēē mōsōk nkōō or nyaa neen? (kii-iitō 4)
6. Kiituuchi keey tukun chaa tyaan :chēēpyoosoonoonēē paani kiikaakuutō Iriin? (kii-iitō 4)

Ng'ālyoon nyēpō lēt: Kiinkēt :Yēesu kir aka tōkōl nyoo kii irēē nkōō wōltō aka tōkōl yoo kiimii inyeentee. Kiinkēt mpō kilē kii āmu nee siku-irēy :piich tukun kilēē wōli irtooy. Kōōnuunō nyi kiitētō chēēpyoosoonēē lēē mōsōk nkōō choomnyoot ku kiipō koomānuut nkōō inyeentee kusiir roopiyō chu kiitētō mōkōrō. Nkēt paani kaakuurukuut keey akēētē inyeentee tukun. Koonyitēy kōōnuunēyichooch inyeente nēē kuutō tukuuchooch kēēchāmēy. Kiyi kuutēnii Iriin kung'uutuuy wōloo kichāmtooy inyeentee.

Saayat: Koonkēy :Yēesu amu inkēt kir aka tōkōl nyoo mii moonyuun. Āchō :aneen paypay āsōwu kilē inkēt inyēēn kilē muukēē kimanang' kiyi ākōōniin akiinkēt :inyēēn kilē āchāmiin. Toorētoon akōōnin kir aka tōkōl nkōō moo nyii kiinyir choomnyoot nkōō kiirukuuta nyēpō keey. Toorētoon ātiirēēniin keey paani āting'ēy mpō tukun choo ng'ērin. Lēē nyoonēē

TUKUN CHOO IRIISŌŌT NKŌŌ PĒRĒĒTUUS CHĒPŌ LĒT

Luuka 21:5-28

Taayuu: Mārēy :Iriin sikuurwoochi piich. Kuumuukēy :achaan kēēnyōōru tōōrētō paani kākupuntēērō kootyāmuut. Chōōnēy :Yēesu kuureer. Mii koopooruunēy chaa chaang' chēpō pērēētus chēpō lēt.

Saa: Soomō Iriin kuutoorētīn neeta keey tukun chēpō koomānuut nkōō soomana

nyēpō pērēētuuni.

Soomana āsip ārēēny: Luuka 21:5-28

Tēēpuutyēē nyoo ōōw: Kii āmu nee sikumwooru :Yēēsu koopooruunēyiichu tōkōl? (kii-iitō 28)

1. Kir nee nyi kiing'āloolēē :kiineetanik? (kii-iitō 5)
2. Tukun choo lēē nee choo iriisyōōt nkōō pērēētuus chēpō lēt? (kii-iitō 9-11)
3. Kir nee nyoo wō ku-irēē nkōō wōli mii kiineetanik? (kii-iitō 12)
4. Kii kir nee nyoo kiiwō ku-irēē paani /kaakeenyariil kiineetanik? (kii-iitō 13)
5. Kir nee nyoo kiiyoomiis :Yēēsu kiineetanichiich? (kii-iitō 15)
6. Kir nee nyoo irēē paani kamurta :piich nyaril akipō Yēēsu? (kii-iitō 19)
7. Āmu nee /sikēēpōōryēērēē Cheerusaleem /akēēpēl? (kii-iitō 22)
8. Mwooruu kee tukun ārēēny choo iriisyōōt nkōō piich pērēētuunoonēē chōōnēy pōōryoot? (kii-iitō 24)
9. Nee koopooruunēy walak chēpō pērēētuus chēpō lēt? (kii-iitō 23-26)
10. Chōōntooy ānō wēēroo chiich? (kii-iitō 27)

Ng'ālyoon nyēpō lēt: Kuurwoochinii piich tōkōl nkōō ng'wēny. /Kuunkēt kupunuunō ātiintiin kilē /kiikisēēti Cheerusaaleem /akeemil kōpō Iriin kilēē wōli kiing'oorto :Yēēsu. Kiimwoorwēēch :Yēēsu koopooruunēyiichu sikēētēpii kipsach. Kiisiltaar nyēpō koopooruunēyiichu kung'uutuuy kilē chōōnēy :Yēēsu kuureer. Yoomiisēēch :Yēēsu kilē riipēēch, aku mārēēch kēēsōwuu kilē mpō ntā sāsēēch piich āmu kichāmēy :inyeentee kitākēēriipoot āmu choomnyēēnyiin.

Saayat: Kiptaayaan Yēēsu, lēyyē ikiiloon nēē sasan :piich. Toorētoon ālēku nyakan aku moowāriisyō kipunuunō kaamuukeeng'uung'. Toorētoon ātiirēniin keey akaanyakaniitu nkōō kir aka tōkōl. Lēē nyoonēē.

KĀRKĒĒYIN NYĒPŌ MOOKONG'WO NKŌŌ KOONĒĒTHISYŌ AKIPŌ PĒRĒĒTUUS CHĒPŌ LĒT

Luuka 21:29-38

Taayuu: Mārēēch :Yēēsu kēēriipō keey nkōō wōloo kimāng'tooy aku

mārweēch kēētēpii nkōō tiliilin. Kiimētō :Yēesu koopooruunō sikēēsōwu :achaan kilē chōōnēy inyeentee kuureer. Nyoolchinii /keesaa /akēēchēp keey akipō pērēētus choo pkōōnēy.

Saa: Soomō Iriin kuutoorētīn sōwu soomanaani kolkol.

Soomana āsip ārēēny: Luuka 21:29-38

Tēepuutyēē nyoo ōōw: Āmu nee sikunyoolchinēēch keesaa pērēētus tōkōl? (kii-iitō 36)

1. Nee kir nyoo kisōwuunēē kilē lēēkit kuchō :kēmēy ? (kii-iitō 29-30)
2. Kir nee nyoo kisōwuuy paani kakuuroo koopooruunēy chēpō pērēētus chēpō lēt? (kii-iitō 31)
3. Nee :tukun ārēēny choo māsiirtooy kitoomō ku-iriisyō tukuuchwēēchu? (kii-iitō. 32, 33)
4. Kir nee nyoo irēē nēē māriip keey kiineetanik? (kii-iitō 34)
5. Nee :tukun ārēēny choo maraat kee-iir :achaan nēē kimārēy keepa kēeryoonchēērēē taayuu Wēēroo Chiich? (kii-iitō 36)
6. Kiiwētīi ānō: Yēesu lang’a paani kaakuuneet piich pērēētūu aka tōkōl nkōō kōpō Iriin? (kii-iitō 37)

Ng’ālyoon nyēpō lēt: Nēētēēch :Yēesu kilē kuumuukēy kēēsōwu paani kaakiriiku pērēētūu nyēpō lēt. Mārweēch kēēriichi Iriin aku mārēy mpō kēēng’uutuu kilē kitiirēē keey inyeentee nkōō ātēpoosyēchooch. Mārweēch :Yēesu kēēsōwu kilē kir aka tōkōl nyoo kiimwa akuuneet kimāsiirtooy wōloo nyuun tēpēy ākōy.

Saayat: Kiptaayaan Yēesu toorētoon āryoong’ kukaraam akipō inyeen. Toorētoon āmāng’iisyō nkōō oor nyoo pāypooyiitiin. Koonkēy āmu kiisārwoon nkōō siitēt nyoo mii taay nyoo chōōnchinii akwaaneek choo māchāmiin nta kipāyiisyēēwuun. Lēē nyoonēē

KU-ĀLTOOY :CHUUTAAS YĒĒSU

Luuka 22:1-6

Taayuu: Kiimārēy :pāytooyiipō Yāwuutik kupar Yēēsu. Sāpēy Syeetaani aku ting'ēy kaamuuka nkōō ng'wēny. Iriisoot tukun chaa raacheen nēē nam chiich :toomirmiir chaa raacheen.

Saa: Mwoochii :Iriin kuutoorētīn aniinee paani inēētēy keey akipō ātiintyoontooni ng'ālōolēē akipō tukun chēpō kaa-iim.

Soomana āsip ārēēny: Luuka 22:1-6

Tēēpuutyēē nyoo ōōw: Ng'oo nyi kiichēp ku-alta Yēēsu /sikeekeet? (kii-iitō 3)

1. Nee kaarinee aka nyēpō pērētūu Tuum nyēpō Maakatyaan nyoo maakuutō tukun choo irēy kukuutu? (kii-iitō 1)

2. Ng'oo chu kiimārēy kilē /keeekeet Yēēsu? (kii-iitō 2)

3. Kii āmu nee sikimārēy :pichoochēē /keeekeet Yēēsu? (kii-iitō 2)

4. Ng'oo :chiichi kiichuut :Syeetaani? (kii-iitō 3)

5. Kii ng'oo :Chuutaas Iskaryōōt? (kii-iitō 3)

6. Kiing'alaala nee :Chuutaas Iskaryōōt kipootō tis choo ēēchēēn nkōō koontōōy? (kii-iitō 4)

7. Kiiran :tis choo ēēchēēn nkōō koontōōy kuutē nee Chuutaas? (kii-iitō 5)

8. Pārooyin nee nyi kiikānyēy :Chuutaas? (kii-iitō 6)

Ng'ālyoon nyēpō lēt: Kii nēē chuut :Syeetaani Chuutaas kitoowu kilēku kimoo. Mpō ntā kiikiineetan inyeentee nyēpō Yēēsu ku kiicham rōōpiyō kitya kusiir Yēēsu. Kiikiikiwāsēy :tis choo ēēchēēn oor wōloo pārtooy Yēēsu, wōloo nyuun kiiwāriisyō :piich tōkōl chu kiinyoolchinii kuuro kilē /kakiipar Yēēsu.

Saayat: Kiptaayaan Yēēsu, toorētoon simaacham nta antoroorteera kir aka tōkōl kimaachamiin. Toorētoon ānyōōru kiimnān akookoonyitin kilēē wōli ālēē. Lēē nyoonēē.

/KĒĒCHĒPĒY ĀMIISYŌ NYĒPŌ PAASAKA

Luuka 22:7-13

Taayuu: Nkēt :Yēesu kir nyoo irēē pērēētuu aka tōkōl. /Kuurānēy kilē irēy inyeentee kir nyēpō iman. Mpō ntā nkēt :Yēesu tukun tōkōl, kimii walak choo māng'oong'wēēch akipō pērēētuus choo pkoonēy.

Saa: Soomō :Iriin kung'oong'uun kir nyoo pō koomānuut kupunuunō koonēētiisyooni pō aniinee.

Soomana āsip ārēēny: Luuka 22:7-13

Tēēpuutyēē nyoo ōōw: Nee ātēp nyaa karaam nyoo kiing'uutu :kiinetanik nkōō yēēnyī nyoo kiikoonyit Yēesu? (kii-iitō 13)

1. Kii pērēētuunoo nyi /kiiki-āmēy tuumpō makatyaan nyoo maakuutō tukun choo irēy kukuutu? (kii-iitō 7)

2. Kiiyooytō :Yēesu Pēētērō nkōō Choowaana kupa ku-ir nee? (kii-iitō 8)

3. Nee koopooruunō nyoo kiing'uutiniī kiineetanik wōli /kiikiichēpēē tuumpō makatyaan? (kii-iitō 10)

4. Nee kaarina nyoo kiitē keey Yēesu paanoonēē? (kii-iitō 11)

5. Kiiting'ēy :chiichoonēē pō koot kō nyoo lēē nee nyoo kiiwō kupāyiisyeērēē Yēesu nkōō kiineetanichiich? (kii-iitō 12)

6. Kiisōwuuntō ānō kiineetanik kilē kiing'aloolēy Yēesu man? (kii-iitō 13)

7. Imuukēē imwaa kilē kii āmu nee simaasip kumwooru Yēesu ārii yi /ku-irēē Tuumpō makatyaan?

Ng'ālyoon nyēpō lēt: Kiikaakuusip kuuchēp :Yēesu pērēētuu Tuumpō Makatyaan. Kiinkēt pērēētuu aka tōkōl kir nyoo wō ku-irēē. Kiikoonyitēy :kiineetanik Yēesu aku kiinyōōru kir aka tōkōl kilēē wōli kiimwoochi Yēesu kilē pa kunyōōruuy. Kiilēwēn :Yēesu pērēētuu nyoo /ki-āmēy pasaka.

Saayat: Kiptaayaan, koonkēy āmu ānkēt aneen kilē inkēt inyeen kir aka tōkōl akiimārwoon a-ir tukun choo kāroomēēn. Koonkēy āmu kēēkoonoon pārooyin āpāyiisyeēwuun. Āchāmiinyēēn. Lēē nyoonēē.

TUUMPŌ PAASAKA

Luuka 22:14-23

Taayuu: Kiinkēt Yēesu kilē wō kunyārilēy akipō ng'ōōkiichooch. Kiitoowu :inyeentee tuum nyoo ōōw sikuupkooti :kiineetanichiich akipō sāpēēnyiin nyoo kiikōōnu akipō akwaaneek nkōō achaaan.

Saa: Soomō Iriin kuutoorētīn sōwuu koomānuut nyēpō koonēētiisyooni pō aniinee.

Soomana āsip ārēēny: Luuka 22:14-23

Tēēpuutyēē nyoo ōōw: Mii :pērēētuu nyoo kii-ātyō Yēesu? (kii-iitō 22)

1. Kiimārēy ku-ir nee :Yēesu kutoomō /kēēpā /kēēnyariil? (kii-iitō 15)
2. Kir nee nyoo wō kuusiltooy nkōō Pāyuunātoo Iriin? (kii-iitō 16)
3. Kiimwoochi :Yēesu kiineetanik ku-irta nee tiipaay chu mii kikoompēē? (kii-iitō 17)
4. Kii-irta nee :Yēesu makatyaantee? (kii-iitō 19)
5. /Kiikuukārkkēēyiitēy :makatyaantee nkōō nee? (kii-iitō 19)
6. /Kiikuukārkkēēyiitēy :tiipaay nkōō nee? (kii-iitō 20)
7. Kii āmu nee sikutarta :Yēesu kērētiichiich? (kii-iitō 20)
8. Kiimwa nee :Yēesu nyoo ng'uutuuy kilē kiinkēt kilē /kipa /kēē-āltooy inyeentee? (kii-iitō 21)
9. Kiitāchinii keey ānō :āltooriintonoonēē? (kii-iitō 22)
10. Kii-ir nee :kiineetanik paani kiikaakumwoochi :Yēesu kilē /kipa /kēē-āltooy inyeentee? (kii-iitō 23)

Ng'ālyoon nyēpō lēt: Kiipāyiisyēērēē :Yēesu tuum nyēpō Paasaka sikitoowuunēē tuum nyoo /kiipkootēē inyeentee. Kiipāyiisyēērēē koopooruunō nyēpō makatyaan nkōō tiipaay sikuupkootwēēch akipō mēērēēnyiin nyi kiima akipō āchoonēēch. Kupunuunō meereenyiin kēēnyōōruuy nyooyeetaap kaat. Pkootwēēch tuumnyēēnyi kilē chōōnēy :Yēesu kuureer /akiikaakēēchēp meereenyiin nkōō ng'ēētyeenyiin. Kiinyoolchinii kima :Yēesu meerat nyaa ng'waan sikuusilta mākuut nyēpō :Iriin nyoo rwoochinii :piich akipō ng'ōōki. Chiich aka tōkōl nyoo kiinyōōchi :Iriin kaat kuwēētii Kipsēnkwēt.

Saayat: Kiptaayaat Yēesu, kiimeer :inyeen nkōō kimurtooyoon siinyōōwoon

kaat ng'ōōkiichuuch. Āmwooruun koonkēy. Toorētoon simaa-ir ng'ōōki wōloo nyuun āmāng'iisyō sāpoon nyoo tōrōōrin akuukoonyitiin. Lēē nyoonēē.

KOONĒĒTUUT AKIPŌ KAAMINING'ĒĒTAAP KEEY

Luuka 22:24-30

Taayuu: Kiimaakoonyitēy keey :kiineetanik āmu kiimārēy chiich aka tōkōl nkōō akwaaneek kilēku nyoo ōōw nkōō pāyuunātoo Iriin. Mii tukun chaa chaang' choo kunyōōruuy nkōō kipsēnkwēt nyoo mā sāruunō kipaas. Kinyōōruuy mālāk nēē kimāng'iisyō kilēē piipō Iriin.

Saa: Soomō Iriin kuutoorētīn paani inēētēy keey aniinee.

Soomana āsip ārēeny: Luuka 22:24-30

Tēēpuutyēē nyoo ōōw: Koopooruunō nee nyoo kiing'utweech :Yēēsu keetuupa nēē kimārēy kēēlēku kiineetanichiich? (kii-iitō 3. 27)

1. Kir nee nyi kiimooyēēchinii :kiineetanik? (kii-iitō 24)
2. Tēptōoy ānō :pāytooy nkōō akwaaneek choo ting'ēy kaamuuka nkōō wōloo mii piich? (kii-iitō 25)
3. Nyoolchinii :kiineetan kiptēptō ānō nkōō wōloo mii piich walak? (kii-iitō 26)
4. Nkōō koopooruunō nyēpō Yēēsu ku ng'oo nyoo ōōw? (kii-iitō 27)
5. Kir nee nyaa karaam nyoo kii-ir :kiineetanik mpō ntā kiiting'ēy nyaaluulnat? (kii-iitō 28)
6. Mālāk nee nyoo kiichēpchi :Yēēsu kiineetanichiich? (kii-iitō 29)
7. Kāluunō nee nyoo nyōōruuy kiineetanik nkōō pāyuunātoo Iriin? (kii-iitō 30)
8. Rwoochinii ng'oo kiineetanik nkōō pāyuunātoo Iriin? (kii-iitō 30)

Ng'ālyoon nyēpō lēt: Kii koopooruunō nyaa karaam aku sāruuniin :Yēēsu. Kii-irchi :Yēēsu piich pāyiit mpō ntā kii ōōw inyeentee kitya nkōō piich tōkōl /kiikinam nkōō ng'wēny. Mpō ntā kiiting'ēy :kiineetanik nyaaluulnat ku kiikoonyit :Yēēsu akwaaneek akuuyoomiis tōrōōrin nkōō pāyuunātoo Iriin nyi mii kichōōnēy. Kiicheer akwaaneek akipō pērēētūus choo pkoonēy. Mārweēch :Yēēsu kēētēpii kēēting'ēē keey choomnyoot nkōō koonyit.

Saayat: Kiptaayaan, toorētoon ākoonyitin nkōō ātēpoosyēchuuch tōkōl akookoonyit piich walak. Toorētoon āpāyiisyēēwuun nkōō ng'wēny kilēē oor nyoo āmii āchēpēy keey akipō sāpoon nyēpō ākōy. Lēē nyoonēē.

/KĒĒKĀRĒY KOONG' PĒĒTĒRŌ NKŌŌ KIINEETANIK WALAK

Luuka: 22:31-38

Taayuu: Muukēy kipooryēērō :Syeetaani tuupiipō Yēēsu. Muukēy :Yēēsu ku-ōōku kuureer tuupiichiich paani ka-ir ng'ōōki. Mii :Yēēsu kisoowēēch pērēētuu aka tōkōl. Lasat ku kir nyaa ra nkōō piich choo rānēy Iriin.

Saa: Soomō Iriin kuutoorētīn sōwuu kiyi inēētēy keey aniinee.

Soomana āsip ārēēny: Luuka 22:31-38

Tēēpuutyēē nyoo ōōw: Kir nee nyoo ng'uutuuy kilē man ng'aleechu kiimwa :Yēēsu akipō sāpeenyiin? (kii-iitō 37)

1. Ng'oo nyoo kiimārēy kuutyam Siimnyōn nkōō kiineetanichiich? (kii-iitō 31)
2. Kiisoochi :Yēēsu Pēētērō kilē simā-am nee? (kii-iitō 32)
3. Kir nee nyoo kiinyoolchinii ku-ir :Siimnyōn paani kaakuwala? (kii-iitō 32)
4. Ānō wōli kiichamta keey :Siimnyōn kiwō akipō Yēēsu? (kii-iitō 33)
5. Kir nee nyoo kiiwō ku-irēy :Pēētērō tapan nkōō kiyi kiimwa kilē wōku-irēy? (kii-iitō 34)
6. Kiiwēētii kitāyēy :Siimnyōn kilē mēēnkēt Yēēsu āsip ata? (kii-iitō 34)
7. Kir nee nyoo kiirārchī kiineetanik paani kiiyooytō :Yēēsu? (kii-iitō 35)
8. Nee kir nyoo kiimwoochi :Yēēsu kiineetanichiich ku-ir? (kii-iitō 36)
9. Kiimwa Yēēsu kilē /kiikisir nee nkōō Ārāruut nyēpō Kēny akipō inyeentee? (kii-iitō 37)
10. Kir nee nyi kiilēēkit kuusilta? (kii-iitō 37)

Ng'ālyoon nyēpō lēt: Nee las keey: chiich kilē nkēt ng'al chēpō toomirmir ku-irēy: inyeentee kuupuut. Kitiirēē keey riireenanyēpō Iriin nkōō sāpoonwēchooch. Soowēēch Yēēsu akuunkēt kilē mākiting'ēy kaamuuka. Ting'ēy :Yēēsu chēpuut

chēpō kwōng'uut akipō chiich aka tōkōl kilēē mpō paani kiiting'ēy akipō Siimnyōn. Nyoowēech kaat :Yēēsu nēē king'aang' ng'ōōkiichooch akēēsoom nyooyeetaap kaat. Kiisip kumwooru Āraruut nyēpō Kēny (Siruut chēpō piipō Yāwuut) akipō Yēēsu kilēē Meesiiya.

Saayat: Apoo Iriin, neetaan āōwu kitya akipō Yēēsu pērēētuu aka tōkōl. Neetaan āsōwu keey mpō, akii-iistēērēēnoon lasat nyoo āting'ēy nkōō sāpeenyuun. Āmārchiniin keey. Lēē nyoonēē.

KUSOOYĒY :YĒĒSU NKŌŌ TULWOO MUSĒYTUUN

Luuka 22:39-46

Taayuu: Kiipō koomānuut saayata nkōō sāpoon nyēpō Yēēsu. Kiimārēy :Yēēsu toorētō nyēpō chōōrwayiichiich nkōō tuupiichiich paani kiimii nyaril. Kiinyaril nkōō or aka tōkōl. /Kiikuukaykaay paani kiimii rwoon :kiineetanik.

Saa: Soomō Iriin kuutoorētiin sōwuu wōloo iriiptooy sārūnēēng'uung' paani inēētēy keey aniinee ng'ālyoontooni pō kwōng'uut.

Soomana āsip ārēēny: Luuka 22:39-46

Tēēpuutyēē nyoo ōōw: Kiipō koomānuut saayata nkōō sāpoon nyēpō Yēēsu nkōō kiineetanichiich āmu nee? (kii-iitō 46)

1. Kiicham kiwēētii ānō :Yēēsu pērēētuu aka tōkōl paani sooyēy? (kii-iitō 39)
2. Kii-ir nee :kiineetanik? (kii-iitō 39)
3. Kiimwoochi :Yēēsu kiineetanichiich kisa sima-ira nee? (kii-iitō 40)
4. Kii-ir nee :Yēēsu kitoomō kisa? (kii-iitō 41)
5. Ng'oo nyi kiisooyēy :Yēēsu? (kii-iitō 42)
6. Kiisoom nee :Yēēsu paapeenyiin? (kii-iitō 42)
7. Kiimārēy :Yēēsu ku-ira makaa ng'oo? (kii-iitō 42)
8. Kiichō ng'oo kuukiil inyeentee? (kii-iitō 43)
9. Kir nee nyoo kiing'uutu kilē kiinyaril :Yēēsu kitya? (kii-iitō 44)
10. Kii nee ng'eeta :Yēēsu kiineetanik rwoon kumwoochi ku-ir nee? (kii-iitō 46)

Ng'alyoon nyēpō lēt: Saayat nyi kiisooyēy :Yēesu paapeenyiin ku kiipō koomānuut nkōō sāpeenyiin. Mpō ntā kiiwēeroo Iriin Yēesu ku kiineet keey ku-irēy tukun pichiirēēn. Kiinyōōru toorētō kupunuunō :saayat āmu kiing'waan kupuntēērō ng'woonin nyēpō kimurtooyoon. Kiityam :Syeetaani kilē kuuwaang' inyeentee wōloo nyuun kiimārēy Yēesu ku-ir kiyi kiimārēy paapeenyiin mpō ntā kiikōrōōm. Kisōwuuy :achaan nyuun kilē nkēt :Yēesu kir aka tōkōl nyoo chōōnchinēech āmu kiipkoonchi inyeentee mpō. Muukēy kicheereech āmu /kiikicheer inyeentee.

Saayat: Koonkēy Yēesu āmu kiicham inyaril akipō aneen. Koosōwu paanyēēnyi kilē kikiring' :inyēēn nyaril akipō ng'ōōkiichuuch. Moomii ātoo kiikinam :inyēēn ng'ōōki kipaatee paani kii-āp ng'ōōkiichuuch. Koonkēy. Lēē nyoonēē.

KU-ĀLTOOY :CHUUTAAS ISKARYOOT YĒĒSU

Luke 22:47-53

Taayuu: Kii-alta :Yēesu choorweenyiin. Mii :piich choo kisāsēy Yēesu. Kiinēētiisyō :Yēesu paani kiimii Cheerusaleem akiinkēt kilē kipa /kēē-āltooy inyeentee.

Saa: Soomō Iriin kuunēētīn kupunuunō koonēētiisyooni pō aniinee.

Soomana āsip ārēēny: Luuka 22:47-53

Tēēpuutyēē nyoo ōōw: Kiing'uutu :Yēesu riireeneenyiin nyoo chōōnēē parak nkōō oor nyoo lēē nee paani /kiiki-āltooy? (kii-iitō 51)

1. Ng'oo nyi kii-iitu paani kiing'ālōolchinii :Yēesu kiineetanichiich? (kii-iitō 47)
2. Kiimārēy :Chuutaas ku-ir nee sikung'uutu Yēesu? (kii-iitō 48)
3. Kiimwa :Yēesu kilē ng'oo inyeentee? (kii-iitō 48)
4. Kiimārēy ku-irchi nee tuupiipō Yēesu piikō? (kii-iitō 49)
5. /Kiiki-irta nee ōōtwookiintoo tisiin nyoo ōōw? (kii-iitō 50)
6. Kwōng'uut nee nyoo kii-ir :Yēesu? (kii-iitō 51)
7. Ng'oo :piichu kiimārēy kinam Yēesu? (kii-iitō 52)
8. Tēpuut nee nyoo kiiteep :Yēesu pichwēēchu? (kii-iitō 52)
9. Kiimii :Yēesu ānō pērēētuu aka tōkōl? (kii-iitō 53)

10. Kiimwa nee :Yēesu akipō pērēetuunoonēē /kiiki-alta /akeenam inyeentee? (kii-iitō 53)

Ng'alyoon nyēpō lēt: Kii Iriin Yēesu mpō pērēetuunoonēē /kiikiwāsēy /kee-alta inyeentee. Kiing'uutu riireena nyoo ōōw akipō akwaaneek choo nyārilsoot. Kiinkēt :Yēesu kir aka tōkōl nyoo pkootēy chiich akuunkēt mpō irēēy piich :koowāriisyō kulēlu kipaaseen akutuuriituuy moontin.

Saayat: Kiptaayaan toorētoon simootēp kuti a-alteen. Lēē nyoonēē.

KUTĀYĒY :PĒĒTĒRŌ KILĒ MĒĒNKĒT YĒĒSU

Luuka 22:54-62

Taayuu: Kiiwāriisyō :Pēētērō kuti tay kilē mēēnkēt Yēesu. Kiilēku man ng'aloontooni kiimwa :Yēesu akipō Pēētērō. Nēē kuuwar kilē pkootēy nee :piich akipō āchoonēēch kuumuukēy ku-irēēch kee-ira ng'ōōki.

Saa: Soomō Iriin kuutoorētīn neetee keey ng'aleechu pō kaa-iim chu imii isoomānēy aniinee.

Soomana āsip ārēēny: Luuka 22:54-62

Tēēpuutyēē nyoo ōōw: Ng'uutuuy kilē nee ng'aleechu kii-iriisyō kilē Yēesu ku Iriin? (kii-iitō 61)

1. Kiimut :piich Yēesu kupok ākōy ānō? (kii-iitō 54)
2. Ng'oo nyoo kiituup akwaaneek nkōō ripaarip? (kii-iitō 54)
3. Kiireer ku-ir nee :piich? (kii-iitō 55)
4. Ng'oo nyi kiirō :Pēētērō paani kiitēpō yi /kiyuuwērēē ma kipootō piich chaa chaang'? (kii-iitō 56)
5. Kiimwa nee :chēēpoonēē akipō Pēētērō? (kii-iitō 56)
6. Kiitay :Pēētērō kilē mēēnkēt Yēesu āsip ata? (kii-iitō 57, 58, 60)
7. Kii-ira nee paani kiitay :Pēētērō kilē mēēnkēt Yēesu āsip sōmōk? (kii-iitō 60)
8. Kii-ir nee :Yēesu paanoonēē? (kii-iitō 61)
9. Kiipkaat nee :Pēētērō paani kiirō :Yēesu inyeentee? (kii-iitō 61)
10. Kii-ir nee :Pēētērō? (kii-iitō 62)

Ng'ālyoon nyēpō lēt: Koowāriisyō akipō kir nyoo pkootēy :piich walak akipō āchoonēech kuumuukēy kuupoot koomoong'uu nkōō wōloo mii Iriin nēē kimēti koowāriisyō kipāywēech. Kiipēl :Syeetaani Pēētērō, wōloo nyuun mpō ntā kiilēē nyoonēē ku kiiriira :Yēēsu inyeentee. Mār wēech :Yēēsu kēēkiilyēē paani /kakuutyameech. Muukēy ku-irēech choong'in nyēpō piich kēēwāriisyēē kuti kee-ir choo mānyoolchineech kee-ira. Nyoolchinii kēēsoomō tōōrētō nyēpō Iriin sikēēpēlō tukun choo pāyiisyēērēē :Syeetaani ku-ireech kēēputii ng'ōōki.

Saayat: Kiptaayaan Yēēsu, toorētoon āryoong' kukaraam nēē ānyōōru /kaatyāmuut choo iroon atayin kilēē Kiptaayaan nkōō sārūuniin. Toorētoon simoowāriisyō akipō tukun choo pkootēy piich walak akipō aneen nēē āmii ā-irēy kiyoo imārēē. Lēē nyoonēē.

/KIIKIMUUL YĒĒSU PAANI KIIMII KŌŌKWOŌ YAWUUTIK

Luuka 22:63-71

Taayuu: Kiimuul akuunyariil Yēēsu :piichu kiiriipiisyēy. Kiimaawāltooy saayiitiis walak tēēpuut choo /kiikitēēpēy inyeentee. Kiiran :Yēēsu nkōō taayuu kaapkiirwook kilē inyeentee ku Iriin.

Saa: Soomō Iriin kuutoorētīn sōwuu kiyi inēētēy keey aniinee.

Soomana āsip ārēēny: Luuka 22:63-71

Tēēpuutyēē nyoo ōōw: Ngālyoon nee nyoo kiiwoong'uunō :Yēēsu nyoo kii-ir inyeentee kēētilchi kiirwook nkōō ng'wēny? (kii-iitō 70)

1. Kiitoowu ku-irchi nee :pichoochēē kiiriipiisyēy Yēēsu? (kii-iitō 63)
2. Kiimwa nee :pichoochēē paani kiikaakirat koonyin Yēēsu? (kii-iitō 64)
3. Kiimwoochi nee :pichoochēē inyeentee? (kii-iitō 65)
4. Kiituuyō :pichoochēē pō kōōkwō saayiit ata? (kii-iitō 66)
5. Ng'oo :pichu kiituuyō sikuurwoochi Yēēsu? (kii-iitō 66)
6. Nee tēēpuutyēē nyi kiiteep :pichoochēē Yēēsu? (kii-iitō 67)
7. Kiimwa :Yēēsu kilē wōku-irēē nee akipō inyeentee nkōō pērēētūus choo pkoonēy? (kii-iitō 69)
8. Nee tēēpuutyēē nyoo ōōw nyoo kiiteep :pichoochēē pō kōōkwō Yēēsu?

(kii-iitō 70)

9. Kiiwalta nee :Yēēsu? (kii-iitō 70)

10. Kiimwa :kōōkwoonoonēē kilē kiikaakiteer nee? (kii-iitō 71)

Ng'ālyoon nyēpō lēt: Kiiting'ēy :kōōkwoonoonēē āmu nee sikipāypāyītuuy akipō wāluut chu kiiwālu :Yēēsu akipō wōli kiichōōnēē inyeentee. Kiitay :Yēēsu āmu kiimārēy kiriip pāyuunātēēng'waang'. /Kuumuukēy /kēēsōwu kupunuunō (koo-iitoosyēchu) kilē kiinkēt koontōōyīpō Yāwuut kilē Yēēsu ku kii Iriin wōloo nyuun kiichamta /keekartaat inyeentee. Kiinkēt :koontōōyīchoochēē kiyi kii-irēy wōloo nyuun kiiswaayta Iriin. Kiichuunnyō :piich ng'alēēpō pichoochēē pō kōōkwoo Yāwuutik nkōō koontōōyīikwaak.

Saayat: Kiptaayaan Yēēsu toorētoon apkaat kukaraam akipō sāpeenyuun simēēchuunnyoon ng'alēēpō piich chaa raacheen. Kōōnoon kōōnuunō nyēpō kāākuuyō si nēē ng'at āsōwu paani mārēy :Syeetaani kipāyīisyēērēēnoon. Lēē nyoonēē.

23

KIMII :YĒĒSU TAAYUU PILAATO NKŌŌ ĒRŌŌTĒ

Luuka 23:1-12

Taayuu: Kiimaapkootēy :Pilaato nkōō Ērōōtē kilē mii lēētutyō nyoo kinam Yēēsu. Kiimaamuuk kutil ng'ālyoon aka tōkōl āmu chooolotyō aku maamuuk mpō kung'aloolchi piikō nkōō kōōkwoo Yāwuutik.

Saa: Saaya Iriin kuutoorētīn isōwu ng'ālyoontooni imii inēētēy keey aninee.

Soomana āsip ārēēny: Luuka 23:1-12

Tēēpuutyēē nyoo ōōw: /Kiiking'aal kilē nee Pilaato nkōō Ērōōtē paani kiitilēy ng'al? (kii-iitō 2, 5, 10)

1. Kiimut ānō kōōkwoo Yāwuutik Yēēsu? (kii-iitō 1)

2. Nee tukun sōmōk choo kiikumwaartara Yēēsu? (kii-iitō 2)

3. Kiiteep nee: Pilaato Yēesu? (kii-iitō 3)
4. Kiiwālchi nee :Yēesu Pilaato? (kii-iitō 3)
5. Kir nee nyoo kiitoomchi :piich Yēesu kilē kaaku-ir? (kii-iitō 5)
6. Kiimārēy :Ērōōtē kuuro nee? (kii-iitō 8)
7. Kiiwalta kilē nee :Yēesu tēepuutēpō Ērōōtē? (kii-iitō 9)
8. Kii-irēy nee :tis choo ēēchēēn nkōō koonēēt chēpō ng'ātuut? (kii-iitō 10)
9. Kii-irta nee :Ērōōtē nkōō askariichiich Yēesu? (kii-iitō 11)
10. Kii-ira nee pērēētuunōōnēē akipō Pilaato nkōō Ērōōtē? (kii-iitō 12)

Ng'alyoon nyēpō lēt: Kiiwālchi :Yēesu Pilaatō nkōō Ērōōtē kung'uloong'ulēy. Kiitēpō :Yēesu nkōō oor nyēpō koonyit mpō ntā /kiikimārēy /kēēsōōrnoon inyēēntēē. Wāluuy :piich ng'alyoon nkōō oor nyoo ng'uloong'ulēy paani kāpichirituuy ng'ala. Kiinkēt :Pilaatō kilē kimāting'ēy :Yēesu lēēluut aka tōkōl nyoo muchinii /keekeet. Kiituup kilē weel :Pilaato ng'alēēpo piich. Kii lēku sāl wō :Ērōōtē āmu kiicham kiimuul wēēroo Iriin aku kureer mpō ku kiimārēy inyeentee kilē kuuro kwōng'uut.

Saayat: Apoo, toorētoon ālēku nyakan saamuuk amētooro keey chiich aka tōkōl nyoo iroon kimaachamiin nta amētō pāyiisyēēng'uung'.Toorētoon simoowāriisyo nta ālēku sāl wō. Lēē nyōōnēē .

KITILĒY :PILAATO KILĒ /KEEKEET YĒĒSU

Luuka 23:13-25

Taayuu: Kiiting'ēy :Yēesu lēēluut aka tōkōl? Kiimārēy Pilaato /keekeet Paraapa nyoo kiitō Yēesu. Kiityam kutyaakta Pilaatō kilē kuutyaakta Yēesu. Kiimii ng'uulootyō nyoo oōw akipō Yēesu nkōō Paraapa.

Saa: Soomō Iriin kuutōōrētīn paani isyookēy siruutēchu aniinee.

Soomana āsip ārēēny: Luuka 23:13-25

Tēepuutyēē nyoo oōw:Kii āmu nee simaa -irchi :Pilaatō Yēesu man? (kii-iitō 20, 23)

1. Kiimwoochi nee :Pilaato piich tōkōl, tisiin nyoo oōw nkōō kaantōōy akipō Yēesu? (kii-iitō 14)

2. Kiirōōtitooy āno :Ērōōtē nkōō Pilaato ākipō Yēēsu? (kii-iitō 15)
3. Kiimārēy :Pilaato ku-irchi nee Yēēsu? (kii-iitō 17)
4. Kiimārēy :piich tōkōl /kee-irchi nee Yēēsu? (kii-iitō 18)
5. Kiimārēy :piichoochoochēē keetyaakta ng'oo nyoo kātō Yēēsu? (kii-iitō 18)
6. Kiityam kuutyaakta :Pilaato Yēēsu nkōō oor nee? (kii-iitō 20)
7. Kiimārēy :piichoochēē chaang' kilē ku-ir nee Pilaatō? (kii-iitō 21)
8. Kiityam āsip ata :Pilaato kilē kutyaakta Yēēsu? (kii-iitō 22)
9. Nee nyoo kii-ir :Pilaato kuuran kuchāmchi piich soomātēēng'waang'? (kii-iitō 23)
10. Kii nee mii lētuun ku-irta nee :Pilaato Yēēsu nkōō Paraapa?(kii-iitō 25)

Ng'ālyoon nyēpō lēt: Kiinkēt :Yēēsu kilē /kipārēy inyeentee nkōō Keetseemaani. Kiicham :pichwēēchu raacheen /keepar Yēēsu mpō ntā kiinkēt kilē māting'ēy lēēluut aka tōkōl. Irēy piich :tēnkēk nkōō koowāriisyō ku-ir tukun chaa raacheen mpō ntā mārēy ku-ir tukun choo kāroomēēn. Kiipiir koontōōy piikō aku-ir akwaaneek kucham /keekeet Yēēsu nyoo kiikoonyitoot /akeetyaayta rumiin.

Saayat: Āpoo, toorētoon simēēpootēn ng'ala chēpō piich. Toorētoon āsōwu akaa-ir makeeng'uung'. Lēē nyōōnēē

KIMII: YĒĒSU AREE KUWĒĒTII /KĒĒKĀRKOOTĒY

Luuka 23:26-31

Taayuu: Kiisip kiteer: Yēēsu ng'woonin kitoomō keekarkaat inyeentee. Nkēt :Yēēsu nyāriluutichooch. Kiiriira :chēēpyōōsōōy chēpō Chēērusālēēm Yēēsu aku-iimchi keey inyeentee kitya.

Saa: Soomō :Iriin kuuneetin paani imi inēētēy keey ng'ālyoonteenyiin aniinee.

Soomana āsip ārēēny: Luuka 23:26-31

Tēēpuutyēē nyoo ōōw: Kiimwoochi nee :Yēēsu chēēpyōōsōōy? (kii-iitō 28)

1. Ng'oo nyi /kiiki-ir kukalap kimurtooyoon nyēpō Yēēsu? (kii-iitō 26)
2. Kii-irēy nee :chēēpyōōsōōy chu kimii nkōō piich chaa chaang' paani kiimii kiisirtooy Yēēsu? (kii-iitō 27)

3. Kiimwoochi :Yēesu chēēpyōōsōōy kiriira ng'oo? (kii-iitō 28)
4. Mwoorēy nee lētuun :chēēpyōōsōōy? (kii-iitō 29)
5. Mwoorēy nee :piich pērēētus choo pkoonēy akipō nyāriluutēkwaak?
(kii-iitō 30)
6. Ipkootey :inyēēn kilē tēptooy ānō piich paani kooroom sāpoon nee
kōlkōlō paani karam sāpoon? (kii-iitō 31)

Ng'alyoon nyēpō lēt: Kiisip :Yēesu kuuneet keey akipō nyāriluut kitoomō mpō keekarkaat. Kiinkēt :Yēesu pērēētus choo pkoonēy aku kiichēpoot. Kiikar koong' :Yēesu piich kima-ir rāyiityō akumwoochi ākipō siitēt nyoo nyōōruuy piich nēē māng'iisyō nkōō ng'ōōki. Kiimārēy :Yēesu piich kumāng'iisyō nkōō oor nyēpō man akuupkaat wōli tāchinii keey.

Saayat: Āpoo, toorētoon ānyooru māng'oot nyoo pāypooyiin. Kōōnkēy āmu mpō paani kiipuntoorēē nyāriluut ku kiipkaat ākipō piich walak. Toorētoon apkaat akipō piich walak kusir aneentee. Lēē nyōōnēē.

/KĒĒKĀRTOOTĒY YĒĒSU!

Luuka 23:32-43

Taayuu: /Kiikuukārkootei Yēesu kwēēnuu kipng'ōōkiis. Kiiriiree :Yēesu piich choo kiimii nkōō inyeentee. Tākumii pārooyiin /kēēsoom :Yēesu nyōoyeetaap kaat.

Saa: Soomō Iriin kuutoorētīn ineet keey kipunuunō ng'aleechu pō kaa-iim aku pō koomānuut.

Soomana āsip ārēēny: Luuka 23:32-43

Tēēpuutyēē nyoo ōōw: Koopooruunō nyēpō ātēp nyaa karaam nyoo lēē nee nyi kiing'uutu :Yēesu kimii kimurtooyoon? (kii-iitō 34, 43)

1. Kii chēēlosoos choo lēē ata choo kikiikārtaat nkōō Yēesu? (kii-iitō 32)
2. /Kiikuukārkootei Yēesu wōlpō āno? (kii-iitō 33)
3. Kiisoom nēē: Yēesu Iriin ākipō pichu kiikarkaat inyeentee? (kii-iitō 34)
4. Kii-ir nee :askari paani kimii kimēērēy Yēesu? (kii-iitō 34)
5. Kiimārēy: piich kilē kii-ir nee Yēesu nēē koo Meesaaya, Sāruuniin nyoo

kiilēwēn: Iriin? (kii-iitō 35)

6. Kii-ir :nee askari paani kiimii kimuulēy Yēēsu? (kii-iitō 36)

7. Tyāmuut nee choo kiityāmēē askari Yēēsu? (kii-iitō 37)

8. Kiimwōōrēy nee :ng'aleechu /kiikusirchi kimurtooyoon nyēpō Yēēsu?
(kii-iitō 38)

9. Kiimwoochi nee :chēēlosoosyoontēē akoong'a Yēēsu? (kii-iitō 39)

10. Kiikar koong' kilē nee :chēēlosoosyoontēē nyiinō aka? (kii-iitō 40)

11. Kiiwārēy ng'oo :chēēlosoosyoontēē nyēpō ārēēny? (kii-iitō 40)

12. Ng'oo :nyi kiimwa kilē māting'ēy lēluut Yēēsu? (kii-iitō 41)

13. Kiisoom nee Yēēsu :chēēlosoosyoontēē nyēpō ārēēny? (kii-iitō 42)

14. Kiiwālchi nee :Yēēsu? (kii-iitō 43)

Ng'ālyoon nyēpō lēt: Mpō paani kiimii kimēērēy :Yēēsu ku kiineet piich kipunuunō ātēpeenyiin. Kiisoom :apoonyiin kuunyoochi kaat pichu kiinyaril akuukeet inyeentee. Kiinyoochi kaat akutaak chēēlosoosyoontēē nyi kiiran inyeentee kuchō pāyuunāteenyiin. Kiimwa :pichu kiirō ātēpeenyiin nyaa karaam kimii kimurtooyoon kilē maaleel inyeentee. Kiiran :Yēēsu muulāt nyēpō koontōōy, askari nkōō chēēlosoos aku maakar koong' akwaaneek mpō ntā kii Iriin inyeentee.

Saayat: Kōōnkēy Yēēsu āmu inyōōchini kaat chiich aka tōkōl nyoo sōōmēy nyooyeetap kaat akimārēy kitililiit. Kōōnkēy ākipō kooyoomiisēēng'uung' nyēpō sāpoon nyēpō akōy. Lēē nyōōnēē.

MEERAA YĒĒSU

Luuka 23:44-49

Taayuu: Kiichō :tuurin nyoo kiikar kōōrēē tōkōl paani kiima Yēēsu. Kipaala :ankee nyi /kiikIchara wōloo tiliil nkōō Kōpō Iriin. Kiimētoochi :Yēēsu toomirmiiryeenyiin ēēruun chēpō paapeenyiin paani kiimii kimēērēy. Kii-iim keey :kiineetanichiich kitya akipō meeraa Yēēsu.

Saa: Soomō Iriin kuutōōrētīn neetee keey ng'aleechu po kaa-iim chu imii isoomānēy.

Soomana āsip ārēēny: Luuka 23:44-49

Tēepuutyē nyoo dōw: Kiiwō ānō toomirmiiryoo Yēesu paani kiima inyeentee? (kii-iitō 46)

1. Kii-ira nee king'eetee saayit lo nyēpō pērēēt ākōy saayit sokool? (kii-iitō 44)

2. Kii-am nee: ankee nyi kiichārēy wōloo tiliil nkōō Kōpō Iriin? (kii-iitō 45)

3. Kiinchoochi kilē nee :Yēesu apoonyiin paani kiimii kimēērēy? (kii-iitō 46)

4. Kiimwa nee :āskāriintēē nyoo dōw paani kaakima Yēesu? (kii-iitō 47)

5. Kii-ir nee :piich paani kaakima Yēesu? (kii-iitō 48)

6. Kiimii ku-irēy nee :tuupiichiich paani kii-irisyoot ng'aleechu tōkōl? (kii-iitō 49)

7. Kiipkōōnēy ānō :chēēpyōōsōōchu kiituupēy inyeentee? (kii-iitō 49)

Ng'alyoon nyēpō lēt: Man, kiima Yēesu akiinkēt :kipsenkwēt tōkōl. Mpō wōloo kiitēptō :kōōrēē ku kiing'uutuuy kilē kii-iriisyō ng'ala chaa raacheen. Kiipaala anka nyēpō kōpō Iriin kung'eetee parak ākōy ng'wēny. Kiing'uutuuy nyēēnyi kilē kaakuyooti :Yēesu chiich tōkōl aree nyoo wēētii wōloo mii Iriin nyoo mā piipō Yāwuut kipaāt. Kiitoowu :piich kusōwu rayiityō nyoo kii-ira. Kii-ātyō kitya :kiineetanichiich akipō ng'aleechu kii-iriisyō.

Saayat: Apoo, āsōwuuntooy ānō kilē kiikōrōōm nyaa tyaan meeraa Yēesu? Kōōnkēy :Yēesu ākipō tukun tōkōl choo kii-ir si nēē ng'at ānyōōru nyooyetap kaat akoosowuun inyēēn. Lēē nyōōnēē.

/KĒĒSIINTOOY PŌŌRPŌ YĒĒSU

Luuka 23:50-56

Taayuu: Mā chiich tōkōl nyēpō kōōkwoo piipō Yāwuut nyoo kiimārēy kilē /keekeet Yēesu. Kiisiintō :Pooyoon akoong'o nyēpō kōōkwoo piipō Yāwuut pōōrpō Yēesu. Kiima Yēesu kitoomō kitoowu keey pērēētuu Sapaato. Kiikoonyitēy tuupiichiich pērēētuu Sapaato.

Saa: Soomō Iriin kukōōnin isōwu kir nyoo puuntoorēē chiich nyoo lēē kiineetan paani imii inēētēy keey ng'alyoonteenyiin.

Soomana āsip ārēny: Luuka 23:50-56

Tēpuutyē nyoo ōōw: Nkōō oor nee nyoo kiitooku ātēpuutēpō Yāwuutik paani /kiikuusiintooy Yēēsu? (kii-iitō 54-56)

1. /Kiikikuree ng'oo :pooyoon nyēpō kōōkwoo Yāwuut nyi kiimaaran keekeet Yēēsu? (kii-iitō 50)

2. Kii chiich nyoo lēē nee Chōōsēp? (kii-iitō 50)

3. Kiimii kikānyēy nee? (kii-iitō 51)

4. Kiisoom nee :inyeentee Pilaato? (kii-iitō 52)

5. Kii-irta nee :Chōōsēp pōōrpō Yēēsu? (kii-iitō 53)

6. Nee nyaa karaam ākipō kēpēnoononēē /kiikiisiintoochi Yēēsu? (kii-iitō 53)

7. Kii pērēētūu nyēpō ata nyi kiimēērēy :Yēēsu? (kii-iitō 54)

8. Kii āmu nee sikutuup :chēēpyōōsōōy Chōōsēp? (kii-iitō 55)

9. Kiichēp keey kilē nee :chēēpyōōsōōychōōchēē? (kii-iitō 56)

10. Kii āmu nee tākuumuung' :chēēpyōōsōōychōōchēē pērēētūu Sapaato nyoo kiitāpēētii kēpēnoo meeraat? (kii-iitō 56)

Ng'ālyoon nyēpō lēt: Kii nyakan :Chōōsēp āmu kiisoom Pilaato pōōrpō Yēēsu. Kiimaapāpāychi meeraa Yēēsu aku kimaamuuk inyeentee kukarta /kimākuukeet. Kiimārēy :Chōōsēp kuusiintō pōōrpō Yēēsu nkōō oor nyēpō koonyit. Nyoolchinēēch kēēkoonyitō Yēēsu paani ku-irēy pāyiisyooniipō Iriin nkōō nyakanat. Kiikoonyit :chēēpyōōsōōy inyeentee, nēē miī lēt kuutō Yēēsu akwaaneek kōōnuunō kulēku chēpō taay kusōwu akipō ng'ēētyeenyiin.

Saayat: Kiptayaan, toorētoon ālēku kineetaneeng'uung' nyoo lēē nyakan mpō nkōō pērēētūus choo kōrōōmēn. Lēē nyōōnēē.

KUNG'ĒĒTĒĒ :YĒĒSU MEERAT*Luuka 24:1-12*

Taayuu: Kiing'eeta :Yēesu meerat aku kiipō taay :chēēpyōōsōōy kuurō inyeentee. Kiimwooru :malaayikeen akipō ng'eetaat nyēpō Yēesu. Kiikaakung'oor :Yēesu akipō meereenyiin nkōō ng'eetateenyiin, wōloo nyuun kiimaaran :kiineetanichiich.

Saa: Soomō Iriin kung'uutuun kir nyoo rēēl aniinēē paani imi isyookēy siruut.

Soomana āsip ārēēny: Luuka 24:1-12

Tēēpuutyēē nyoo ōōw: Kii āmu nee sikuuyooku :Iriin malaayiikeen paani kiing'ēētēy :Yēesu nkōō paani /kiikunāmēy inyeentee?

1. Pērēētuu nyēpō ata nyi kiipa :chēēpyōōsōōy ākōy kēpēnooni /kiikutupchi Yēesu? (kii-iitō 1)
2. Kiira nee akipō kortō nyi kimii kēpēnoononēē kurkat? (kii-iitō 2)
3. Nee nyoo kiimoomii kēpēnēē or? (kii-iitō 3)
4. Ng'oo chu kiing'uuti keey akwaaneek kitākumii kēpēnoo meerat? (kii-iitō 4)
5. Āmu kiiwāriisyō: chēēpyōōsōōchoochēē ku kiir nee? (kii-iitō 5)
6. Kiimwa nee :pichōōchēē akipō Yēesu? (kii-iitō 6)
7. Kiipkooti nee: pichōōchēē chēēpyōōsōōchoochēē? (kii-iitō 7)
8. Kii-ir nee :chēēpyōōsōōchoochēē paani kiiwārākiisyēērō kēpēnēē? (kii-iitō 9)
9. Kii āmu nee sikukoroomiit nkōō :chiich tōkōl kuuran ng'alēēpō chēēpyōōsōōchoochēē? (kii-iitō 11)
10. Kiirō nee :Pēētērō nkōō kēpēnooni /kiikuusiintoochi Yēesu? (kii-iitō 12)

Ng'ālyoon nyēpō lēt: Pichōōchēē kiiryoonchēērēē kēpēnēē ku malaayiikeen chēpō Iriin. Kiinkēt kilē kaakuung'eetee :Yēesu kēpēnō meerat. Kiiting'ēy nyakanat :chēēpyōōsōōchoochēē āmu kiipa kuuro kēpēnēē mpō tākiimii :askari choo kiiriipēy. Chēēpyōōsōōchwēēchu chōō kiipō taay kumwoortooy akipō lōkōōy choo kāroomēēn chēpō ng'ēētyoo Yēesu. Kii nēē ng'eeta :Yēesu meerat ku

kiing'uutu nyoonēē kilē man kii Iriin inyeentee.

Saayat: Āloosuun inyēēn Yēēsu āmu king'eetee meerat aku kiipēl meerat nkōō syeetani. Lēē nyōōnēē.

KUNG'UUTINII KEEY :YĒĒSU KIINEETANIK ĀRĒĒNY CHOO KIIPĒĒTII EMAAWUS

Luuka 24:13-35

Taayuu: Kiimēērō :moontin kiineetan ārēēny choo kiipēētii Emaawus. Kiipāyiisyēērō :Yēēsu ārāruut nyēpō kēny (Siruut chēpō Yāwuutik) kuuneet kiineetanichiich. Muukēy :Iriin ku-ir piich kuti māsōwu kir aka tōkōl nēē mārēy. Kii nēē mii lētuun kusōwu :kiineetanichōōchēē kilē ng'oo chiichōōnēē lēē toon.

Saa: Soomō Iriin kuyaatin kaapkootuut siisōwu kiyoo isoomānēy aniinee.

Soomana āsip ārēēny: Luuka 24:13-35

Tēēpuutyēē nyoo ōōw: Kiineet nee :Yēēsu kiineetanichiich kimii kuwēētii nkōō akwaaneek kamaspo Emaawus? (kii-iitō 26)

1. Kiing'aloolēē nee :pichōōchēē lēē ārēēny kimii kupēētii nkōō Yēēsu (kii-iitō 14)

2. Kiipkootēy :kiineetanichu kilē kii ng'oo Yēēsu? (kii-iitō 19)

3. Kiiting'ēy :kiineetanichōōchēē kāmoong'uunō akipō Yēēsu kilēē ng'oo? (kii-iitō 21)

4. Kiineet nee :Yēēsu kiineetanichiich kupāyiisyēērēē siruut chēpō Yāwuutik (ārāruut nyēpō kēny? (kii-iitō 27)

5. Āmu nee sikusoom :pichoochēē Yēēsu kilē kutēpō nkōō akwaaneek? (kii-iitō 29)

6. Kii-iir nee :Yēēsu nyoo kiitoorēt kiineetanichiich kusōwu kilē inyeentee nyēēnyi mii nkōō akwaaneek? (kii-iitō 30)

7. Kiiteerta ānō :kiineetanichōōchēē paani kiimii kuunēētēy :Yēēsu akwaaneek akipō inyeentee? (kii-iitō 32)

8. Kii-iir nee: pichōōchēē paani kiipēt Yēēsu kilē wirwir? (kii-iitō 33)

9. Kiimwoochi nee :kiineetanik chuuchō walak kiineetanichōōchēē paani kii-itu? (kii-iitō 34)

10. Kiimwoochi :kiineetanichōōchēē kiipkoonēē Emaawus ng'ālyoon nee nyēpō koomānut chuuchō walak? (kii-iitō 35)

Ng'ālyoon nyēpō lēt: Kiimārēy :Yēēsu kuuneet kiineetanichu lēē ārēēny kii kaakumēērō: moontin akipō wōloo kiitētō sāpeenyiin. Kiineet akwaaneek ng'ālyoon kipunuunō Ārāruut nyēpō Kēny. Kiimwoochi :Yēēsu kiineetanichoochēē kikaraam kilē kii ng'oo inyeentee. Kiing'uuti keey :Yēēsu pichoochēē lētuun paani kiipuutil makaatyan akuutō akwaaneek. Kiiting'ēy koonēētuut nyoo ōōw puutilooni makatyaan aku /kiikusōwu kung'eetee pērētuunoonēē.

Saayat: Kiptaayaan, neetaan āsōwuun. Tōōrētoon āsōwu kilē iriirēēnoon akiimārēy kilē achamin akooloosun inyēēn. Lēē nyōōnēē.

KUNG'UUTINII KEY :YĒĒSU KIINEETANICHIICH

Luuka 24:36-49

Taayuu: Kiing'uuti keey :Yēēsu kiineetanichiich paani kiikaakung'eeta meerat. Kiitō :Yēēsu kiineetanichiich kōōnuunō paani kiing'uuti keey akwaaneek. Ārāruut nyēpō kēny (Siruut chēpō Yāwuutik) kuunēētēēch tukun chaa chaang' akipō Yēēsu. Toorēteech :Toomirmiir nyoo Tiliil kee-amtee lōkōōy choo kāroomēēn akipō Yēēsu.

Saa: Soomō Iriin kuyaatin mēt sōwuu kiyoo mwoorēy siruutēchu inēētēy keey aniinee.

Soomana āsip ārēēny: Luuka 24:36-49

Tēēpuutyēē nyoo ōōw: Irēēy nee paani kāku-iistō ng'ōōkiichooch ākēēsōwu Yēēsu? (kii-iitō 36)

1. Kii nēē mii ku-āmchinii keey lōkōōy kiineetanichoochēē kuchō ng'oo kung'uuti keey akwaaneek? (kii-iitō 36)

2. Kiipkootēy :kiineetanichoochēē kilē kii ng'oo Yēēsu? (kii-iitō 37)

3. Kiinkēt :Yēēsu kilē kiipkootēy nee pichoochēē? (kii-iitō 38)

4. Kii āmu nee simeeran :kiineetanik kilē kiing'eet Yēēsu mpō ntā kiikaakung'uuti akwaaneek eeruuneechiich nkōō kēēlyēēchiich? (kii-iitō 41)

5. Kii-am nee :Yēēsu nyoo ng'uutuuy kilē mā ōōyiin inyeentee? (kii-iitō

42)

6. Kiisip kumwa nee :siruuat akipō Yēēsu? (kii-iitō 46)

7. Lōkōōy nee choo /ku-āmtootēy nkōō kaarinaa Yēēsu? (kii-iitō 46)

8. /Ku-āmtoochinii ng'oo lōkōōyiichoochēē? (kii-iitō 47)

9. Kii āmu nee sikuumuuk :kiineetanik ku-amtata lōkōōweechoochēē?
(kii-iitō 48)

10. Kii nee nyoo wēētii :Yēēsu kuutēnii kiineetanik kuchōōnē parak
kipsēnkwēt? (kii-iitō 49)

Ng'alyoon nyēpō lēt: Man kiing'eeta :Yēēsu meerat. Kiing'uuti keey
kiineetanichiich chēpō taay. Kiiran :akwaaneek inyeentee akukutunchi kilēē
wēēroo Iriin. Kiimētoochi :Yēēsu kiineetanichiich ku-amta lōkōōy chēpō
pāyuunātoo Iriin. Paani kiing'eeta :Yēēsu meerat, kuuneet kiineetanichiich
kipunuunō siruuat sikusōwu akipō inyeentee kukaram. Kiiyoomiis :Yēēsu
kiineetanichiich kaamuuka nyēpō kipsēnkwēt kipunuunō Toomirmiir nyoo Tiliil.

Saayat: Kiptaayaan Yēēsu, toorētoon āleku kiineetan nyēpō iman akoo-āmtoochi
piich walak akipō lōkōōyikuuk choo kāroomēn chēpō nyooyeetaap kaat nkōō
choomnyoo Iriin. Lēē nyōōnēē .

/KĒĒ-ĀPĒY YĒĒSU KUWŌ KIPSĒNKWĒT

Luuka 24:50-52

Taayuu: Kiipēēruur :Yēēsu kiineetanichiich. Kiimētō :Yēēsu kiineetanichiich
akuwō parak kipsēnkwēt.

Saa: Soomō Iriin kuutōōrētīn isōwu kir nyēpō koomānuut paani imii isoomānēy
soomanee nyēpō let nyēpō kiitapuu Luuka.

Tēēpuutyēē nyoo ōōw: Nēē kir ākoong'o nyoo irēē nēē ran :chiich kilē Yēēsu ku
wēēroo Iriin? (kii-iitō 52)

1. Kiimut :Yēēsu kiineetanik ākōy ānō? (kii-iitō 50)

2. Kii-ir nee :Yēēsu kitoomō kimētō kiineetanik? (kii-iitō 51)

3. Kiiwō āno :Yēēsu? (kii-iitō 51)

4. Kii-ir nee : kiineetanik paani /kiiki-āp Yēēsu kuwō kipsēnkwēt ? (kii-iitō
52)

5. Kii nee wārākiisyō :kiineetanik Chēerusālēm ku kii lēē nee moontinēēkwaak? (kii-iitō 52)

6. Kii-ir nee :kiineetanichoochēē nkōō Chēerusālēm? (kii-iitō 53)

7. Kiipāyiisyēērēē kilē nee :kiineetanik saayiitisyeekwaak paani kiimii kikānyēy kaamuuka nyi kiiyoomiis Iriin?(kii-iitō 53)

Ng’ālyoon nyēpō lēt: Kir nyēpō lēt nyoo kii-ir :Yēesu ku kuupēēruur kiineetanichiich. Kiipāypāyiituuy :kiineetanik kitya āmu kiisōwu kilē sāpēy Yēesu. Kiisōwu nyuun kilē Iriin Yēesu akuuloosu inyeentee. Kiipāyiisyēērō saayitiisyakwaak chu kimii kikānyēy kuuloosu Iriin.

Saayat: Kiptaayan Yēesu, āloosuun āmu ichō Iriin. Kōōnkēy āmu mookānyēy kuurēer Toomirmiiryēēng’uung’ nyoo Tiliil kuchōōnēē parak kipsēnkwt āmu mii inyeentee or nyaanyuun nēē āmii āmoong’uun. Nyiriitaan kuureer kaamuuka nyēpō Toomirmiiryēēng’uung’ nyoo Tiliil āmu āmārēy a-ir kir aka tokōl nyoo kēēmwoorwoon. Lēē nyōōnē.



... Ng’ālyoon nkōō kuut aka tōkōl!